


中華文史叢書之八十一  
清・同治五年刻本影印  
王有立主編

存誠齋文集  
慎思居存稿集

(本訂合)

湯撰  
著  
修不  
撰詳

華文書局股份有限公司印行



平  
誠  
齋  
文  
集

曾紀澤署檢

同治五年春刊  
於皖江藩署

# 序

蘭視皖學得與何小宋方伯爲寮友辱以同館之誼相見  
觀其政事文章尺步繩趨常恐稍有越畔心服其學有本  
原久之始知其出於尊人雲眈先生教也後以花間補讀  
圖請題先生賜以長句豪情揮灑神駿似少年爰脩後進  
禮晉謁蒙不以爲庸下而鄙棄之傾懷談藝推愛如素識  
者出存誠齋文集見示屬爲校勘反覆讀之始知向以學  
業文詞相推者猶未足盡先生也先生抱經濟才少日讀  
書研究經史尤留意於韜略作宰西川厯任繁劇於山川  
形勢阨塞之區悉心措置所至吏民愛之權屏山時猺夷



不請願之集  
叛廣設方略捕獲殆盡寧遠野夷滋事承檄往討率兵至  
西昌平之悉降其眾集中於論蜀西南徼地理民俗指畫  
大勢籌所以綏來而絕後患者惓惓三致意焉上官重其  
才而不能盡用其言及方伯貴遂就養皖城年將八十神  
明不衰手一編終日危坐不輟興酣手挽強弓發矢命中  
見者咸歎爲具文武才以不竟其用爲可惜不知先生以  
爲官無論高卑但得施展所學有裨於國計民生卽足償  
平日讀書之志乃者出其緒餘培養令子爲國家重臣  
澤及天下其有益於世者顧不重且大哉至文之出入唐  
宋大家沛然四注有磅礴無前之概見識之超特氣度之

閔遠亦時時見於議論卓然傳世無疑無俟鄙人之揚扞  
而以淺見寡聞如蘭者綴名簡末附之以傳亦厚幸也夫  
同治丙寅二月旣望愚姪姚江朱蘭拜譔

--	--	--	--	--	--	--	--	--

# 序

昔昌黎韓子以文雄於時其言曰氣水也言浮物也氣盛則言之小大與聲之高下皆宜昌黎之論善矣而非其至也文章之道發於性情根於學術理足而氣輔之斯爲至耳香山何小宋方伯封翁雲咳先生少而好學老而彌篤筮仕西蜀以經術飾吏治卓然有聲尤長於折獄積年疑案一鞠卽服稱爲神明公暇輒手一編寒暑不置時以其緒餘發爲文章隨其意境所至不拘一格各盡其妙沛乎若層波之赴壑也飄乎若晴雲之裊空也悅悅乎若雲車風馬倏忽而有無也彬彬乎又若曳裾鳴珮相周旋也洋

洋乎漚漚乎如瓊璫玉管金石並奏而五音六律還相爲  
宮也淵乎寂乎若深林落日悄無人跡又若幽蘭生於空  
谷不言而自芳也如遊名山然朝暮而景百變得毋靈氣  
往來之所爲也乎然其指陳之剴切斷制之精嚴叙述之  
婉摯論據之堅確則非深明道要洞達治體者不可以強  
能然則先生之文其殆主於理勝而非徒求之於氣歟抑  
又聞先生精通韜略西蜀邊境猺夷時出爲患郡邑苦之  
先生權篆屏山甫兩月卽以計擒斬數十人並奸民之爲  
賊謀者猺夷讐服不敢復犯咸豐中甯遠野夷叛所屬之  
越雋冕甯西昌焚掠數百里大府檄提軍率大兵進剿越

冕而以西昌屬先生剿治分兵不逾千人先生采入險阻  
擒其巨憝餘皆投戈乞降先生諭以禍福爲立約十二章  
而去西昌無事至今賴之嘗按考古今兵略撰武備輯要  
一書自兵機陣勢及風角鳥占靡不具載簡而賅博而精  
蓋有文事必有武備先生足兼之矣壬戌之冬先生就養  
來皖潛以年家子獲拜謁階下先生不鄙棄之鐫誨備至  
又出所著存誠齋文鈔授之讀且命爲序潛愚且陋不足  
窺見先生之萬一又不敢以不文辭重違長者之命爰舉  
所聞師友論文之旨並及先生爲政之方略使人讀先生  
之文者知文章根於學術而反求於窮理養氣之本庶有

當於先生之意否耶

同治四年仲夏之月年愚姪閩縣陳濬謹識

序

予與小宋方伯同官皖江性情既洽蹤跡漸親見其持躬清而近情馭吏寬而不弛不事矜張百廢具舉起家文學侍從雖老於吏事者咸相顧驚詫自以爲不及心竊異之時封翁雲眈先生就養在署暇嘗修子姪禮晉謁先生年已七十有五精神視履如四五十許人曾官蜀中四十餘年循良之譽至今嘖嘖在人口間爲談官蜀時吏事興革利弊與夫形勢險易阨塞之故如燭照數計娓娓不倦尤精孫吳之學每以不獲請纓爲憾嘗云苟有以軍事相委者猶能據鞍顧盼效趙充國馬伏波之所爲夫乃歎先生



經濟之才之大雖不竟其用而方伯熟聞庭訓用以造福東南固有所受之也先生性耽著述老而彌勤因請讀所著存誠齋古文十二卷則又與先生所談及方伯所施於政事者若合符契此豈先生一家之言哉固天下後世凡爲政者所欲紬繹諷誦奉爲圭臬者也是宜急付手民以廣其傳吾知先生之造福於將來者更未有艾矣

同治丙寅四月愚姪新建吳坤修謹序

評語

捧讀 大集議論崇閎文情斐疊有韓潮蘇海之觀兼賈  
茂董醕之妙具此長才定遇知己佇見展施素志惠濟蒼  
生可預卜也豈久屈百里者哉亟宜付梓以廣其傳

紫垣潘時彤

長於持論而一規於正洋洋灑灑振筆疾書含經茹史準  
情酌理善洩古人未發之蘊而補其遺無偏頗之見無依  
傍之習具此長才可以作史

禪生王濟宏

論傳則胎息馬班記叙則肩隨韓柳根據前賢而不落窠

曰兼綜眾說而自出機杼蓋見理真持論粹運以妥帖排  
鼻之筆故能無窮出清新言人所不能言而適如人意所  
欲言必傳無疑

雨農馬恩溥

古文體例最嚴非胎息元氣者不能作作亦不工學者率  
爾操觚一行作吏此事遂廢簿書鞅掌中久已成廣陵散  
矣合觀大集無體不具如綏邊策奏諸作洋洋千言馬伏  
波之聚米爲山也其尙論古人處九日元如炬真有合於  
記序用斂筆論辨用縱筆之旨讀萬卷書行萬里路解人  
不當如是耶壯悔小倉而外又當別樹一幟拜服之至

衡農錢召棠



存誠齋文集卷一

香山何曰愈子持氏著

男景同校

秦論

秦之亡具載史策而賈長沙三論言之已詳茲不備論請  
論其興夫春秋戰國時諸侯之疆固莫秦若也人咸知其  
疆而莫知其所以疆說者謂地阻崤函雄關百二帶河被  
山沃野千里搯天下之吭而拊其背進則可戰退則可守  
此秦之所以疆歟此知其末而未探其本者也地利固戰  
守之助也然使無賢君哲士經營於其間亡且可立待安  
望興乎若秦果以地險致疆當子嬰之時何陳涉以一匹

夫奮身歆歆攘臂振袂而起子嬰已銜璧於軹道耶當是時雄關沃野豈異疇昔哉胡前以區區千里之地鞭笞天下而有餘後混一海宇以六合爲家八藪爲囿奄有華夏臣妾萬國制一匹夫而不足耶無他仁與不仁得士與失士故耳不仁則天下叛之仁則天下歸之拒諫則士去之禮賢則士附之國家理亂興亡視此而已昔晉世受秦德而晉以怨報之是晉固秦仇也魯僖公十三年晉游饑不豹請伐之秦穆曰其君是惡其民何辜於是輸之粟雍絳相望命曰泛舟之役而晉勿德復屢侵秦已而晉又饑秦復恤之曰吾怨其君而矜其民於戲秦穆之言藹然仁者

之言也湯之遺葛奚以異此當孟明之虜於晉也穆公贖而歸之迎而勞之引咎自責增德脩政故孟明卒報晉於彭衙封殽骸而還君子曰于以采芣于沼于沚于以用之公侯之事穆公有焉昭王之見范雎也長跼三請尊爲仲父故睢教以遠交近攻之策始蠶食諸侯日益彊大惟秦能尊賢禮士也故四海英彥歸之者眾於是百里奚蹇叔公孫支接軫而來穆公以之并國數十稱霸西徼商鞅來於魏孝公以之闢地千里民殷國富惠王用張儀舉三川吞九夷諸侯連衽而朝頃襄用白起六國不敢陳兵函谷蔡澤相而燕太子入質王翦將而一天下成帝業所用之



人才雖優劣不同而其君之能下士則一此秦之所以興也果以險云乎哉迨始皇并天下心滿氣驕以爲天下莫已若也於是遠正直邇邪詔建阿房築長城竭天下之財拂天下之情焚書坑儒欲驅而歸於愚不知賢哲天生未可愚也滅先王之道欲天下之人不知桀紂爲非不知桀紂之道不可以治天下也箝天下之口欲人不敢揭已過不知已過不聞政事不可問也嚴刑峻法以威天下之眾使畏威懼伏不知畏懼之極反爲我讐也卒至天怒於上民怨於下二世不能矯其失又從而繼之窮奢極欲誅戮忠良當此之時非無一二深知遠慮之士但言未終而身

已膏斧鑕故皆重足結舌莫敢抒其盡誠然所以不遽亡者以始皇之餘烈猶在也及子嬰之際土崩之勢已成雖有聖智亦難善其後矣再傳而亡不亦宜乎吁國家興亡其在仁與不仁得士與失士乎

不問クニヤ

三

# 吳越論

書曰敬勝怠者吉怠勝敬者滅余讀吳越春秋觀其敬怠之際興亡修短係之嗚呼書言固可忽諸闔閭襲位雖不以正然逆取順守任用伍員孫武上下德遂致富強滅勁楚破越於夫椒北威齊晉幾成霸業何其盛哉夫差承祖父餘烈始痛先人之亡尙勤國政早朝晏罷肝食宵衣使人呼名以自警故能南報越稱霸中原開地千里臣妾句踐越之不亡者若髮使晚節末路始終無怠任用乃祖舊臣旁求俊良委國以聽吳祚其可量哉乃狃於常勝輕肘腋讐仇之勁越而遠事齊晉濫用其鋒外結四鄰之衅

內罄府庫之積又驕盈汰侈築姑蘓之臺浚民之膏疲民  
之力奪民之時招民之怨當是時道死巷哭者溢道衢罔  
或之卹百姓能爲之同仇乎子胥忠臣也賜之屬鏤公孫  
聖直臣也膏於鐵鎗惟奸佞是親聲色是好臣工能爲之  
戮力乎此自敝以授越也滅吳者非越也吳也非勾踐也  
夫差也其自剄於秦餘杭山也非不幸也宜也當吳之亡  
也犀甲吳鉤猶是爭長中原之故器也壯士健馬猶是爭  
長中原之故旅也非小弱也然一財塗地者上下心離也  
周書曰受有臣億萬惟億萬心予有臣三千惟一心其是  
之謂乎勾踐始臣僕於吳棲身會稽執廝養之事供賤隸

之役屈身辱行處之恬然及幸脫虎口卽登進賢良范蠡  
文種計硯曳庸苦成舉如扶同之徒復同心戮力內修厥  
德外勤厥政緩刑薄賦恤凶賑困貢府庫墾田疇君臣卧  
薪嘗膽者二十有一年卒滅吳湔會稽之恥跨有江淮南  
連閩越西威強秦將卒戒其子興夷曰吾自禹之後承允  
常之德仗天之祐以摧吳夫霸者之後難以久立其慎之  
哉始終之際敬慎如此而後人復能恪守先訓奮發以繼  
前烈故稱霸數十年至楚威王始滅之興亡修短之間豈  
有數乎敬與怠爲之也然句踐天資刻薄功高不賞致范  
蠡有五湖之遊文種有狗烹之悲遂爲漢明作備眞忍心

人哉

人言亦三集卷一

三

## 百里奚論

百里奚秦之賢相也其未遇也卑躬折節與庸人等及其相秦穆也秦以之富彊益國十二關土地千里三納晉君一定荆楚遂霸西戎爲天下雄以六國十倍之地不敢西窺奚亦能矣哉然奚固虞人也始仕虞晉以垂棘屈產假道於虞以伐虢夫虞虢固輔車相依者也虢亡而虞滅可翹足而待矣當是時宮之奇諫不聽曰虞不臘矣遂舉族行奚獨默然蓋知虞公難以口舌爭也雖然君子身居草野心不忘君昔齊欲伐魯孔子憂之迺使子貢說吳伐齊魯患以解豈孔子不足法歟况春秋之時諫無專官雖士



庶工賈咸得獻其忠愛之忱使奚當時能剴切強諫幸而  
虞公聽之是以一言而安父母之邦也卽不幸而虞公不  
聽吾言亦足不朽吁予旣奇奚之才偉奚之勲而於此又  
不能無憾於奚也已或曰百里奚楚人也仕於虞

## 季札論

上古立賢中古立長立嫡是立賢長與嫡皆先王之禮也禮之所在君子踐之不必過爲名高故季歷傳位聖人未嘗非之也義之所在君子行之似尤不必過爲名高故堯繼摯帝聖人尤無有非之者何則禮所在卽義所在也君子奚讓焉聖人奚非焉吳王壽夢生四子長諸樊次餘祭次餘昧次季札札賢父欲立之札辭曰禮有舊制奈何廢前王之禮而行父子之私乎遂止當時之讓義也蓋樊長也嫡也重天倫也讓可也讓祭昧也亦曰長也天倫也讓也嫡也重天倫也讓可也讓祭昧也亦曰長也天倫也讓亦可也追昧卒天倫父命以長以賢當立者惟札也固辭

何也使札果立也閭閻窺竊之心未敢萌也何也必曰是固吾先祖之所欲立也前數君之所固讓也且賢與長也篡弑之事必不敢爲也僚之所以弑也曰非長也非賢也篡弑之所由起也嗚呼旣弑其父又殺其子一門之內干戈相向備極凶殘閭閻何其忍哉然啓之者札也當札之出使而歸也未知悔與否也其讓也自爲謀則得矣使祖宗數百年之基業再傳而亡社稷邱墟太伯仲雍之鬼不得血食若爲國謀則計未始非失也雖然太伯仲雍以讓位而逃若札者所謂無忝爾祖者非耶天下後世之爭攘篡奪者視札能無愧耶如札者殆與夷齊并傳可也

## 淮陰侯論

何子夜讀忽廢卷太息有客款扉而入曰子何讀而歎乎  
曰淮陰侯韓信傳也客曰淮陰以不世之才建不朽之勲  
裂土分茅名垂終古烏乎歎子得毋以兵不克終臣節而  
不足之耶曰否淮陰短於智余是以歎客曰子何言之謬  
乎當漢楚爭鋒羣雄競起信以數萬之眾轉鬪中原虜韓  
魏舉燕代復引罷敝之師不終朝破趙數十萬眾於井陘  
旗幟東指又下齊七十餘城以項籍之勇喑鳴叱咤萬人  
皆廢而信敗之如拉朽使剋於烏江曾未兩年滅六國掃  
蕩羣雄奉混一寰區於漢高之手竊以爲不智者未能若

定也子得毋謬乎何子曰嘻淮陰將略殆上儕孫吳下視  
頗牧求之古良將誠未易多得若智則未可與言也夫明  
哲足以保身故良賈深藏若虛君子盛德大智容貌若愚  
孔子曰聰明睿知守之以愚功被天下守之以讓勇力震  
世守之以怯富有四海守之以謙此明哲保身之道也淮  
陰不知此致身隕鐘室赤及三族烏得智蒯通曰勇力震  
王者危功高天下者不賞旨哉斯言使淮陰智如范蠡子  
房明急流勇退之義功成身退何至身名俱隕哉又使淮  
陰智如守信汾陽解兵柄辭高位以消高祖之疑謙恭遜  
讓以避同寮之讒未必不如蕭曹之克保令終也淮陰不

知此始下齊遂有假王之請此召禍一也及克趙高祖方  
圍困滎陽成皋間淮陰不知勤王致高祖自稱漢舍人馳  
入趙壁奪其印符此召禍二也傲慢足以喪身矜盈足以  
取禍當雲夢被擒困處長安因論兵猶曰臣多多益善陛  
下不過將十萬無論才高招忌而揚已抑君爲其上者孰  
能堪此此召禍三也諸侯驕人則失國大夫驕人則失家  
樊噲雖出身微賤亦元勲也見淮陰偃蹇磬折而淮陰睥  
睨自若且曰生乃與噲等伍此召禍四也其徙封楚也出  
入陳兵自招物議此召禍五也有此召禍之道五且值高  
祖忌刻殘忍之主烏得不身喪名辱此余所以長太息也

客曰淮陰之被禍也史實言其叛反叛伏法宜也子以殘忍咎高祖又得毋謬乎何子曰噫此固燭影斧聲千古疑案非子所知也善哉孟子之言曰盡信書則不如無書書豈足盡憑信哉況其間之黨同伐異賢愚或出於愛憎是非遂陷於疑似昔陳壽撰三國志丁儀丁廙有盛名壽向其子索米干斛許立佳傳子弗與傳遂不立壽父爲馬謖參軍謖誅壽父亦髡遂議武侯不長於將略吾知古人以無米而不傳者未必獨儀廙以私怨受訾者亦不獨武侯也在明者察之而已夫人生古人之後事非當時目擊然而剖判隱微古人不得逃吾之鑒者察其言行心迹可得

而知也淮陰不叛其證亦有五當淮陰虜韓舉魏滅趙破燕乘勝而東田齊以亡所向無前當是時漢楚皆在其掌握之中信如果反必於此時與楚連衡爲鼎足之勢信不爲此其不反一也及高祖數奪其精銳蒯通知功高之不賞也遂假相背以動其心剗切敷陳而淮陰不爲動曰漢王解衣衣我推食食我何忍負之卒不聽蒯通之策遂破楚此不反二也及天下既定徙王於楚有告其反者高祖因僞遊雲夢以禽之夫人心虛則生疑當高祖提兵南下之際信如果反必發兵以拒高祖而信曾拒之乎是無反狀也使信有反心耶亦必託病不朝以瞻動靜豈肯自投



羅網哉而信曾託病不朝否是無反心也反狀未形反心未露謂之曰反不亦冤乎此不反三也高祖忌信才久欲殺之信果反雲夢之役焉能貸其死乃僅械至京師置之閒散誠以殺之無名不得不貸之也此不反四也若言陳豨拜鉅鹿守辭信信挈其手辟左右與之步於中庭仰天而歎曰子可與言乎云云者莫須有之說也夫反叛何事也使豨果信腹心則直與之言可矣何必問使豨非信腹心則信何敢言且何敢問乃問而後言雖至愚必不爲此謂信爲之乎况旣辟左右則仰天而歎之言又奚從而知之此不反五也蓋楚人之上反狀於前舍人弟之告變於

後皆高祖呂后陳平張子房輩羅織而成者也且史亦曷嘗言信真反哉始言信自度無辜繼言辟左右仰天而歎隱約其辭使後世庶幾知信之冤此太史公苦心營構之文也且信臨終歎曰吾悔不用蒯通計則信初無反狀且無反心亦已明矣史若直書其冤是暴君惡也從而書之曰反者爲君諱也故余讀書至此不禁廢卷長太息也雖然其矜功伐能禍實自取太史公謂信能謙恭遜讓持滿戒盈勲同上比伊呂血食後世斯言洵哉易曰勞謙君子有終吉故君子知天下之不可上也故下之知眾人之不可先也故後之溫恭慎德使人慕之執雌持下人莫逾之

淮陰不務此致身名俱隕惜乎余是以歎其不智也客起  
唯唯而退

張耳陳餘論上

張耳陳餘當時所謂賢者也。因暴秦之資，各有大志。一言投契，遂訂刎頸交。人且謂二子患難與其生死不渝矣。乃不旋踵，乘時爭權，遂成寇讎。勢不兩立，必甘心而後已。世人不求其心迹，判其曲直而并責之。卽史遷傳贊亦無所可否。余是以備而論之。當章邯王離圍趙於鉅鹿，兵數十萬，聲勢甚盛。陳餘本非傑出之才，以數萬烏合之眾軍其北，安敢輕嘗其鋒？卽使餘能奮身赴難，爲耳捐軀，徒死何益於趙？固不如堅壁相持，爲趙聲援，以俟鄰國兵至之爲得也。而耳乃數謂讓餘責以共死，豈情也哉？迨燕齊楚救

趙師至耳子敖亦將代眾陣於其側皆作壁上觀莫敢先發蓋邯本秦名將其眾復數倍於諸侯故敖以父子之親亦未敢妄探虎口何者以徒死無益故耳幸而項籍以楚師破邯軍趙圍始解耳不責其子之坐視輒復讓餘是以其子所不能而望於其友也此曲在耳餘以耳不諒已怒而遜印綬於耳非其本心也而耳惑於客言徑取而佩之并領其眾此又曲在耳楚滅秦分封諸侯耳王常山羽以餘未隨入關無功於楚僅封以三縣爵列侯位在耳下餘益怒然此乃羽爲政非耳沮之也怨羽不怨耳可也羽論功行賞非獨薄餘也并不怨羽可也而餘遷怨於耳矣假

師於齊襲破耳於常山矣且并其地矣使耳不能自脫殆不免矣此曲在餘耳因國破杖策歸漢漢二年高祖欲東擊楚求助於趙餘是時已王代而留身相趙因謂漢使者曰殺耳乃從漢知不可以口舌爭求似耳者殺之以示餘餘始發兵後覺耳不死復背漢是餘之心必甘心於耳而後已也此又曲在餘使高祖當日從餘之請耳早齎恨於地下矣原耳之過止於望餘奢而妄責之及聽客言不讓而受其印綬耳初無殺餘之心也而餘懷挾前卻旣滅其國復必欲寘之死不已甚乎泝水之報耳未足深責也餘自取之也史遷謂餘好儒術吾未之信也嗚呼二人者真

勿頸交哉

不說及之身老一

三

張耳陳餘論下

夫小人之交勢危則合利在則爭其始合者僞也欲樹黨也二人素有時譽秦購之急遂偕亡命爲里監門里吏以過笞餘餘欲起殺吏耳躡足使受笞吏去且怨之曰曩與公言何如今見小辱乃欲死一吏乎餘然之不以爲忤蓋是時在患難中前盟猶未寒也及鉅鹿之圍兩相尤怨此時二人之心始攜貳矣及耳受其符印其郤已成矣餘之殺機已伏於此矣迨餘襲常山且要漢殺耳耳之殺機亦伏於此矣使耳當讓符之時能自謝過而固反之交猶可合也卽不然因羽分封諸侯耳能力爲餘求王以謝前愆



則前卻亦可泯也常山之襲要漢之殺可以免也耳不爲此是爭利享恩也又使餘當讓符之後與耳共事如初怨懟不介於辭色若無其事者然則是非有在也南皮之封自揣無功不遷怒不修怨則始終可風也殺身之報斷不至是也而餘反之卒以修怨賈禍何其愚哉然餘事趙始終一節國存則輔之國亡則死之亦有足多者

存誠齋文集卷二

香山何曰愈子持氏著

男璿璿璿同校

讀蘇老泉上韓樞密書

宋太祖陳橋之役因將士黃袍加身而有天下故馭卒以恩寬仁以結之賞賚以悅之此一時之權宜耳非以爲不弊之法也嗣君不識此意未能潛易其失且奉爲故事當郊社之期賜予無算動以億萬計夫恩頻則惠褻若輩小人習以爲常既無感恩之心且以朝廷爲畏已其氣益恣以驕外而郡守連帥不能按內而京尹法司不能制何者惠褻故也老泉練達兵事目睹其弊故上韓樞密書諷其

斷斬立威可謂知矯弊救失者矣然當積罷之後病入膏肓非有術以潛移之則威未易立法未易行斷斬適足以速禍耳今有患癰於此投以解毒利導之劑使之內消者良醫也鍼砭攻伐者次也若掄剗挖割瘡雖去而命亦隨之矣當其始若輩非敢遽驕且悍也其致之者有漸矣非如宋太祖之受恩卽庸將撫馭乖方恩威不行仁厚者則狎昵市恩懦怯者則因循屈法悍將或藉彼眾以自重貪將或因侵削而姑容月漸歲漬遂成狂瀾之勢戢之道無他在恩威並用寬猛兼施而已承積威之後宜先恩而後威承積罷之後宜先威而後恩先恩而後威者古有之

越王句踐是也越自棲會稽而後當灰燼之餘爲鄰威所  
劫士氣不振民生凋敝故勾踐安老懷幼問傷弔死寬仁  
厚澤結以恩信及德澤既孚使不裁之以威譬如驕子不  
可用也故伐吳之役四徙而四斬越遂以霸先威而後恩  
者古有之鄭公孫僑是也鄭當七穆之際族盛寵汰侈僭  
無度世族之家恣於朝萑苻之盜橫於野罷敝已甚故國  
氏抑強鋤暴均伍田賦定制度鑄刑書峻法以懾之及威  
令既行使不濟以寬譬彼防川決溢可俟也故以養以教  
以矜以恤鄭賴以安夫兵卽民也故治國之道可通於治  
兵當宋委靡不振之際士卒驕橫立威之論宜矣然威行

必須繼之以恩且威其士卒不若威其將校蓋卒眾而將寡卒類皆市井亡命若恩威未行遽繩以法則眾怨眾怨則變起裨弁受天子爵祿頂冠而束帶廁身士大夫之列馬之受銜勒者也上下之分悉於中揖讓之儀嫻於外且其數寡即使桀鰲亦必不敢棄父母妻子含軀命軛萌畔逆之心故雖以法繩之必無蕭牆之患而上卒見吾繩其上者必曰彼貴者也治我者也法猶不貸况吾儕乎將莫不悚然而吾懼知其言懼也又於裨校卒伍中察其有微績及藝絕等倫凜遵法度者超擢而厚賚之婚喪不舉者賜卹之疾痛者藥餌之則眾又必欣然而吾愛矣始則畏

威而吾懼既則戴德而吾愛則嚴師而慈母兼之矣心烏  
敢貳於是廉其尤不法者嚴繩一二人其次則月更而歲  
易之去其大慙則餘者無能爲已吾又功賞罪罰必明必  
信親上知方必告必誠如是則驕悍之風移於無形卽使  
之蹈鋒刃赴水火惟吾所命其孰敢違豈徒怵威奉法已  
哉然而非有驚世駭俗之術也亦曰寬猛恩威而已矣



## 四宜亭記

涿州從事公廨之東舊有臺高出牆垣前從事盧君旭林建亭其上日久坍塌予仍其舊而修之原額曰一亭蔣魯珍刺史題也夫亭名雖各殊要皆有所取義其取義約略有四或紀一時之事功或寄一已之懷抱或慕前哲於已往或觸景物於當前如歐陽永叔之豐樂亭蘓子瞻之喜雨亭記事功也韓魏公之狎鷗亭張山人之放鶴亭寄懷抱也襄陽之浩然亭荊州之峴山亭慕前哲於已往也興國之滄浪亭大明之晚香亭觸景物於當前也一之爲名似取杜子美乾坤一草亭意耳無甚嘉義予因更其名曰



四宜暇則攜漢書晉帖茶盃詩筒養拙其中聊寄觀魚射  
鴨之興夫人苟有以自樂雖斗室蝸廬簞瓢甕牖未始不  
怡然自得不然雖華構連雲絲竹盈耳猶戚戚終日也斯  
亭雖茨覆竹欄無赭堊髹彤之飾雲棗藻梲之華與古之  
采霞沉香涵碧絳雪諸名亭雖綺質各殊然幽潔爽塏前  
聳碧山後臨綠沼左倚蕉簟右蔭梅柳嘉木紛披鳴禽迭  
和足以陶情適意者未嘗不同也春則煦日融和百卉競  
放嫣紅駭紫芬芳襲袂則於挈酒賞花爲宜夏則綠陰交  
錯草木條暢南窓寄傲好風徐來則於披襟納涼爲宜時  
屆秋也銀潢皎潔蟾光入戶於是攜綠綺奏賀若歌聲鳴

鳴若出金石則宜玩月鼓琴時屆冬也瑤雪初霽啟軒遠  
矚一望遶廓羣山如玉琢瓊砌於斯時也與二三友生掃  
雪烹茗分韻白戰賦黃竹煨紫芋則又宜圍爐看雪予因  
易今名并援筆記之後之登斯亭者當亦有感於予言



## 明興獻王大禮論上

明世宗以興獻王之子奉太后詔入繼大統世宗欲報罔極隆其所生上父母尊號蓋人子之至情也但本生國號不宜去耳當時廷臣楊廷和何孟春等二百三十二人跪左順門而號建議謂宜叔興獻而考孝宗然稽之經傳及漢唐以來典禮均無皇伯皇叔之稱蓋昧於大體之兩全之術也夫孝者五帝三王之所以治天下也孔子孟子所以立教垂法也使世宗如祖龍鄭莊不孝於其親則面斥廷爭雖如茅焦之死諫可也當時帝母章聖太后駕至通州聞稱號未定留不肯進世宗聞之涕泗橫頤啟慈聖太

后願自避位奉母歸藩嗚呼世宗不以天下忘其親可謂孝子矣此修齊之本也何非之有而議禮諸臣篤於小忠小義爭繼統繼嗣之文同聲附和豈以授天下之恩重生身父母之恩輕乎昔桃應問孟子曰舜爲天子皋陶爲士瞽瞍殺人將如之何蓋疑殺人者死天子之法也若寘而不問則天子之法亡問如律則父子之倫喪故有是問而孟子則曰舜竊負之而逃遵海濱而處終身欣然樂而忘天下是父母重而天下輕也雖桃應之問與茲不同然而輕天下重父母則一也今若以得位故而棄其父母豈不與聖人之道刺謬乎昔者堯舉祖宗之天下授舜而不顧

舜亦受之而不疑夫堯以祖宗之故物棄而與之異姓豈  
不絕祖宗之大統乎然稱大聖者莫如堯蓋堯以天下爲  
公器不以爲私恩所以爲至聖也議禮諸臣若知以天下  
爲公器援兄終弟及之義世宗入繼大統則考興獻未爲  
非也以天下爲私恩援爲人後者爲其父母報之文入繼  
孝宗亦未嘗不宜也張璁謂孝宗有武宗爲子強詞奪理  
也謂興獻止世宗一子世宗入繼則興獻之緒絕亦至情  
動人也然而主繼嗣者使孝宗有後而興獻無子則違人  
情主繼統者使興獻有子而孝宗無後則乖天理均一隅  
之見非大中之道也伯孝宗非也叔興獻亦非也王道本

乎人情人情洽則道斯在矣當時若考孝宗而父興獻崇以尊號曰本生皇父興獻帝本生皇母興獻太后立興獻廟歲時伏臘祀以帝禮以一子爲興獻孫使不至有子而無後則人情天理兼盡而繼統繼嗣之道均無虧矣此兩全之術也昔宋神宗無子養英宗於宮以爲子當時兩制官咸謂宜伯濮安懿王而中書省駁之歐陽公亦以稱皇伯爲違經棄禮欺天誣人無稽之臆說力詆其謬援引儀禮喪服記謂爲人後者爲其父母報報者齊衰期也服可降而名不可易又引唐開元宋開寶禮爲人後者爲其所生齊服不杖期皆無改稱之文且歷朝自藩邸入繼亦無

皇伯皇叔之稱且謂恩莫重於所生故父母之名不可改  
義莫重於所繼故可抑而降其服余謂雖聖人復生不易  
其言矣豈廷和等俱未讀是議耶抑以爲不足法耶夫神  
宗曾養英宗於宮中繼嗣之義已昭著天下歐公尙以濮  
安皇伯之稱爲違經棄禮欺天誣人而孝宗之於世宗曾  
無鞠育之恩緣武宗崩而無子奉太后旨令其入繼大統  
耳廷和等若悲孝宗緒絕援爲人後之義亦安得薄所生  
而叔興獻乎是陷君於不孝也自古豈有無父之天子乎  
豈有不孝而可以君臨萬國者乎漢宣起自民間始稱其  
父悼考曰親嗣復改稱皇考哀帝亦尊定陶爲恭皇漢儒



未有不非之者至立廟京師去定陶號平晏師丹輩始起而  
爭之干亂大統之說蓋指立廟京師亂昭穆之序及去定  
陶國號耳非論尊皇稱考之非也然余謂另立廟京師不  
在昭穆之列春秋時享專祭於其廟亦孝子不匱之義未  
爲失也崇禎辛丑夏四月九廟災而興獻廟歸然獨存蓋  
天亦許其立廟京師矣漢宋議禮諸臣有兩統二父之說  
已誤於前後人安可再誤乎且定陶濮安均漢宋子孫哀  
帝英宗以孫繼祖隆其所生非異姓比不得謂之干亂不  
得謂之兩統也繼父假父也禮尙斬衰三年義同生父父  
之昆弟本非父也亦有伯父叔父仲父季父之稱彼無父

之實猶以父名今定陶濮安興獻皆真父也有父之實反  
不得父名耶是親疏混淆也聖人之道當不若是此歐公  
所以有欺天誣人之譏也且生父降稱伯叔稽之經傳儀  
禮皆無其說此歐公所以有違經棄禮之譏也濮王之議  
司馬光主稱皇伯程明道謂宜稱皇伯父夫伯父卽伯也  
稱皇伯父與稱皇伯癸以異是猶以五十步笑百步也惜  
夫學術如溫公大儒如明道亦爲是論無怪廷和等之紛  
紛也



興獻王大禮論下

夫人心有所欲則其言私無所欲則其言公興獻議禮諸臣楊廷和何孟春秦金學姚夔毛紀喬等身爲大臣受孝武恩深其欲在報知遇豐熙謝賁余勦楊慎馬理黃待等爵不甚顯其欲在邀名故薄所生而隆所繼張璁桂萼廁身下寮其欲在於迎合干進陳洸豐坊緣事貶罷其欲在於復用故薄所繼而重所生其言各有所欲故均未合乎大公而豐坊請尊興獻爲皇考獻皇帝廟號稱宗嚴嵩請耐太廟陳洸請去本生二字尤爲諛佞考璁萼之議不過考興獻而伯孝宗及立廟京師耳而議禮者舍坊嵩洸而

重責璵萼所不可解者一也是時席書亦深是璵議楊一清亦謂張生之言聖人所不易而議禮者又舍書一清而專攻璵萼所不可解者二也方獻夫雖亦有考輿獻之論而疏初未上乃萼錄而奏之耳是獻夫無干進之意究與璵萼同議所不可解者三也考禮記祭法舜郊禘而祖顓頊夏郊禘而宗禹殷郊冥祖契而宗湯周郊稷祖文而宗武皆崇其所自出宗其功德之盛隆然皆易姓受命而後行之今世宗爲憲宗孫入繼大統非易姓受命者比安得以輿獻郊乎將置太祖於何地也於禮大謬禮有功德然後祖之宗之此所以示激勸其意深矣故殷太甲稱太宗

太戊稱中宗武丁稱高宗漢高帝創業垂統故尊爲高祖  
文帝德洽寰宇故尊爲太宗武帝功在四裔故尊爲世宗  
光武起自民間克復舊物故尊爲世祖後世法之是皆嘗  
君臨天下功德昭垂而後能然今興獻未嘗身居九五廟  
號稱宗既宗之則不得不列於太廟是誠紊亂昭穆大統  
也坊嵩之說誠邪說也而當時議禮諸臣不深罪之何也  
凡國家舉動載諸簡策必須斟酌盡善足爲後世法者然  
後可行若逞一己之臆見快一時之私意乖三代之禮制  
紊厯朝之典章非所以垂後世也斯雖坊嵩小人邪說欲  
干進固寵而然亦廷和諸君子有以激成之也使廷和等

當時揆人子之至情考孝宗而父興獻既不失繼統之義  
又不失孝子之心則世宗之意愜雖有邪說無由而起夫  
天下必有不及之說出然後有太過之論起而爭之鮮雖  
起於瑣孽而甚之者坊嵩洸也咎尤難辭矣而啟之者實  
廷和孟春諸君子也

書趙營平屯田第二奏後

屯田爲禦邊上策蓋變通古人寓兵於農之法也因兵以藝田因田以致穀因穀以生財因財以養士士卒無缺食之虞國家省供輸之費州郡免挽運之勞且奪敵人肥饒之地使其寄食他種我飽則彼饑我富則彼貧坐困敵人

之術也非營平宿將老謀練達邊事計不及此但議盡罷騎兵畱萬人屯田大費雖節奈敵騎何夫騎者軍中之武兵衝堅逐北之利器也故百騎走千人千騎走萬人尙父均戰法以步戰騎八人當一騎敵以萬騎來法須卒八萬以禦之今屯卒止萬人敵騎若大至將何以待之且西北



諸國皆用騎善馳突卽以中國之騎當之尙有不虞之慮  
况盡罷騎兵耶此善之未善者也若患騎兵費繁亦當留  
騎數千令與士卒雜作無事則植戈而耘有警亦足以護  
耕者且多數千人耕耨其所入亦足以贍其用卽或不贍  
截長補短以步卒贏餘濟之步以養騎騎以護步不亦計  
出萬全耶

## 趙普論

普歷相兩朝天下乂安四海帖然雖曰太祖英明天授具遠撫長駕之才動合機宜太宗復能任用張齊賢呂端蒙正諸賢明良喜起都俞一堂而然當太祖之世寰宇未定豪傑割據藩鎮專擅猶沿李唐及五代之風而杯酒釋兵柄始寘諸州通判事得專達以分節鎮之權遇藩鎮缺輒以文臣代之諸州郡稅賦悉輸入都獄囚奏聞而後定革專擅之弊泯僭竊之心解倒懸之急皆普謀也普亦能臣也然而學術不正奸回孤恩諂諛固寵瑜不掩瑕甚無足取普以起家書記受知太祖位極人臣獨掌綸扉其感遇

報恩當如何哉杜太后鑑周覆轍謂國有長君社稷之福  
此婦人一隅之見耳使太后預燭廷美德昭之飲恨而終  
必無是旨而太祖孝友天賦不忍拂慈母意故慨然以位  
禪太宗此唐虞後一人而已豈能復望於太宗哉普如不  
能逆料太宗之背約不過不智耳其過小及揣知太宗有  
私子之心因立儲之間遂有太祖已誤陛下豈宜再誤之  
諷是普早知太祖之禪爲失策不以悟太祖而悟太宗何  
其奸回孤恩哉且太祖升遐時德昭固已壯且賢矣非周  
之乳臭晉之惠帝比也普如果忠卽當面斥廷爭反覆數  
陳以回太后意則廷美德昭得令其終矣而普旣作誓書

於前抔土未乾卽逢惡於後秦王之死普實陷之是負太  
后太祖且負秦王魏王也且成太宗有背母兄殺弟姪之  
名也當普受顧命時知違太后旨位不可保及立儲之間  
逆太宗意位更不可保普自籌之熟矣故阿諛取容以固  
寵榮爾然而奸回孤恩矣難逃後世之誅矣普旣知讀論  
語論語中豈有教不忠不孝不弟之文哉楊用修謂宋多  
奸臣始於趙普言雖過激足見普已見誅於前人矣



## 張居正論

蘇子由謂天下有權臣有重臣論之當矣蓋二者心迹迥殊而行常相似以一身係天下安危凡有利於國家者獨斷獨行威震其主雖萬口騰謗而不顧者重臣也伊尹周公國僑霍光之倫是也以喜怒爲威福以從違爲愛憎獨斷獨行威震其主雖萬口騰謗而不顧者權臣也盧杞王安石蔡京賈似道之徒是也重臣以天下爲已任其志在於利國禍福死生不與焉權臣視天下爲奇貨其志在於遂私禍福死生亦不與焉故二者行常相似而心迹迥殊然亦有介乎權重之間者張居正秉政十年搢紳側目物

議沸騰卽後世士論亦多少之蓋以暴戾剛愎之性濟以嫉忌險狠之心仇視骨鯁故不容於當時難見諒於後世者此也迹其所爲始與馮保謀退高拱繼則謀殺之遂有梃擊之案非葛守禮朱希孝白一清楊博等先後疏救拱幾不免又以私怨廢遼陽王攘其第宅怒洪朝選不從已以殺遼王遂欲殺朝選嘗與御史劉臺有宿憾亦搆殺之吳中行趙用賢艾穆沈思考等以劾居正奪情皆杖戍言官余懋學傅應貞鄒元標張四維以言事皆相繼斥逐石星詹仰徽以直諒忤旨居正坐視不救朝端善類幾爲一空其擅威福陷忠直已不容於正人矣復信任奸邪諛佞

成風至疏稱元輔而不敢斥名人幾目爲勸進其不爲權  
奸者幾希然而請開經筵御門聽政進帝鑑圖說直講恆  
指陳大義時時規諫阻修兩宮以節財用罷南京織造以  
蘇民困請修累朝寶訓實錄四十餘則曰創業艱難曰勵  
精圖治曰敬天法祖曰保民曰親賢戒逸遊正宮闈去奸  
邪慎刑獄納諫重農何一非朝政大端又賑蘇松淮鳳災  
謂與其濫濟緇黃孰若予吾赤子當是時外患不興四海  
晏然其功業有不可泯者卽謂之重臣也可使其去暴戾  
恣睢之氣重公誼泯私怨登進賢良亦庶幾古大臣哉然  
其過若彼其功若此功終不蔽其過過亦不能掩其功殆



在權臣重臣之間乎至其卒後賈禍家貲籍沒奪官爵謚  
號昆弟子姪不合其終雖論者之過激亦居正有以自召  
之也士君子讀書委贄遭際得君如居正者未易一二數  
也而學術不純驕橫恣肆爲世大僇不亦惜夫

存誠齋文集卷三

香山何曰愈子持氏著

男璟同校

尊立論

夫國家上尊號立儲君鉅典也聖人制綱常定名分叙彝倫也夫以朝廷之鉅典兼彝倫所關豈不重且大歟其舉措當何如也元武宗舍子立弟仁宗爲皇太子明宗亦立弟文宗爲皇太子皆以其能攝國讓位也美則美矣然而父子兄弟之倫喪夫人所以異於禽獸者以有綱常彝倫耳君爲臣綱父爲子綱夫爲妻綱此三綱也天經地義也五帝三王之道也自天子以達於庶人今古共之父子兄

弟均天倫也然而尊卑有間矣禮父坐子立父前子名有君臣之義焉故禮稱父曰皇考尊之如君也兄弟之間雖有長幼之序然而侍坐肩隨有雁行之義焉故曰兄友弟恭言兄當視弟如友弟當敬兄以長也未聞兄爲弟綱也明乎不得與父子並論也武明之於仁文兄弟也以家禮論侍坐肩隨之義也以朝廷論臣之可也不得而子之也兄而子弟則弟必且父其兄寘父兄於何地也墮綱亂倫莫斯之甚如謂其能讓將遜之以國則兄終弟及亦古之義立爲太弟可也卽不立爲太弟亦可也何必太子而後可以傳國也宋太祖嘗遜位於太宗初不過爲開封尹繼

封爲晉王而已未聞有立爲太子之說明世宗繼武宗而登大位亦未嘗立爲太子何也防乎父子兄弟之倫三綱之義不可紊也可爲後世法也明景泰間英宗歸自沙漠居南內明史於每歲首書曰上皇在南宮蓋昉朱子唐書綱目帝在房陵之義也書法則是而稱謂則謬矣夫上皇者子爲天子尊父之稱也漢高祖登極尊太公爲太上皇後代因之明史雖缺太字然上皇之稱與太上皇何以異唐肅宗卽位靈武尊元宗爲上皇天帝朱子綱目亦祇稱爲上皇是太上皇上皇皆子尊父之稱景泰以弟稱兄安得輒加以上皇尊號耶至章綸疏竟稱英宗爲太上皇則

尤謬按唐堯嘗繼兄爲帝矣未有尊摯爲上皇之文宋太宗亦繼兄爲帝矣號太祖宋后曰開寶皇后亦無尊太祖爲上皇之說誠以綱常彝倫之間不可紊亂故耳明之尊元之立同一謬也或曰然則英宗將焉稱曰當稱其號曰正統讓皇帝

送葉司馬之越舊序

昔召公有甘棠之詩張堪有歧麥之頌班定襄有神明之稱袁臨安有佛子之號廉范則歌稱來暮何武則民懷去思讀書至此未嘗不掩卷嗟歎以爲數君子者苟非德澤漸漬何以能令士民歌詠盛德至於不忘使後之人誦其詩讀其書猶景仰不寘也葉雲塋司馬武林名下士也淹貫羣籍文章行誼爲名流所推許蔣礪堂潘芝軒兩相國尤禮重之故一時士林仰之若泰山喬嶽及出爲政長於治術所至有聲道光辛卯春由蒼溪宰拜會理州牧州爲西蜀邊徼舊稱難治司馬之刺是邦也甫下車卽興學校

布教化恤鰥寡鋤彊暴正已率物寬猛兼施期年而百廢俱興三稔成政其發奸摘伏明察如神故牧會理四年案無畱牘豪猾斂跡每朔望課諸生必親爲批點剖析經義亶亶不倦會邑文風爲之振蓋以人心風俗爲已任也邑處萬山中道路崎嶇民艱跋涉某以爲言司馬卽慨然任之與某首先捐俸召工開鑿命某董其役父老聞之輸將恐後萬夫雲集閱四月而工竣蜿蜒五十里悉成坦途癸巳夏五月治南大橋河溢漂沒田廬司馬捐錢三百緡命某賑恤存活甚眾甲午春大旱夏六月猶弗雨司馬與僚屬步禱烈日中甘霖立沛歲賴有秋是歲大府察才能薦

擢越嶲司馬越嶲古夜郎地也漢武開通西南夷始達中國自漢迄唐恆爲邊患故宋藝祖以玉斧畫大渡河曰外此吾不有也有明始內附設越嶲衛屬四川行都司

國朝改越嶲撫夷府寘通判治之地方八百餘里東界涼山北鄰邛笮南通爨犵西接西番猺夷數十種羊貪狼很常出剽掠壬辰冬土酋馬林叛煽誘洞蠻焚殺甚眾富林營遂成邱墟道光甲午

上命蜀帥桂涵討平之改通判爲同知偏裨以下咸受節制位益尊權益重而責任益難矣大府知司馬經濟才略露章力薦故有是命某聞之私爲



國家得人賀而會邑士庶聞司馬旌施將發攀留不獲於是扶老挈幼送者繼屬於道司馬亦戀戀不忍去有舉觴而前者曰我有父母賴侯安之我有子弟賴侯教之我侯既去誰與嗣之又有舉觴而進者曰曰雨而雨侯實雨之曰賜而賜侯實賜之千倉萬箱侯實賜之又曰我有家室婦子熙熙我有田疇麥穗兩歧君子至止惠我無私胡然去我民如失哺安得我侯永作父母晉此康爵敢爲侯壽某曉之曰先生抱不世之才懷匡濟之略焉能鬱鬱久居此土且與其一邑稱生佛孰若一郡稱生佛也與其一邑戴福星孰若一路戴福星也公此行將且爲

國家作柱石建保障勲諸君被甘棠之澤者正未有艾也  
取喜而退且屬某次其文而叙之異日采風者載諸循良  
傳中使後之牧是邇者必有觀感而繼公之政有人矣故  
樂爲之敘焉



擬綏邊策奏

臣聞涓涓不壅將爲江河兩葉不除將尋斧柯蓋患生於所忽事當弭乎未然今者西蜀越雋馬邊雷波戎邊四廳猺夷負固爲患連歲擾邊屠戮人民擄掠牲畜不可勝計十餘年來徵調頻仍軍書旁午驛騷內地以全蜀之力制之屢出無功徒勞師旅糜國帑而寇氛益熾近者空巢而出狼奔豕突無復畏憚者何哉非

國家小弱

天庾不供也又非鑿甲不堅戈劍不利也乃往者徒事姑息軍令不行賞罰失當眾不用命而將弁復乏制勝之術

狃於積習堅持懷柔之議謂賞賚可以已患因循將事使  
賊寇得以窺我虛實也且夷性貪殘以擄掠爲生計以焚  
殺爲能事小出則小獲大出則大獲而官軍以其地險性  
頑艱於進勦每從而撫綏厚賚之是一出而二利備焉彼  
胡爲而不出哉且出則得賞不出則不得賞是我適招其  
出也故今日賞明日跳踉矣今歲款明歲背叛矣夫懷柔  
者治安之梁肉也經也征誅者治安之藥石也權也梁肉  
可用於平時藥石則施於有疾若疾病方作不延廬扁而  
藥餌之反啖以梁肉未有不加劇者也茲之懷柔曷以異  
此曩者馬林之叛尸橫數十里守備某全軍覆沒雷波之

圍屢瀕於危士卒戰歿者數千轟轟山之役陣亡者數百  
輜械多爲所奪馬日岡之警焚叙以千計其積年殘殺者  
無慮二萬邊民肝腦塗地道路梗塞若不於此時大彰天  
討數十年後醜類生齒日蕃歲比不登饑民從而蟻附之  
則有明奢安之禍恐復見於今日臣實慮之然而議者必  
謂四廳地處邊隅癩癰之疾耳不治便議者又必謂邊患  
之生振古已然蠢茲小醜何足勞師動眾徒糜供億寘之  
便臣竊以爲不然詩云如彼雨雪先集維霰今之醜夷敢  
於攻城圍邑抗拒我師其亦詩之謂霰矣夫四廳之勢瘡  
也不及其毒未盛腫未甚而治之必將至於潰爛血肉淋

不言卷之三  
灘而後已縱不至於戕生而四肢百骸悉關痛癢日夕呻吟元氣爲之潛喪若或變而爲癰疽或他疾緣間而起則性命繫之其爲禍豈小哉臣願

皇帝陛下赫然震怒選將治師寬以歲月輕爵祿以勵將士嚴賞罰以立恩威又

命威重大臣視師督戰有不用命者殺無赦恩威既行將士必奮然後分兵深入據其險要燬其積聚奪其農時離其羽翼不過歲餘邊地可平腥羶可滌既平之後誅其巨憝貸其老弱投丁壯於四裔郡縣其地此一勞永逸之策也臣謹按西南夷自漢武帝朝始通中國自是恆爲蜀患

蜀漢時雍闓以越嶲牂牁益州永昌四郡叛酋長孟獲助之武鄉侯諸葛亮以爲非痛加懲創必患及腹心故不惜轉輸之費士卒之勞帥師十萬鑿山開道跋涉險阻深入不毛七擒七縱然後蠻夷輟服震懾天威邊境乂安者百有餘年至晉稍稍出擾王遜討之斂迹者亦百餘年唐德宗朝又肆侵掠韋臯撫牟尋通牂牁獠夷懼邊地復安有明又肆猖獗崇禎間命劉綎統重兵平之勒石紀功自是邊民得安枕而卧者將二百年此歷代征討之成效也至若治得其人亦可不煩師旅之勞昔魏尙守雲中匈奴不敢犯邊余靖撫桂林交趾不敢入寇范仲淹鎮延州則西



夏破膽朱燮元在貴陽則洞苗革面邊徼之理亂在得人與否耳

蒞下誠能

詔封疆大臣揆羅軼才破除資格遴賢能爲丞倅如其才可充是選者雖卑末之員巖穴之士卽起而任之重其威權厚其脩祿使無掣肘顧忌之虞室家凍餒之憂然後限以三年責其成功如其效則舉者與治者同遷如其不效則舉者與濫者同斥誠如是而邊徼不治夷氛不息未之有也伏念臣草茅下賤性復至愚朝無許史之援過懼邯山之積豈敢高談世事自貽斧鉞之誅但念切同仇且待

罪邊鄙十有餘年凡夷番之情爲山川之險隘得而洞悉之謹擬綏邊十二策干犯

天威冒死上陳不勝惶恐戰慄之至

一聯聲氣

孤則易折眾則難摧勢使然也峩越雷馬戎夷所以屢爲邊患者蓋四廳勢孤故也所謂孤者非漢弱而夷強也亦非夷眾而漢寡也乃邊民人心渙散勢分而不合戎夷得以肆其毒螫若使四廳之民聚族而居比屋而處雞犬相聞斥堠相屬雖猛如豺虎猶且避之况蠢類乎今使沿邊要隘處所五里一小堡十里一大堡大堡三百戶至四百

戶小堡一百戶至二百戶徙境內窮僻居民實之令各置火器矛盾以自守兵民相資軍威自振夫五里一堡聲息相通緩急足恃一堡有警以連珠五炮爲號鄰堡聞炮留其堡眾十之三以自守出其堡眾十之七以相援或斷其歸路或首尾夾擊如常山之蛇擊首則尾應擊尾則首應擊中則首尾俱應寇將安逃乎寇見我聲氣聯屬如手足之相救數敗之後必當革面洗心埋首巢穴不敢復出爲患矣

### 一練團勇

聲氣旣聯矣若不教以技藝擊刺之術譬驅市人而搏虎

非勝之道也孔子曰不教民戰是謂棄之昔李愬爲魏文侯守上郡下令曰有狐疑之訟者決以射中者勝否則負於是民皆習射及與秦戰大敗之宋种世衡在青澗亦教吏民射雖僧道婦女咸使習之每親閱以銀爲的中者與之已而中者多其銀輕重如故而的漸厚而小矣或徭役輕重亦使射中者得優處有過者亦然中者釋之由是人皆能射夏戎不敢犯范仲淹韓琦經略西夏夏人畏之有軍中有一韓西賊聞之心膽寒軍中有一范西賊聞之驚破膽之謠今考宋史不過立箭社耳宜變通其法城中建社四鄉鎮社各一村落后者則三五村共一社擇空閒地

爲射圃聘善射者一人爲社長武藝超羣者二人爲社副  
能書者一人爲社錄社長社副於三六日課之社錄紀其  
優劣一人技成教之十人十人技成教之百人百人技成  
教之千人千人技成教之三軍長者持矛戟短者操弓弩  
强者持旌旗勇者執金鼓弱者給廝役智者爲謀主每季  
農隙有司親詣各社較閱一次有發必命中武藝精熟者  
受上賞次者減之以藝之高下爲賞之等差其不能者罰  
以水如貧不能置弓矢者有司籌給凡遇鼠牙之訟一倂  
李种之法卽民間宴會賭酒擄蒲盧雉之戲亦令以射代  
又采武備全書州縣團練法訓以金鼓號令坐作進退之

節行之一年則民皆知戰民既知戰則民皆兵也無事則  
通力合作植戈而耕有警則披堅執銳守望相助利一兒  
徵調之煩利二節國帑之費利三省挽運之勞利四無遲  
誤之虞利五有此五利則團練實備邊之上策也

### 一明賞罰

賞罰者人主之大柄將帥之微權也若使無功而邀賞則  
小人懷倖進之心徒事奔競以爲夤緣可以致高位誰復  
肯舍軀命突鉅鋒爲

國家効死者有罪不罰則軍令不行鼓之不進金之不退  
必坐失事機債事莫大於此昔越伐吳凡三徙而斬十二

人故將士用命一戰而滅強吳楊素亦以此術佐隋高祖  
定天下漢來歙馮異每戰勝不自私輒奏賞有功上有所  
賜皆散之士卒故人樂爲之死宋岳飛自束髮從軍大小  
數百戰未嘗挫衄雖曰智勇絕倫亦由賞罰明也六韜曰  
賞罰明則士貪功素書曰善惡同則功臣倦又曰賞功不  
踰時則下力并賞貴小罰貴大賞小則恩下通罰大則威  
上行武經曰賞一人而三軍悅者功雖小人雖賤賞之罰  
一人而三軍震者爵雖尊位雖貴罰之若是則威立而令  
行無敵於天下矧公曆蠡類乎

一募勇敢

兵以勇敢勝以怯縮敗故一夫奮戈則百人辟易十人棄  
甲則萬眾崩奔凡用兵之道須選勇力絕倫敢死樂修者  
聚爲一軍曰陷陣之士有輕高易遠趨捷善走者聚爲一  
軍曰電掣之士有困窮發憤欲快其志者聚爲一軍曰虎  
賁之士結以恩信厚其廩祿以備衝鋒刼襲之用故句踐  
之君子楊慶之突將聞鼓聲則喜聞金聲則怒以此而戰  
何患無功

一輕爵祿

爵秩者

朝廷之所輕出諸其口而無窮性命者將士之所重一死



不可以復生苟上重其所輕而欲下輕其所重不亦難乎  
然而香餌之下必有死魚重賞之下必有勇夫若能輕五  
等之爵懸千金之賞則又何功不成何戰不克哉故漢高  
祖捐金行間而范增死裂土分封而項籍滅凡四廳將吏  
皆當厚其精祿使無內顧之憂如察其撫馭有方三歲無  
警則超遷不次卽賤隸僕夫有能斬將舉旗或出奇制勝  
者皆待以異數如是則頑廉懦立邊鄙不安夷氛不靖未  
之有也

一清邊界

疆界不分漢夷交接奸宄因之爲利此邊患所以不息也

欲塞其流孰若先絕其源當令畫界分疆植柱爲表下雷  
霆之令嚴交結之禁如漢夷有越境互市者殺毋赦或吏  
不及察能以越境告者賞誣則反坐

一豁耳目

夷性陰狡甚於鬼蜮其蜂屯蟻聚既有以備之矣至若數  
十爲羣潛出剽掠恆淪形於豐林叢薄之間如猫之伺鼠  
然覷行旅至近輒突起而邀之或暗施弧弩每出人之不  
及防故莫不驚惶失措爲其所擄若焚燔草木使一望無  
際則寇潛踪無所其眾寡虛實得以預悉而爲之防可禦  
禦之不敵則避之鼠輩將無所施其技矣

一清肘腋

君不密則失臣臣不密則失身機事不密則害成軍旅之事以秘爲寶苟先機一洩我兵未發而寇守禦已備矣我謀未行而寇險阻已據矣使其中更有能者必且反受其殃雖有精兵健馬利劒快戟奚益於用故事越嚮將弁向派熟夷以供樵牧灑掃之役此輩陽爲恭順而陰與野夷狼狽爲奸亟宜裁革以清肘腋之患卽不肖胥吏兵役亦多與寇結凡我有謀賊莫不預知故師出無功皆若輩爲之也胥吏兵役雖難裁汰而去故易新行之以漸嚴爲之防亦清肘腋之一道也

一勤巡徼

民所以養兵兵所以衛民今越衛弁卒狃於積習惟耽逸豫夫蓄猫所以捕鼠斷不以無鼠而蓄不捕之猫養卒所以捕寇斷不以無寇而蓄不捕之卒茲卒驕弁惰有警旣不能拔刀相援平時又不能先事預防徒糜

天儲殊非

國家設兵衛民之意宜令沿邊將校分番梭織巡徼旣可習其勤勞而賊寇知我戒備嚴密必不敢萌窺伺之心卽或竊發亦可隨時撲滅如有不任事者落兩職以觀後效能振刷者復之否則削籍

一任賢能

從來馭邊固賴有治術尤賴有治人術不自行得人而後行使有治術而無治人猶繫驂騮於空室而責其千里埋干將於豐城而欲其剗犀也苟得治人而行治術如使郢匠運斤無損傷之虞造父執轡無顛蹶之憂茲四廳夷寇出沒無常數十年來殆無安歲蓋不得治術與治人故也若能破格任人豈患乏才能之士乎惟在封疆大臣能任與否耳

一專事權

漢朝州郡兵統於太守刺史故易於有功唐宋亦然自明

建國始分而二之郡縣專理民事兵權屬武弁故遇事多所齟齬士卒亦桀驁難制宜令四廳防兵歸丞倅管轄假便宜以專事權守備以下咸使聽命焉使無掣肘然後責其成功

一足經費

夫長袖者善舞多財者善賈勢使然也四廳召募士兵團練鄉壯修築城堡添寘器械以及賞賚之費軍需之備均非徒手可能昔李牧鎮雁門五日一椎牛饗士寒者衣之饑者食之主計吏不問其出入故士爲之死得成不世之功今四廳每歲宜給邊費銀數千兩以備軍裝器械賞恤

硝磺之費俾得盡其長如虛糜

國帑地方不治者罪之至經始之際城堡營房所需不貲  
命估計酌給

存誠齋文集卷四

香山何曰愈子持氏著

男璵璵璵同校

孔子生考

世俗有以八月二十一爲孔子生者有以九月二十一爲孔子生者有以八月二十七爲孔子生者劉廣文以問余曰當孰從余曰按穀梁傳孔子生於周靈王二十年魯襄公二十一年巳酉冬十月庚子二十一日左傳林堯叟註則作魯襄公二十一年冬十一月庚子二說者年日同而月不同何休註則又作巳卯歲考周靈王二十一年乃魯襄公二十二年歲在庚戌則襄公二十一年乃巳酉非巳卯



也何註誤也家語云孔子三歲喪父而春秋二十二年秋七月辛酉叔老卒若然則孔子生又當在靈王十九魯襄二十年矣杜預於孔子卒下註云襄公二十二年生不詳月日五說者各有異同按綱鑑載孔子生於周靈王二十一年魯襄公二十二年庚戌冬十一月而不言日與杜註合而史記鑑略諸書皆同竹書紀年周靈王十五年歲次甲辰數至二十一年恰是庚戌是孔子生於周靈二十一年魯襄二十二年較爲可信何也史記綱鑑杜註鑑略四說若合符節也而庚戌之說又與竹書紀年暗合也穀梁林註亦誤也家語亦未可信也後之議者亦以爲襄公二

十一年日再食不應聖人生雖出臆說亦自有見蓋穀梁  
誤以靈王二十一爲魯襄二十一年林註則誤於穀梁耳至  
孔子生之日史記綱鑑諸書雖不載而穀梁林註皆以爲  
庚子似非無據但二十一日之說謬耳按魯襄二十二年  
不寅閏則十月二十七爲庚子何以知之是年十二月左  
氏書鄭游販如晉未出境遭逆婦者奪之丁巳其夫攻子  
明殺之以其妻行杜註十二月無丁巳乃十一月十四日  
也以十一月十四丁巳逆數至十月二十七爲庚子是庚  
子乃十月二十七穀梁謂二十一年庚子者誤也於史記綱  
鑑杜註鑑略諸書吾信其年於穀梁林註吾信其月及庚

子之說焉然周建子

國朝行夏時而建寅今之正月周之三月也今之八月周之十月也以八月二十七爲孔子生者是也謂八月二十一者宗穀梁之說也謂九月二十一者宗史記綱鑑林註諸說也皆非也姑書之以俟博覽君子採擇焉

答陳詔卿書

與詔卿足下別十有餘歲忽蒙賜書教督以奮發勉地功名殷勤甚厚僕雖不才敢不策勵以副厚望蓋長而無述汲汲以沒世君子是憂故功名事業志士所樂勉以垂不朽者也雖然人生際遇此中似有數存昔姜尚垂釣於渭濱傅說版築於傅巖甯戚飯牛於齊膠鬲漁鹽於市韓信寄食於亭長張良亡命於下邳管夷吾就囚郭子儀縲紲之數子者皆抱命世之才懷王佐之略未遇其時辱身降志而不顧甚且悼一飽之無時而安陵則以嬖倖而擅楚趙高則以刑餘而專權鄧通則賜銅山於漢文趙括則秉

斧鉞於趙國貴賤命也窮通時也烏在其奮發耶今僕曾  
無姜傅韓管之才得竊升斗之粟以資祿養亦已幸矣敢  
妄希前拔哉況當今

聖主御極賢才輔政治具畢張德洋恩普凡四海內外靡  
有遐邇罔不涵濡乎濊澤雖唐虞三代無以過此故休徵  
不應萬國從風雖有賢才無所用其救弊補偏之術豪傑  
無從施其推鋒闢土之功非如春秋戰國時羣雄角逐征  
伐頻仍士得展其末技也且僕亦嘗側聞君子之餘論矣  
君子樂天知命不以達而肆志不以窮而易操出則行其  
道處則善其身遺逸而不怨位卑而不辭故孔子嘗爲委

吏老聃爲柱史若夫淮陰恥連敖而宵遁龐士元小百里  
而曠職蓋見道之未真知命之未審也孔子曰用之則行  
舍之則藏又烏在其奮發耶至若走高門趨貴介卑躬矯  
嚙媼媼求容者又豈所以望於僕哉方當

都俞在上求賢孔亟凡巖穴之士靡不彈冠延佇願足下  
以道自重則僕幸甚



雲巖吉先生墓誌銘

先生姓吉氏諱景以字端選尹吉甫之後也世居丹待代有聞人祖某明永樂間起家里長成祖在燕邸時偉其狀貌薦擢邵武太守多惠政至十六世生曦曜誥授資政大夫曦曜生夢賚乾隆甲子舉於鄉任黟山教諭次夢熊登某科進士第累官通政使立朝敢言歿崇祀鄉賢次夢蘭仕終侍讀夢賚生禮庭癸酉舉明經卽先生王父也先生幼聰穎岐嶷絕俗頭角嶢然通政嘗謂所親曰此吾家千里駒也弱冠卽補博士弟子員受知於彭芸楣謝金圃先生名噪士林咸以著作才期之然屢躋名場遂絕意進取



性嗜書博通經史多所發明尤長於制藝家居講學名動公卿往來士大夫多禮於其間鄰郡學者及貴遊子弟聞先生高風負笈立雪不遠千里而來執經請業者戶外屢常滿先生設絳帳擁皋比爲之剖析講解抉隱探奧折衷漢晉唐宋諸家之說而執其中雖祁寒溽暑未嘗見其有倦容故多所造就凡經其指授者靡不饜心而去故受業於先生之門掇巍科登顯宦者後先輝映接武廟廊通政公再督學閩中知先生學養有素遂召致幕下故一時所得士稱極盛焉嘉慶甲戌丹陽歲凶邑宰欲勸賑知先生爲物望所歸必能集事遂造廬達意先生卽毅然請行策

杖徒跣至足蘭屨穿不以爲勞邑里富室巨賈聞先生履聲所至咸樂捐其餘甬浹旬得穀萬餘斛全活甚眾事大孺人以孝稱家不中貲然色奉志養甘旨常充以歲例貢成均選某邑訓導以母老不就太孺人歿以哀毀過情未半歲亦卒享年六十先生之卒也邑中賢士大夫耆舊諸生不期而會者千人以某年月日葬於某里之原門人私謚曰端肅著有練塘課草雲巖文集若干卷娶同邑貢氏全椒教諭名渭濱女例封孺人幼嫻姆訓通女識內則工帖括年十九歸先生事舅姑克盡孝道鄉里稱之設女塾訓兩子及諸弟皆成名先生得以肆力講學無內顧之憂

者皆孺人之力也年八十二始卒子二伯光輔國子學錄  
仲光字字仲暉歲貢生皆有時譽女三人長適同郡庠生  
沈氏次適太學生周氏次適趙佩之學使猶子某仲暉與  
余善先生卒後之四十六年余二子受業於仲暉之門仲  
暉告余曰先君子行純德脩宜有銘以垂後世茲敢以請  
愈再辭弗獲乃爲之銘曰

矯矯先生溫其如玉卞璞三獻傷哉刖足不爲廷珍乃韞  
諸櫝先生欣然如蘭在谷以誨以教以絃以讀嘯歌自得  
貧忘囁菽樂天知命仰事俯育鬱鬱佳城焦山之麓不有  
其躬嗣人是福

## 瀘水辯

武侯南征渡瀘水今人多指瀘州之瀘江按瀘州春秋戰國時爲巴國地東漢曰江陽有水曰汶江梁始改爲瀘州江曰瀘江豈是時已誤汶江爲瀘水故因以名州耶瀘州乃西蜀名區沃壤數百里山川秀麗泉甘而土腴周尹吉甫之故里也豈至蜀漢時反有惡水之患乎後世附會其事者又謂敘州有武侯塔傳爲侯誓蠻處何其謬也考三國志後主時雍閭以越嶲牂牁益州永昌四郡叛武侯由臨邛雅州踰邛邛邰涉大渡進討越嶲旬日可到若倍道兼程則七八日已臨其境使取道敘瀘則須五十餘日兵貴

神速侯用兵如神豈有舍間道而遠涉敘瀘者予遊蜀二十餘年爲會理從事者又十有餘年馬足所經幾徧蜀土越嶲道徃反者數矣所到輒求侯故蹟過大相嶺有侯廟在焉嶺卽邛邛山也土人因侯駐師於此故呼爲相嶺其南又有小相嶺故以大別之亦由召伯之甘棠牂牁之吳山思其人而旌之耳嶺高六十餘里延袤五百餘里九折坂下臨萬仞蓋天所以限南北也自司馬長卿開通西南夷始達中國唐書謂大渡之戍不守則全蜀騷動故蘇子瞻譏長卿通無用之夜郎徒苦父母之邦謂其不仁蓋南夷之爲患自長卿啟之踰大相嶺南六十里有洪流橫截

南北浩渺洶涌者卽大渡河也所謂瀘水者是也何以知之廣輿志載瀘水東有武侯城與土人之言合也今城址宛然尙存水深廣湍急夏秋時黃流漲溢怒濤翻空奔流激射尤爲險絕渡水而南行二百餘里卽今越嶲廳治崇山複嶺鳥道回折較棧道尤險又南二百餘里至寧遠卽古越嶲郡也孟獲城啞泉武侯過轍碑皆在焉其南三百餘里爲會理州自州至永昌纔兼旬耳州城西南數里有越魯山卽三擒孟獲處州人爲予言之甚詳予任事之明年偶過九蓮寺見銅鼓一四耳而束腰土繡斑駁質精而製古乃農民墾田掘土得之者以今尺度之高七寸五分

面廣一尺三寸五分足廣一尺三寸二分鼓面約紋十有五作雲雷聯珠蕉葉紋四圍乳三十有二約紋十有一亦作雲雷紋衡之重二十一斤厚兩錢許乃武侯所鑄也是則武侯征孟獲進兵越嶲之明證也瀘州之訛自梁始梁之訛蓋失於考據云

兵書峽記

世稱武侯兵書寶劍峽者凡三一在蜀之夔州夔有巫峽歸峽瞿唐峽古稱爲三峽綿亙七百餘里屹嶺峻山崇崖複嶂隱蔽天日非亭午宵中不見日月傳爲杜宇所鑿巫峽北峭壁萬仞距水面百丈許石罅中有木篋形方正寬廣尺餘其色黝然而完好如新余過其下舟子指謂余曰此武侯藏書劍物也人皆呼爲兵書寶劍峽余哂其妄一在楚之東安袁簡齋嘗有詩譏其謬一在常德置篋處乃一小石巖高廣可數尺上規下平類人工者然篋方長三尺有奇當巖之中距江面亦約數十丈皆非人跡所至咸



咄咄稱怪余意堯時洪水泛濫波浪滔空巫峽東安常德  
皆在萬山中山束江隘故水勢益高是篋殆當時被水居  
民所藏耳曷足怪乎不然武侯兵書寶劍何若是其多也  
獠獍所不能到而侯能到之益何其神也一爲之不已而  
又三爲之又何其好名若斯也侯必不爾也

陳一巖詩集序

余喜文學士所至輒物色之而又擇其操履端潔內外完好者而交焉從事建南旣締交楊養田吳桂亭王雪樵後十三年又得鹽源陳君一巖四君文章行誼均有本源能拔戟自成一隊鼎足而峙未肯相讓余並重之一巖爲人靜默寡言胸無渣滓慎舍納非其分雖一介而莫取與人交久而不渝見人不甚款曲訥訥若不能出諸其口然爲歌詩有敏捷才下筆如風雨驟至數百言立就壯歲舉於鄉三試禮部見黜於有司昔人謂詩人多窮而少達其洵然耶不然錦心繡口之士困頓風塵者何可勝數也以唐

人論之孟襄陽李長吉溫飛卿陸龜蒙王子安駱賓王諸  
子皆未掇一第卽李供奉杜拾遺王右丞柳柳州諸公雖  
仕而不顯轍軻終其身嗟乎斯言其洵然耶何一巖亦困  
於公車也然而一巖達者也乙未下第遂幡然歸曰丈夫  
生世舍功名事業詎無足傳者耶於是隱居牛山閉關講  
學益肆力於詩所著有某集若干卷北遊草若干卷凡千  
有餘篇蓋君屢躡邛邲太華嵩嶽太行之雲泛岷江渭水  
黃河漳江之波厯劍閣殽函虎牢之險覩關中燕都  
皇居之雄遊覽旣廣胷次益闊當馬蹄所至或懷古而興  
歌或登高而作賦或觸景而懷人或感遇而攄臆興之所

至輒援筆隨之日累月積遂成卷帙如是其富也君詩擷  
百家之菁華吸六籍之膏腴鐫劖萬類剝肝嘔心而行以  
宕逸之氣出以清靈之筆蓋俎豆李杜韓三家而時泛濫  
於陸務觀楊誠齋諸家之間可謂得所宗矣君詩自能傳  
固無待鄙言而交誼旣篤今於其歸牛山也不能自已於  
言輒弁數語於卷端以質海內君子



存誠齋文集卷五

香山何日愈之持氏著

男璩

璩同校

言邊事上寶相國書

近者喚吉利逞其狂悖以逆犯順再寇粵越復擾閩吳七  
郡縣淪陷肆其毒螫焚殺無厭海濱生靈受其塗炭號呼  
流徙天下驛驛罔有安處

朝廷震怒

命大將軍奮揚威武用彰

天討將士觀望不戰致逆夷久稽兩觀之誅每覽邸錄輒  
爲眦裂伏惟喚夷乃西北一小國耳豈有經天緯地之學

戰勝攻取之能不過恃其貲財行其黠詐以招致中國無業流民爲之羽翼故所在內應前者定海寧波餘姚鎮海上海寶山諸城相繼失守如以石投卵所向無堅城豈寇眾兵利智勇絕人力足以致此哉乃以漢攻漢耳中國守土將吏生逢昇平養望處優韜畧之書未讀戰守之策未究勵士之法未諳水陸器具之宜未備兵不聽令將不知兵故每至臨陣退縮不戰自潰夫以中國地土之大人民之眾智勇之廣當百倍於倭寇而數城不守者以才能之士皆潛踪草野下位之中守土者未稱其職故也前者朝廷雖屢下

綸音欲求豪傑之士而終無一至者何也以

朝廷素重科甲尚名位論資格此等人或不得志於場屋或恥於自獻或自負其能不屑小就故多隱伏巖穴待時而出或雖已仕位賤職卑乏景監之薦無由自達於

九重堂堂天朝果無人哉爲今日計

國家之亟務有六曰招賢能募死士重賞罰捐爵祿嚴紀律備戰具則

天威可振醜類可殲矣招致天下賢能莫若開軼羣絕倫科無論韋帶之士卑末之員有精孫吳之術及奇才異能者郡縣訪察舉而上薦令尅期赴都先試兵部然後



臨軒親策勿拘以文法其可者

召令廷對擇其尤者倣古行拜將禮畀以旄鉞之任次則參謀帷幄因其才而器使之結以恩信重其威權懸五等之封以待之如果實符其言卽超遷不次則天下守珍懷璞之士當必于于然彈冠投筆而至矣夫有非常之事然後有非常之人有非常之人然後有非常之功此漢高祖所以滅項籍而一天下也領將謀士旣得人矣若無勁旅以畀之難責成功某生長海濱頗識外夷情僞夷人別無長技惟習於水戰中國如廣東福建浙江等省非無水師但承平日久武備廢弛戰艦不修炮械未備雖有歲操大

閱之令皆視爲具文將情卒驟技藝生澀專閫大臣若滄  
効稍嚴怨聲四起以某所見兵額多以老弱充數遇大閱  
之期旋以餘丁代之事畢復故每遇徵符一下營員遴選  
士卒惶顧比及登程婦孺號涕故臨敵多有顧惜身家性  
命之心絕少修戈同仇之志是以所向無功此兵威所以  
不振也惟鄉勇素未受

國恩少加賞賚卽知感奮故廣東自用兵以來將及兩載  
徵兵二萬餘未聞有急

國家之難奮不顧身効死疆場者反多藉勢擄掠廣民受  
兵之害尤甚於夷寇讀廣民訴文可爲之流涕廣民以兵

不能禦寇而禍反甚於寇於是七鄉義勇持白梃執爰鋤振袂而起眾志成城遂四戰而四克連敗逆寇於白鷺潭斬其梟將伯麥困其渠帥義律於西炮臺賊尸橫野流血漂舟窮寇鼠竄羊城解嚴以是觀之鄉勇之勝於兵亦可見矣韓昌黎云徵兵滿萬不如召募一千蓋鄉勇生長是邦山川險夷素所熟習且自衛其鄉里父詔兄勉其出力當十倍於外調之師若能撫以殊恩餌以爵賞必能衝鋒鏑蹈白刃爲上効死與其徒靡 天庾而究無益於用孰若將軍餉徵調之資就近招募旣節沿途夫馬之費復一呼可至 某謂當令濱海各省懸重賞召募敢死之士以備

陸路又募海中壯勇漁丁以爲水軍漁丁生長波濤習知水性水中伎倆與夷寇同又募善泅者以備遣使水陸俱備腹背夾擊此萬全之策也且海濱窮民被賊蹂躪必至失業窮民失業室家凍餒無以自全而寇又誘之以重貲故多流爲漢奸我若輕貨財爵祿以招之彼豈肯舍父母妻孥淪身醜類爲賊用哉是我多一鄉勇則賊少一漢奸此策之至善者也水陸丁壯旣備若無術以馭之賞罰以勸懲之是烏合之眾未足恃也當明懸號令有功者重賞有罪者重刑賞必信罰必果則人莫不戴德畏威雖赴湯蹈火惟上所命矣古來名將未有不信賞罰而後能立功

者若有罪不罰有功不賞誰肯捐軀命出萬死入一生哉  
素書曰善惡同則功臣倦此之謂也賞罰雖明而才大者  
志亦大才小者志亦小使不滿其欲亦難期盡其長故絳  
灌之徒雖身經百戰位不過封侯何者漢高祖知其志小  
也以爲是可以滿其欲也若淮陰黥彭輩則捐齊越豫章  
而王之以爲非是則三人不爲我用也故曰香餌之下必  
有死魚重賞之下必有勇夫 朝廷誠能懸萬戶一封千  
金之賚則智者利其爵愚者貪其財有不戮力効死亦之  
有也紀律者用兵之政令也如梓人之有規矩非是不可  
以成方圓市肆之有量衡非是不足以昭畫一法曰治眾

如治寡分數是也行兵若無紀律金鼓不明進退無章旌旗散亂士卒驕橫雖有百萬之眾賁育之勇奚益於用主將之道務當三令五申教以坐作進退之法營陣變化之方親上死長之義嚴隊伍整旗幟絕喧譁禁擄掠有犯者殺無赦紀律旣明然後可以與之死與之生如身之使臂臂之使指無不如意矣器用者軍中之大命也孔子曰工欲善其事必先利其器藝事猶然况強敵在前社稷之安危三軍之死生係之乎八卦六花海鱗艨艟蜈蚣諸船劈山虎蹲佛郎機火礮火彈火罐牛皮帳唧筒皆水師之所必須擡炮擋牌強弓勁弩連環鎗拒馬槍天潢飛江環利

通索鐵蒺藜火牛火馬地雷此陸地之至要若火箭噴筒  
毒煙毬則水陸並利亟宜如法製造務須精良雖縻天  
帑亦不得已也至於攻守之具名目繁多此則責諸在事  
有司按圖預寘語曰要未雨而綢繆勿臨渴而掘井斯言  
雖小可以喻大若夫運籌制勝行無窮之變須當體察山  
川地勢臨事決機未可預擬某少事舉業見黜於有司因  
潛心孫吳之書古來言兵者百家爭鳴乃搜羅博綜窮其  
蘊奧自維祖宗以來食毛踐土涵濡

聖朝德澤者二百年每欲効犬馬致力疆場少建功業得  
名垂汗青庶幾上答

君父之恩下酬少壯之志不謂命蹇時乖沉淪末秩自道光五年得邀一命而待罪邊鄙者十有八年厯六考之班資悼一遷之無分今年屆半百兩鬢蒼然幸壯心之尙在或奮翼其有時如蒙垂聽卽祈轉奏或小有裨於軍國卽重獲譴呵非所顧惜倘蒙畀以馳驅之任誓當盡瘁矢石之間伏候鈞裁不勝悚慄待命之至



[illegible]

重修會理城垣記

堯舜之世以仁義爲城郭以禮樂爲樓櫓是時之民薰沐德化紀綱修彝倫敘四海於變萬邦協和內患不生外患不作故雖無城郭之恃而天下已固於金湯矣城池之制守禦之備自夏禹始而後世賴之非禹德不及堯舜殆時勢使然大禹因時制宜以爲民捍患耳及周道衰王室削外則四夷構難內則諸侯侵陵故始有朔方之築繼有東方之城至百雉之制益以雄峻以爲非此不足以禦侮也楚之攻宋智伯之攻趙微城郭之衛則宋盡南其畝而晉陽悉爲波臣矣或曰齊楚燕趙韓魏六國之城非不崇且

堅也池非不廣且深也卒爲秦滅者何也秦咸陽之城池  
非不更崇堅廣深於六國也而旋即爲沛公有者何也豈  
非以政教不修崇深者未足恃歟余曰斯言然也仁義者  
政之本樹之幹也城池者政之末樹之枝也爲政之道不  
可治末而廢本亦不可恃本而棄末有枝無幹固不可以  
言樹有幹無枝亦不得爲完樹也文事武備未可偏廢也  
是以後世城池之修未敢後也會邑地處邊徼

國朝康熙間始建州城屢圯屢修道光庚子城東西北三  
隅爲霖雨所傾工巨費繁權刺史事家明府壽泉履任之  
後三日週歷城垣余以修築爲言明府毅然曰是固刺史

事也世有以暫時綰符諉而不爲者或雖知其當爲卒畏而不肯爲者或慮物議因循而苟安者是皆不以國事爲事久遠爲慮者也余敢有所謝繼而思曰予五日京兆恐未能卒事也且需民財怨謗易起也余曰會邑雖偏小民頗急公且公賦其財者欲衛其財也勞其民者欲安其民也烏乎怨刺史於是召耆老而謀之咸輸將恐後不賦民而用自足不發丁而力有餘卽經始於是年十月之吉甃瓦木石之材約金錢三百餘萬計工一萬二千有奇萬杵雷動民不告勞甫半載而蕝事余謂刺史之不辭艱巨重國事民命也不愧民社之任者也士民輕貲樂輸急公墓

義也不負

朝廷德澤澍濡者也是皆不可泯也因記之以爲來者風焉

孝女廖盼傳

孝女廖盼者南海廖太翁某側室葉姬之女也少聰慧讀書過目成誦後母某媼授以女誡內則讀數過卽朗誦如流翁復爲剖析文義女曰女子之道當如是矣髮方覆額卽有至性事父及諸母克盡孝道鄉里訓閨閩每以女爲法及笄翁教以易數遂精管郭術占卜恆有奇驗翁媼由是益憐之世家名閥問名者履舄交錯於門翁欲得快婿未肯輕以字人葉疾劇女數禱於神願以身代而疾弗瘳女晨夕侍湯藥卧不貼席衣不解帶者十閱月亡何葉疾革女誓以身殉潛市鴆藏之家人不知也及葉歿女哀毀

不食一慟幾絕翁媼慰之曰死者不可復生若何自苦乃爾而女痛母死志卒不回遂乘間仰藥翁媼覺而救之女曰兒不孝不能終事阿父阿母報罔極恩然諸兄若姊在足以侍晨昏承色笑兒母孤魂孰與承歡兒將追侍於地下矣願無以兒爲念也言訖而逝當是時搢紳先生及鄉里戚黨無貴賤少長莫不高女之孝而哀其志云

贊曰余每讀曹娥碑輒爲歔歔嗟悼潛然出涕以爲一弱女子曰不覩聖賢經傳之訓心不期後世嘉褒之譽沿江七日作秦庭之哭投身洪濤卒抱父屍而出非其精誠動天則盱不果江魚之腹哉茲孝女廖盼生旣不愧女箴及

痛其母沒慨然以身殉雖其佩服於女誠孝經者深蓋亦  
天性純孝使然也觀其臨終數語何其就義從容所謂殺  
身成仁者非歟當與曹娥並傳不朽矣





交說

地有五行金水木火土是也而土恆彌縫於四者之間德有五常仁義禮智信是也而信恆彌縫於四者之間何以知之春爲木主仁夏爲火主義秋爲金主禮冬爲水主智土主信無所專屬而運行於四時之季是以知之人有五倫君臣父子兄弟夫婦朋友是也而朋友恆彌縫於四者之間何以知之君臣父子兄弟夫婦之情或障塞而不通朋友能通之或離間而不合朋友能合之是以知之然則朋友者濟四倫之所不及者也故列五倫而並重伐木之章曰相彼鳥矣猶求友聲矧伊人矣不求友生詩人已詠

之矣自古及今有無兄弟夫婦之人斷無無君臣父子之人亦斷無無朋友之人無無朋友之人卽無不交朋友之人然而人之品不齊所交之道亦不齊夫以道德相摩仁義相勵有善則極辭褒嘉使益進乎善有過則正色規諷使無貳其過以聖賢期其身亦以聖賢望於人苟際時變則託妻寄孤質諸鬼神而無愧義之所在抹危拯顛輕身家而不顧此道義之交賢者以之交以道接以禮不念舊怨不苟然諾困窘相卹疾痛相關窮達一致貧富不移雖起死者於九泉此心可掬以相示此生死之交君子以之惻惻無華肝腸如鐵言質而直不爲容悅平居若庸庸無

奇然言行出乎血性其感遇報恩樽前一諾則身爲知己  
用雖蹈刃赴火剗腹碎身慨然不辭其所爲雖未盡合乎  
道然其行足以駭世愧俗使千載負心之倫聞之而顏赭  
此肝膽之交烈士以之若夫以名譽相慕悅以才華相馳  
騁投李報瓊刻燭擊鉢覽勝懷古文酒娛歡促膝班荆忘  
形爾汝雖未能指困相濟亦斷不至雲雨翻覆鬼蜮含沙  
凶終隙末此則騷人墨客交以文字者也其或誼屬同舟  
邂逅萍水命駕懷刺編紵往還時則難黍相餉迭爲主賓  
但道或不同意氣未孚情契未洽雖晏晏言笑而對面不  
啻河山寒暄盡屬虛文贈答亦多情僞斯乃庸夫俗子交

之泛泛者也至於市道之交利競錐刀較及毫芒視饋遺之隆殺爲報施之厚薄等商賈之互販視仁義爲弁髦友誼淪喪可慨也已更有勢利之交利盡則交疎勢傾則情移彼此反面若不相識或爵位相埒則競寵爭權每至媒孽般疣排擠傾陷甚且掩蓋下石不遺餘力故致刺於谷風興嗟乎河上吁可悲哉此翟廷尉所以有死生貴賤之慨朱公叔所以有絕交之論也乎然余謂二子皆矯世過激之辭非吾儒躬自厚之道也昔鄭使子濯孺子侵衛庚公之斯追之孺子始曰吾死繼曰吾生蓋以已所與者知之也卒如其所料焉夫琥珀拾芥磁石引針使我而賢則

所與者必賢而賢者自以類至使我而不肖則所與者必  
不肖而不肖者亦以類至人當自患不能省躬克己嚴自  
糾繩使身入於聖賢之域及不能善其擇耳世豈乏賢人  
君子哉故孟子謂逢蒙殺羿羿惡得無罪蓋責其不能如  
子濯孺子之擇交耳此聖人反已之道也焉可盡責諸人  
哉



游崖子寺記

寺在會理州治西北十里地偏途險游人罕至己丑孟冬  
余偕劉雙橋樊仙槎二子聯騎而往初三四里路猶坦夷  
至六七里則踰山越澗亂石犖堦側徑歲襲征馬屢蹶又  
里許草木覲髣忽迷所往迺呼樵者導而進時雖初冬適  
日妍風鈍氣候猶不甚寒於是緩轡徐行遙望紅葉滿山  
高下基布如綺綰繡錯然林中山鳥鉤輈更唱迭和又數  
十步溪流參差濺滴吞道間作潺湲聲幽韻鏗鏘如鳴琴  
筑又三四里寺已在望山益高路益峻遂舍騎步行雙足  
蹣跚迺行援引而登凡十餘憩息始至山半有涼亭一



亭左卉木蕪雜陰翳輻輳微風時來韻動巖谷亭右列長  
松六直幹干霄大者高十餘丈挺然特出黛色如染小者  
亦六七丈峭然角立如張翠蓋圍皆合抱枝葉毵毵秀色  
可愛因與二子坐綠陰下撫翫久之復賈勇而上不數百  
步遂至寺寺依巖結構危巖屣屣如厂若剖甑甗之半寺  
藏其中舍宇雖不甚華敞然凭欄遼望蒼莽空曠雲煙開  
闔頃刻異狀羣山雜遝如朝如揖如駛如伏如赴鬬如拱  
立如偃僂如箕踞皆効技於几席之間俯瞰遠水潏洄若  
鋪疋練極目南眺城郭隱隱可辨余與二子顧而樂之遂  
把酒斟酌怡然忘返少焉紅日西傾白雲歸岫煙霧迷離

倦鳥投林暝色蒼然自遠而至乃整驂言旋雙橋賦詩紀  
勝余旣和之復援筆爲之記

[illegible]

# 易號說

子持子垂頭矮屋食貧居賤二十有二載始而恬然既而  
赧然年逾不惑二毛已生常抱郎署之歎曩號曰雲谷因  
自尤其號曰夫雲觸石而出膚寸而合固霖雨之資也然  
第徘徊於幽谷之間與芝蘭而並處偕木石而爲伍安望  
其不崇朝而澤及天下乎客曰胡不易谷爲墅曰別業也  
隱淪之所棲善其身矣烏用是客曰其易墅爲畦曰菜圃  
也或曰十二畝也或曰五十畝也所及者隘也客又曰其  
在臯與畬乎曰臯岸也澤坎也所及者仍不普也畬二歲  
田也仍有町畦也客曰大哉志乎無已其野乎曰廣矣普

矣美則美矣猶未善也夫九畹之田極於宇內君子窮則  
獨善其身達則兼善天下故范文正先天下之憂而憂後  
天下之樂而樂余雖不敏請從事斯語矣因易號曰雲畹  
又從爲之說以文其陋

存誠齋文集卷六

香山何曰愈子持氏著

男環璵同校

遊白雲寺記

予嘗讀王凝齋秋燈叢話言建昌某寺寺中石壁有穴二  
一出米一出油僧徒無眾寡適供一日之用無餘亦無歉  
後主者欲因緣爲利鑿而大之油米頓竭予聞之欲得一  
觀其勝然以蜀道險遙無因而至道光乙未予授會理法  
曹會理固建昌屬邑也竊喜前願可酬及抵州終未暇一  
往也明年夏以事過白雲寺適烈日燒空炎威灼體馬煩  
人殆喜其幽閑遂憩焉寺依山傍崖林木蓊鬱西向正殿

一上傑閣兩層迴環星日南北翼以兩廊殿前一池繚以石欄方廣可數丈漣漪澄澈深二尺許水中藻荇交橫中有金鯽數百頭出沒藻荇間投以餌則羣紛聚噉以手揮之則悠然而逝南廊之南有小園園東石壁峭立修竹千竿嘉木美箭蒙茸搖曳有泉東南來汨汨沿崖腳鳴清鑑毫芒因臨流趺坐以手掬而飲之甘芳郁冽寒沁心脾神氣爲之清曠兩腋間覺習習風生不復知天時之爲溽暑也出南廊繞池而東北蒼崖插天怪石林立苔蘚斑斕磴道迴折乃猱緣而登可丈許石壁中有穴二大僅容指其一下彷彿有漏痕僧指穴謂予曰此勝蹟也前朝時二穴

嘗出米油以供僧眾僧無託鉢之勞後以焚故鑿之油米  
遂不復出予因憶秋燈叢話所載與僧言符始知疇昔欲  
得一覽其勝者茲已身至其地誠非偶然也然細觀二穴  
殆無斧鑿痕以是知書誌所載及世俗傳聞多以耳爲目  
文人好奇又從而附會之以聳觀聽若非身歷其境不爲  
古人所欺者幾希矣或曰二穴在建昌城東之瀘山二說  
未知孰是姑並誌之以俟異日登覽焉





許由洗耳說

高士傳有云堯讓天下於許由由逃而洗耳此隱者誣堯以自高之說耳夫九五之位何位也治平之事何事也堯雖有讓賢之志然以舜之大聖交薦於四岳堯曰我其試哉始館之貳室厯試三十載至五典從百揆叙賓四門而萬國悅際天變而不改其常始薦於天而授之以位何其慎且重也蓋以天子者九州之大父母四海所環待仰以爲命者也得其人則寰宇蒙其福非其人則寰宇受其禍故不敢不慎也使由居其位雖無禍天下之事亦必非治天下之才堯豈以其能外名利淡嗜欲卽以治平之才許

之遽以天下之重讓之耶必無是事也乃隱者之流作爲  
侈言誇說誣堯以自高耳事不見於經傳烏足信哉

答陳介人書

介人足下九月二日書來知權晏州適值軍興過境獨上  
避債之臺某聞之甚喜以爲此佳消息也官貧民必安矣  
敢爲晏州士庶賀至以逋負爲憂竊以爲足下過慮足下  
平日抱負何如爲參軍時矮屋簷下隨流逐隊居恆鬱鬱  
蓋以位卑權輕不得展平生所學耳今得宰百里社稷人  
民具在足以有所建白土元雖非百里才然未始不可少  
展驥足愚謂足下所當憂者政令未修教化未行風俗未  
厚黎庶未安耳至於貧奚憂焉且足下素以耿介自命作  
吏三十餘年敝車羸馬布衣蔬食有寒士所不堪者足下

處之晏如某方祖語曰當今狂瀾莫挽之際陳君介然中立不趨勢不啗利所謂學道之君子者非耶微斯人吾誰與歸蓋傾心足下者久矣若茲云云者豈信道不篤歟抑樂官卑而責輕也某甚不解也願足下勉爲之以慰故人之望幸甚承詢近狀未足爲知已告某倔强成性所負者氣節所安者天命運雖蹇滯砥礪益堅果其遇合有時固不辜夙昔之志如其不然將歸落霞之麓結旋馬之廬布衣幅巾與世無求樵山漁水足以自樂閉戶著書足以自娛時或竹帽襍鞋二三野老攜斗酒坐綠陰占蒲卜杏問雨課晴當酒酣耳熱援筆而賦以歌詠太平爲唐虞逸民

未始爲失計也韓退之述李愿之言謂利澤施勲業建內  
則論道廟廊外則秉鉞抗旄此遇時者所爲也窮居閒處  
胸次超然理亂黜陟不知不聞此不遇時者所爲也二者  
將必有得焉足下其許之乎愈謹白



王雪樵詩集序

西蜀詩派陳伯玉倡其先而李青蓮以絕世之才崛起而繼之遂爲風雅宗工厥後蘇子瞻文與可陳希元楊升菴諸君子復後先輝映代有偉人

國朝則李雨村張船山亦稱一時之傑吁足盛矣余生也晚不及與雨村船山二公樽酒促膝常欲得如雨村船山者而交之卒未可得道光乙酉余授會理長史捧檄南來見邛邛峩峩然而雄峻小嶺挺然而森秀謂必有瑰奇磊落之士生於其間庶幾旦暮遇之及下車聞雪樵王君名因往訪焉見其襟懷朗徹倜儻不羈志節行誼落落有古人



風不覺爲之傾倒亟欲一觀其所作而雪樵不肯輕以示人時或見其一斑終以未闕全豹爲憾後十五年始出其拾餘集四卷凡三百餘篇語必求新不肯拾人牙慧而豪放逸宕之氣咄咄逼人方諸張李殆未肯多讓而抑鬱無聊之思一寄於詩蓋懷才不遇屢躋名場文章憎命古今同慨亦可哀也已造物不使雪樵遭際風雲登金馬步玉堂揚厲

國家二百年無前之盛烈而徒使老於山陬水涯春風秋月自鳴其不平何耶或將使動心忍性老其才而後用耶抑河魴熊蹯二者不可得兼耶然與其擁朱蓋駕駟馬弓

刀塞路衢粉黛物後庭狗馬玩好厭於目絲竹歌瑄厭於  
耳及其同歸於盡名隨身滅孰與優遊巖壑閉戶著書文  
采彰於時清聲垂於後之爲得也司馬子長謂屈原放逐  
爰著離騷左邱失明厥有國語斯言尤信今雪樵年逮騎  
省而著作已自炳炳將來雨村船山當爲雪樵分一席也



## 圉人說

圉人某牧馬以自給凡其所牧輒博碩茁遂故其索值數倍稍靳則掉臂而之他或叩其術曰吾惟遂其生樂其性別其才均其力而已無他術也暑吾以時浴之寒吾以時燠之勞吾息之佚吾役之才吾優之劣吾斥之饑吾秣之渴吾飲之又等其才力而裒益之夫鼯鼠飲河不過一勺巴蛇吞象始覺充腹馬之駿者其食或兼其常或數倍其常吾則益其芻豆如其量而與之及其使之也駿者責以千里駑者責以百里察其才而使之不責難不窮力是以吾馬博碩茁遂各効其能者遂其生樂其性別其才均其

力故也若不辨其優劣而差等其芻豆則良者羸瘠而不能展其長駑者痞滿而致疾矣不遠近其任則良者未竟其用必且踣齧哮嘶跼促櫪下矣劣者弗勝其任則必蹶蹶顛踣僵仆道途甚且人亦有折臂斷足碎體喪生之患矣夫馬固有能否養之用之之道亦有異同在察其微情而已或曰養之用之之道旣聞命矣其駑劣奚從而別之耶曰善哉問乎世有伯樂而後良馬出良馬不恆得而伯樂尤不易得夫馬之駿者其骨相意氣步驟飲噉自與常殊吾更馳而試之其任重若輕赴遠若近風馳電逝移晷百里而神氣自若者駿足也舉足重滯數十里則息喘汗

注或蹶或逸此劣騎也至於皮毛則無以異也夫綠騄白  
渠飛兔駁象騶裏駒駼乘黃馱騄其行則超景遺風奔霄  
逐電然而兩耳而四蹄柔鬣而修尾固猶乎馬也非必虎  
文鹿角麟臆鳳膺而後爲駿物也使按圖而索求之於皮  
毛之間幾何其不委頓於鹽車之下哉何子曰吁吾於圉  
人而得知人任人之道焉



## 甘瘋子傳

甘瘋子江蘇上元人逸其名有神勇力能鬪虎踰高絕遠捷疾如飛淡嗜欲不事家人生產遨遊名山足跡半天下性任俠道遇不平輒爲人排難解紛故人以瘋子名之嘗遊報國寺坦卧簷際適故人至瘋子佯寐不與語故人倦亦鼾睡柱下瘋子乃以右手抱柱起鎖髮其中遂出少頃卧者醒不能轉側曰必甘瘋子所爲也日且晡瘋子始至故人詈曰何惡作劇亟出我瘋子仍以手挾柱殿屋皆震故人乃得起而瘋子色自若見者皆驚遊黃山喜其幽邃雖人跡所不至肆意冥搜必窮厯乃已至蓮花峰峰高數



丈四面陡削如壁上平如砥瘋子遂飛身登其顛見梵宇  
一區類落成者瘋子喜以爲斯峰猿狖所不到必非人居  
自詫爲武陵之遇遂整衣入殿宇雖不甚華藻而幽敞精  
潔花木蕭騷鳥聲上下落英糝徑草碧無塵迥異人世步  
至禪房見牀帳几案陳設煥爛頗怪之乃偃息榻上見帳  
隅懸小木魚一戲擊之俄聞門聲呀然二麗人自屋後出  
修眉皓齒霧鬢雲鬟見瘋子驚顧錯愕卻行欲避瘋子趨  
前揖曰某東西南北之人不意唐突幸示迷途二女曰君  
何人烏得至此具告之女曰余本良家子被惡僧擄至此  
同難十餘人皆幽閉窟室中已數年矣不能自脫故強顏

偷生憫君孤旅宜速行遲則齋粉矣瘋子詰其故女曰賊  
脅力絕倫猛獸不敢近朝出暮歸上下如隼行且至矣君  
宜速行瘋子哂曰某雖驚若欲歸請爲若除之女曰君得  
毋誇乎倘能相救是起死而肉骨也雖然事若不濟是禍  
君也曰若無我慮賊往來徑路若爲我告之某自能辦女  
乃引瘋子出指峭崿曰賊往來皆道此君當慎之勿視爲  
等閒也遂退瘋子乃翳身叢薄間凝神以俟少焉紅日銜  
山杳無踪兆潛探首下視遙見一人緣溪而來行且近諦  
視之僧也熊腰虎體軀幹修偉背負一囊步履如飛及崕  
下乃緊帶撩衣聳身而上瘋子出其不意騰足踢其胷僧

顛略一喘息乃解其囊復覓勇而登立未定瘋子又飛足蹴之僧以手力格僧顛而瘋子亦仆有頃瘋子起僧亦抖擻躍上瘋子俟其甫登竭力踹之僧兩手握其足二人遂俱墜崖下僧傷已重而互相挽結猶獸鬪山足瘋子墜時幸僧爲之墊傷稍輕乃乘間擊其要害僧瞋目曰某稱雄數十年未逢其敵今遇子命也乃三躍而卒瘋子復躍而上爲女賀曰幸不辱命賊已斃矣於是盡出窟中女子燔其舍宇縋諸女子下訊其里居一一送之歸自茲瘋子之名益震至嶺南有巨室某富甲一郡劇盜數十輩謀往劫之瘋子適至微聞其事漏初下乃先登巨室屋隱身潛伏

夜未半忽聞門外人馬沸騰火光竟天巨室舉家驚惶不知所措瘋子知盜已至屏息俟之少焉有盜飛立屋簷瘋子殲之繼至者十餘輩皆擊墜庭中羣盜見屋內寂然無敢復登天將曙羣盜相謂曰入者吉凶未卜孰往探之一盜應聲起倏登牆際見先登者尸相枕藉仰見一人踞坐樓脊知爲異人哀之曰某等唐突自貽伊戚自茲已往不復相犯矣瘋子曰若知悔且舍若羣盜遂鼠竄東方旣明瘋子乃下巨室跽謝曰與君素昧生平忽蒙高義拯某於厄敢以家貲之半爲謝瘋子不答拂衣而行巨室挽之曰君義士也旣不受謝而死者纍纍奈何瘋子曰來偕詣邑

宰白其事遂飄然而去其排難解紛多類此嘗乘驢渡河水深沒腹驢不能涉乃褰裳挾驢而過其子某亦有父風瘋子慮其及於禍一日召子至以手撫其頂背遂僂子跪泣請教瘋子曰與其勇而危孰若無勇而安今若體雖殘禍其免矣後年八十餘而卒或曰瘋子本儒生曾登進士第任某邑令緣事賜帛東市夜半而甦遂匿其名隱於黃冠云

會理建文埭記

術家地理之說經傳所不載聖人所不道然周公營洛邑乃卜澗水東瀍水西此地理所由濫觴歟或謂八宅之說始於黃帝暨於周公或曰黃石授書三卷於子房上卷言天中卷言人下卷言地八宅卽地道之書後世無傳焉惟存乾六天五八句元空裝卦四句而已餘皆後人所作後世則盛傳青烏之術然書亦罕邁楊筠松賴布衣之徒出各著書立說其道遂盛行於是言天星地神五行八卦者紛然聚訟曰某者爲八煞九星某者爲三吉六秀某者爲生剋制化某者爲東西動靜曰六十四卦曰二十四山向

曰抽爻換象曰穿宮催官曰砂水曰理氣名目繁碎旨趣  
閎深不可淺窺而大要總不外五行八卦五行八卦之義  
實本於河圖洛書庖犧因而畫卦作易文王復演爲後天  
作彖辭周公作爻辭孔子著十翼其理奧而神然皆言趨  
吉避凶未及五行五行之說豈始於黃帝八宅耶抑黃石  
地篇耶不得而考矣然庖犧氏以木德王神農氏以土德  
王已見於古籍是則五行之說已在黃帝前矣余初不信  
術家言以爲荒誕無稽嗣稍稍涉獵其書並驗之人事多  
若合符節卽一花一木吉凶皆應如影響朱晦菴大儒也  
亦嘗論中國大勢關中形勝矣其仕閩時嘗視訟者所爭

地曰此地不發是無地理此地若發是無天理是晦菴已  
篤信其說矣余從事會理有年閒閱州乘歷代登臚仕者  
惟有明三百餘載始得一劉瓚仕至雲南左布政耳我  
朝振興文教右文崇學州屬好古窮經之士頗不乏人然  
登通籍者無聞焉心竊怪之因徧覽山川俯察形勢卒多  
缺陷此科甲所以不振耶吉薌畦刺史牧會理時嘗與余  
倡建巽方文塲之議耆老疑信相半適薌畦刺史引疾歸  
事遂中寢道光庚子州城東西爲暴雨所圯會家壽泉明  
府權刺史事與余釁金修城次年工竣頗存贏餘余因復  
倡建塲之議邑中紳耆等皆篤信余說壽泉刺史因令孝



廉鄒秉鈞康正榜二君董其役遂於是歲孟秋之吉陶甃  
鳩工於某年月落成塼基廣二丈四尺高七丈六尺有奇  
文峰巍然聳立雲表行看人文蔚起科甲雲仍佩金魚步  
玉堂爲

國家作柱礎余將企而俟之鄒君喜其訖工問敘於余余  
亦欣前願之能酬爰書數語俾勒貞珉且爲州人慶焉

募建掩骼社引

天地間之最可憐者四曰鰥寡孤獨故仁人在上養老之外於是四者尤殷殷加意焉誠以四者世間之窮民疾苦自諳飢寒誰語非長民者痾瘝在抱隨時體察矜之恤之何以濟天地所不及而上答

朝廷設官牧民之意哉我

朝天下郡縣悉設立養濟院所以加惠窮黎者亦至矣然而四者生固可矜及其歿後或荒塋無主爲狐狸窟宅或殘骸暴露快狼犬之齒牙不尤可憫乎昔西伯行於野見枯骨命吏瘞之吏曰無主矣曰吾卽若主也遂葬以衣

衮夫有天下者主天下有一國者主一國卽守一郡令一  
邑亦郡邑之主也周時特設掩骼之官後世則無端吏蓋  
責在有司矣會邑提封千里四方流亡所聚某自道光已  
酉佐理茲土領事後巡視郊原見荒塚纍纍半已傾頽白  
骨磷磷每多狼籍諒皆鰥寡孤獨之塋而牛羊樵牧又從  
而蹂躪之心甚愍焉廼捐俸掩瘞歲春秋行視二次卒以  
爲常又自念宦轍馳驅萍蹤漂泊懼瓜代後暴露者如故  
因籌所以垂久之策以爲非捐貲立社置社長司之小權  
子母歲以所入爲培塿之費不可以垂永久然自顧官卑  
祿薄一狐之腋不足以成裘一桷之材不足以成屋籌畫

數年未逢其會事遂寢甲午張惺門刺史來牧是邦下車  
後訛利弊求民隱抑豪強翦狐鼠中刑罰潔已愛民有不  
便於民者悉除之不求赫赫之名地方以治某因躍而起  
曰曩所謂未逢其會者此其時矣因以其事商之刺史欣  
然曰此余素志也遂慨然捐俸錢五萬某捐錢二萬然遽  
伯玉恥獨爲君子且邑中紳耆素多好義詎乏同心必且  
指囷舍舟共成善舉是所厚望焉嶺南某謹引



存誠齋文集卷七

香山何曰愈子持氏著

男璵璵璵同校

光祿大夫太子太傅兵部尚書兼都察院右都御史

陝甘總督一等昭勇侯楊忠武公墓誌銘

公姓楊氏諱遇春其先世居麻城後徙居四川之崇慶州  
世系無所考五世祖明當明季之亂避地甯番衛娶穆氏  
生星祈字君愛君愛生宗顯宗顯生梅字占魁占魁生廷  
棟字良臣良臣娶李氏生公及弟逢春先世多隱德君愛  
於

國朝康熙間復返崇慶時天下初定殘骸滿野君愛日荷

奮竭盡瘁之高原占魁性慷慨好施與里人負兵精繫累者數百占魁惻然爲之傾囊代償免數百人於獄良臣亦豪邁尙氣節調急濟困無少恪緣是家中落公誕之夕太夫人夢得金色鯉旦而生公幼沈默寡言大父鍾愛之常口授之讀年十七去而學劍善騎射乾隆己亥

恩科以武勇舉於鄉爲蜀帥材官膽力過人甲辰甘肅回民煽亂公隨福文襄公往討以功補青雲把總丁未復隨文襄征林爽文於福建遷千總辛亥從征廓爾喀陞守備乙卯二月貴州苗民逆命文襄疏請公偕往公至卽解臭腦之圍嗣以三千人由間道進出其不意賊皆驚怖狼顧

公諭以

朝廷威德兵不血刃降其眾數千人事聞進都司

賞勁勇巴圖魯號秋九月擒首逆吳半生擢遊擊嘉慶元年丙辰額侯勒登保被圍於補頂寨公率壯士潰圍而入圍遂解十一月苗疆平授副將而教匪已蔓延三省矣覃家耀林之華張漢潮齊王氏等叛楚北王三槐徐天德冷天祿冉天元苟聞名等叛西川李全張正倫高均德等叛秦中額侯奉

命移苗疆之師徑征湖北丁巳春兵次黃金嶂公單騎往探得賊虛實遂與侍衛豐紳率兵三千直搗賊巢斬獲三



千餘級追北數十里賊遂竄復隨都統倫布春敗賊於帽  
子山林之華敗死餘賊走中堡塞四面壁立惟一徑可通  
相持數月不能下戊午正月公潛募死士夜半猱援而登  
寨遂破賊墜崖死者不可勝計覃家耀張漢潮皆就縛齊  
王氏遁入陝西公隨額侯追之與賊李全張正論戰於興  
安斬二千餘級賊走投高均德且謀入川與王三槐合公  
沿江轉殺復屢敗之賊遂星散以竄而楚北張漢潮之黨  
張正潮復嘯聚數萬人欲窺荆門額侯與公復趨荆門時  
兵不滿萬及與賊接公奮戈直進賊皆披靡軍士亦殊死  
戰無不以一當百一晝夜斬首數千賊入漳水死者無算

餘寇走犯陝西公隨額侯躡其後賊聞風四散公適丁父憂聞訃呼搶欲徒跣奔喪額侯奏請奪情墨經從軍公感上知遇益奮不顧身是年冬羅其清及張漢潮之子張正隆次第被俘奏公功第一遷西甯鎮總兵己未春正月公追徐天德至廣安伺賊半渡擊之殲賊千餘獲其黨嚴大林等七十餘人天德率殘寇與王光祖合賊黨蕭占國張長庚自圍中來援公邀之於黃土牆克之再戰於譚家山蕭占國張長庚王光祖悉就縛餘黨奔附冷天祿天祿於諸賊中驍悍稱最聞大軍至悉眾來迎部署甚整公率健銳衝之賊大亂冷天祿中箭死授固原提督是役也賊延

蔓三省蹂躪數千里旋滅旋起自辛亥迄乙丑凡十五稔始奏凱班師論功以公爲最雖曰智勇絕倫亦其忠義素積以身許國所以能然也丙寅甯陝鎮兵變公領兵至于午谷川陝各鎮兵亦至共攻賊於平牟敗之追北二十里遇伏各鎮兵皆潰公獨收集數百人退保柴關賊復至中有蒲大芳等數人乃公帳下舊將望見公輒下馬羅拜公諭以利害設計降之吏議以公處寘失宜左遷甯陝鎮公卽攜家屬往是時反側初安人心未定咸爲公危而公推誠馭下措置有方軍中帖然戊辰入覲

睿廟霽顏遇之

溫語嘉褒賜予甚厚仍提督固原兼權漢南鎮事己巳始  
赴固原任先是營務廢弛公至爲之申明禁約賞功罰惰  
遴材黜濫得選士千二百人日訓以技藝將士頗以爲苦  
公徐諭之曰我馳驅數十年豈不欲暫就逸豫但久歷戰  
陣每見技藝嫻熟者便殺賊立功致身通顯生疎者徒殞  
軀命勤勞乃汝等富貴之資也於是一軍皆悅固原之師  
稱爲天下勁旅後以戰功顯者甚眾癸酉秋河南盜牛亮  
臣反殺滑縣官吏據其城

詔公與溫撫軍承惠討之公聞

命卽率部下健兒八十餘人馳往滑縣適遇賊百餘抄掠

近村公盡俘斬之是時溫公統豫眾數千觀望不進

上乃改

命直隸總督那公彥成掛經略印代其任而大兵亦絡繹雲集公手揮皁旗破賊於道口斃者萬餘賊遂堅守滑城其黨李文成自長垣來援桃源賊復遙爲之聲勢公分兵禦之絕其外援賊遂窮蹙困守孤城冬十二月用地雷破之公率眾冒煙入經略亦率壯士登南城殺賊萬餘俘獲二千有奇擒僞帥牛亮臣徐安國械送京師三帀月而蕝事奏上以功高封二等男

紫禁城騎馬公方擬進京復

命遽聞陝西南山民變賊皆以白旗素巾爲號公復奉命與長制軍齡會勦公卽由滑率勁旅六百倍道疾馳九日而抵盩厔與長帥議破寇之策適固原兵亦至公於是率大軍趨隴州距賊二十里而陣公潛召心腹佯投賊爲內應漏初下又令健將數十人假賊裝束徑往賊營舉火其先投者從內應之賊大亂自相疑貳故兩闕月殲捕無餘晉爵一等男

陛見之曰

天顏溫霽慰勞備至

賜予有加庚辰秋八月

不言房之集卷一  
三  
睿廟升遐

今上登極

溫旨嘉公忠誠貫日勲勞懋著加太子少保銜

賞戴雙眼花翎

恩遇益隆乙酉卽有總督陝甘之命蓋殊恩也公自以武人不習吏事疏辭

詔不許公感

上恩愈加淬礪於民生吏治加意整飭一以培養元氣爲先丙戌夏六月回疆張格爾叛喀什噶爾辦事大臣巴彥伯克圖副都統烏爾恭額音登額先後被害

上命伊犁將軍長公齡爲揚威將軍總理軍務公與山東巡撫武隆阿爲參贊大臣

命下公卽馳抵阿克蘇而喀什噶爾和闐英吉沙爾葉爾羌四城已先後淪陷丁亥春正月大兵始集三帥會議分三路進發揚威將軍由中路進公由葉爾羌進武參贊由烏什進仍會於中路師至洋阿巴爾特適與賊遇三軍合搗殺賊數萬人逐北三十里復生擒二千餘人奪獲幟械堆積如阜復戰於渾水河先出奇兵繞其後斬獲過半餘寇尙數萬據阿瓦巴特官軍銜枚疾馳乘夜潛進甫曙三面環攻出賊不意復大破之斬首二萬級凡三戰三克遂



復喀什葛爾城公晉太子太保銜寇退守噶爾河公率死  
士數百人直前渡河擊之賊驚潰遂復英吉沙爾葉爾羌  
亦降而楊軍門芳亦恢復和闐矣前後收復四城纔四十  
餘日耳惟首逆張格爾領殘寇遁卡外時值大雪因屯兵  
固守

詔以首逆未獲措寘乖方鑄公太子太保銜並

召公回途次卽復之公甫抵京而揚威將軍已生擒張格  
爾獻俘

闕下回疆遂平

上嘉在事文武勲陞擢有差並

命繪功臣像於

紫光閣公與焉

御筆親爲之贊仍督陝甘如故乙未春公以年力就衰疏  
乞骸骨

上亦念公驅馳數十載年近八旬思得歸休勉

允其請然猶

優詔慰勞且

御製詩以寵榮之前後

賜予無算

恩眷莫二時人榮之公自結髮從軍大小百戰未嘗不在

不言卷之三  
行間公偉軀修髯每戰輒結鬚揮刀大呼陷陣身先士卒  
故所向有功性嚴毅治家有法然交友馭下則謙退溫和  
不以爵驕人不以功自伐故朝野無間言撫循士卒以恩  
甘苦與其酬功任能一秉至公故人樂爲之死真近世名  
將也道光十七年以疾薨於里第時年七十有八

朝廷震悼卹典特優

恩賜世襲一等侯諡忠武夫人田氏端莊賢淑事舅姑馭  
臧獲皆足爲閨範公得以致力疆場無內顧之憂者夫人  
之力也

誥封一品夫人晉封一品太夫人丈夫子二長國佐仕至

參將加副將銜次國楨某科舉人歷任河南山西巡撫陞  
閩浙總督予告歸里世襲侯爵孫五煦熙皆州附生熙例  
蔭刑部主事杰援例得遊擊忻烜幼曾孫五瑤環瑜珥皆  
國器也以某年月日葬公於某山之原銘曰 維古蜀州  
爲生偉人仗策從戎肝膽輪困疆場百戰爲國忘身巍巍  
峻烈赫赫虎臣宣力兩朝持節三秦民頌申伯來宣來旬  
屹然柱石默契 楓宸荷 國殊眷  
恩寵莫倫爵以列侯形繪麒麟蜀岡業業妥公之神貞珉  
峩峩銘公之勲吁嗟公平孰繼清塵



書碩農明府六十雙壽序

箕疇五福首曰壽蓋以富貴福澤非壽不足以享之又非壽不足以盡之此壽之所以首重也然而昔人有云無名不可以言壽使德澤不及於當時聲稱不聞於後世雖童頭兒齒皓髮龐眉者世亦豈少哉必使言行足以不朽事業昭於來茲以此言壽壽斯可矣但二者恒不得兼收焉碩農明府乃不期而獲之人每羨明府之能兼斯二者而不知所以致之者有本也某忝與明府同舟雖未能備悉其世家德望然交既久能略道其梗概明府先世本姓甘氏

國朝順治初以從龍功

賜籍漢軍世有隱德故掇巍科登膺仕者雲仍蟬聯而起  
明府幼而穎異讀書兩行俱下爲文操筆立就名噪京師  
而賦性孝友入事庭闈承顏養志埴篲之間友愛甚篤韓  
子有言根之茂者其實遂膏之沃者其光晔故弱冠卽領  
鄉薦壬午登進士第剖符西蜀始宰冕甯以神明稱旋調  
西昌厯權蒼溪三台簡州巴州越雋諸邑郡事皆有惠政  
著賢能聲其爲政以端士習鋤强暴爲本不事姑息雖素  
稱繁劇而所至豪猾屏息桴鼓無聲其決獄也耳聽目察  
口折手批案牘累累頃刻立盡而訟者亦莫不心服而去

其所蒞於西昌爲最久西昌爲寧遠郡首邑郡城之南河水歲爲民患道光某年暴雨傾注河水宵漲廬舍漂沒南城亦圯明府親問疾苦捐俸賑卹民賴以安是歲秋明府議築隄防以絕禍本乃捐俸錢爲士民倡士民德公之爲已捍患也皆不召而集其輸金錢若干明府卽相度地勢築石堤數十丈自是洄患遂息更以其餘脩築城垣崇墉截竄遂爲西南保障方伯監司廉君才能以卓異薦人疑其循聲籍籍謂必戴月披星不遑晏息而君初若無事者然簿書之餘輒手一篇商榷古今博通六籍或尋章摘句循書生故習日與寮友輩拄笏看山分題刻燭稿纔脫輒



爲士林傳誦甘恬淡不事浮華敝車羸馬有東京循吏之  
風德配劉孺人幼讀內則長奉姆訓上事舅姑甘旨無缺  
羹湯非其手調不敢以進內相夫子柔嘉淑慎周南之關  
雎樛木召南之采芣鵲巢吾當爲孺人詠焉今仲秋望有  
旬日之吉爲明府暨孺人花甲初週之辰郡中同人將介  
祝嘏之觴寓書於余曰明府與某等誼屬寅恭且作文字  
緣者有年宜有言以爲明府壽余曰明府已自壽矣其世  
家德望孝友事功文章行誼如上所云者皆彪炳耳目凡  
人能知之能道之所謂足不朽昭來茲者非耶以此爲壽  
壽何若耶余復何言曷若卽以明府自壽者壽之不亦可

乎夫有斯德者卽有斯福明府與孺人旣自壽而復壽人  
則天之所以壽明府與孺人者如川之方至如日之初升  
正未有艾也請誦南山之什以侑康爵



呂梅仙刺史四十初度序

言壽之文曷昉乎蓋昉乎華封之三祝洪範之五福以及  
頌岡陵行葦祈黃耆與夫春酒介眉君子偕老諸什之義  
而已是則獻觥祝嘏由來尙矣然人知壽於百年者爲壽  
而不知壽於千百載者之壽之永也壽於一已者爲壽而  
不知壽於千萬人者之壽之大也如我梅仙刺史循聲卓  
著德配汪夫人芳徽足式所謂壽於千百載千萬人者非  
歟刺史以皖江碩彥作牧西川錚錚有聲厯權繁劇所在  
民樂所去民思愈耳其名久矣乙未夏授會理牧地當滇  
蜀接壤漢夷雜處提封五百餘里治不得其人則奸宄叢

生怯篋暴作刺史至條列地方十餘事榜諸通衢諠諠告  
誠城狐社鼠爲之屏息每聽訟常自晌午至漏初下剖判  
如流治北六十里有天星橋爲滇蜀通衢當大雨時行驚  
濤轉石弩激矢射故橋屢毀前權州牧張星門明府與愈  
捐俸重脩丙申夏淫雨浹旬山水暴至橋復圯行旅病涉  
愈建言以爲非更開新道其患未已刺史欣然從之卽捐  
俸召工鑿山開道工竣民去危就安無漂溺之虞與僚友  
接一本至誠或問何以持已則曰守謙也問何以待人則  
曰行恕也問何以端士習則曰培學校勤考課也問何以  
恤民隱則曰本虛衷理冤滯也牧會理期年詩有之曰樂

只君子民之父母樂只君子邦家之基若刺史者其亦庶  
幾矣德配汪夫人與刺史同里明大義端莊賢淑聲溢里  
閭事舅姑以孝聞與刺史相敬如賓尤工女紅刺繡五文  
有鍼神之號治家務儉馭下以寬雖生長富貴家未嘗以  
驕矜之氣施於儕輩未聞有詬厲之聲施於臧獲蓋關雎  
之幽貞葛覃之勤儉樛木之慈惠采蘋之齋潔兼而有之  
古所稱母儀閭閻範者於斯見之迺知刺史之爲良吏固其  
天植而夫人之德適左右之故非刺史不足彰夫人之賢  
非夫人亦不足以成刺史之志也丙申仲冬爲刺史暨夫  
人四十覽揆之辰刺史德政循聲嘖嘖人口而夫人又內

助稱賢行見化行俗美考績報最爲

國家作股肱而後知刺史之循聲垂千百載而無斁則合千百載之壽而爲壽矣刺史之德政被千萬人而無窮則合千萬人之壽而爲壽矣不亦永且大歟二三君子欲稱祝嘏之觥向愈徵言以授介者愈不佞不嫻於文詞尤不能爲侈言誇說酌西池之酒舉崑崙之霞以侑執爵謹次其所知所聞者拜手稽首而爲之序

重修白雲寺碑

佛法之入中國也始於漢明盛於梁武厥後梵宮浮圖徧天下雖山陬海澨必極其崇宏而威靈亦時著故信奉者眾會理州治北十里有白雲寺創自明厯今數百年歲不可考蓋邑之名勝也日久墮頽乾隆某年邑紳張贈君某慨故蹟之將湮捐貲修葺遂輦飛輪奐爲巨觀焉每當春秋佳日裙屐登臨者摩肩接軫道光七年丁亥春比鄰不戒燬於回祿廢爲荒邱刺史吉薌畦先生牧會理之明年過其故墟訪之耆老得其顛末浩然興歎以是寺爲數百年勝迹焉可令其一旦泯沒乃慨然捐錢五萬令張廣



文某董其役廣文張贈君令嗣也卽銳然自任曰是寺固先君子之所經營某雖不才敢不承先志而重方鈞命顧土木之工浩大非集腋不足以成裘刺史然之廣文於是醵金庀材卽於是年十月之吉鳩工至某年月日落成紺宇高聳岷嶴嶒嶸欒栾赫煒彤碧熒煌嘉木翠竹環植左右嗚呼是寺屢廢屢興茲崛起於灰燼之餘吉刺史與有力焉而張君可謂克繼先志者矣夫佛老之教雖與吾儒異趣而其欲人爲善之心則未始不同也況聖人以神道設教天下愚夫愚婦梗頑難化者語以因果報應之說未嘗不悚然而懼是佛法者亦足以濟王化所不及者也茲

張君徵言於余不敢以固陋辭因次其事而書之並亂之以偈偈曰

彤彤梵宇火宅大車相垂寶絡座湧蓮華門開甘露普渡  
恆沙日月燈光晝夜無差

空空法相自在牟尼天花不著果證辟支解脫三昧圓覺  
四依婆娑香國誰與同歸

不讀書之害

--	--	--	--	--	--	--	--	--	--

存誠齋文集卷八

香山何曰愈子持氏著

男璵璠同校

錢衡農詩集序

余於陝西道中嘗見錢君衡農有題旅壁詩知爲績學風雅之士因亟載之退菴詩話中欲作簡齋之訪心餘謂雖未能旦暮遇當物色之嗣晤書碩農於西昌始知衡農宰新甯竊喜仕同邦萍踪可合然山川阻修尺素猶未通也丙午夏余述職北旋適君亦回自裡塘得訂交錦里班荆促膝相得甚歡衡農出其裡塘雜紀一帙相示其中紀山川紀關隘紀風俗紀怪異紀營制大而邊防軍政小而魚

蟲草木無不備載約略數萬言議論宏偉動合機宜足補  
籌邊通志諸書之缺然後知衡儂非徒博雅士乃經濟才  
也余益自信前者之傾倒爲非阿其所好也旣而衡儂復  
出其無毀我室詩集二冊受而讀之其鯉庭集熏香摘艷  
欵玉唾珠多胎息中晚唐人才氣直陵轢香山飛卿駿骨  
虎鬚鴟音蠶絲諸集則極似

國朝袁簡齋而時出入於齊梁昌黎諸家之間蓋取材旣  
廣莫名一體如衮衣繡裳五色相宣也舜琴義瑟五音相  
諧也尹牙烹調鹽梅相和也頗牧用兵將士用命也王阮  
亭所謂擲地金聲者衡儂無愧焉兩浙詩人自沈休文倡

其先後則羅昭諫錢仲文賀季直駱賓王孟東野陸務觀  
趙子昂吳俊伯陳約之茅鹿門諸公先後樹幟而務觀獨  
闢蹊徑不落唐人窠臼海內翕然宗之

國朝查初白袁簡齋亦相繼振袂而起各自名家嗚呼盛  
矣蘅儂以沉博絕麗之才馳騁於其間余知諸公復起亦  
當虛席以俟惜蘅儂恩恩言別未得朗誦百回他日再合  
萍蹤未識武陵桃源許漁人重問津否也



勅封文林郎西昌大令書碩農家傳

書碩農

綸

字紫園碩農其號也漢軍正藍旗人本姓甘氏

其先世於明永樂間以從征遼東功授瀋陽衛指揮使卅其職後降襲千戶遂居瀋陽之鳳凰堡

國朝順治初其太高祖諱應春者從龍入關始隸旗籍以武功仕至福建漳州協副總兵高祖文煥蔭給事中累遷直隸按察使曾祖國堦太學生木生曾祖國延由河南河內令厯官兵部武選司郎中祖仕鑑以特恩選錄舊家子孫

授筆政本生祖仕鐸由太學生授州吏目補廣西金城寨



巡檢仕鑑無出以碩農太翁際華嗣由官學生考職縣丞  
借補直隸青縣主簿遷滄州判官生君兄弟四人伯恪敏  
仲卽碩農也叔恪仁季恪宗碩農少沉毅寡言笑孝友敦  
篤太翁及太夫人吳氏咸鍾愛之總角從父受書聰穎善  
記稍長精騎射以太翁遊宦故君遂廢學年十七始下帷  
發憤遂貫穿六籍登嘉慶戊辰賢書太翁常以正修齊治  
爲訓碩農亦慨然以經綸匡濟爲已任未幾而吳太夫人  
與太翁相繼逝碩農哀毀骨立以未克祿養爲痛聞者悲  
其志焉太翁居官素廉囊橐蕭然青滄士民素感太翁惠  
政醵金相賻復得同僚麥舟之助碩農始得扶櫬回京卜

葬於先塋之次道光壬午成進士出宰西川補冕寧以廉  
能著旋調西昌厯權三臺蒼溪巴州簡州越嶲司馬事長  
於治術政尙嚴而明燭覆盆故所至肱篋斂迹胥吏不敢  
仰視民鮮罹法其始治三臺卽平反程興國冤獄士民頌  
之臺邑文風久不振每課士輒爲講論文義飲以膏火學  
者感發摩厲自是領鄉薦者數人任蒼溪首修學校恤孤  
獨之無歸凡有便於民者以次舉行蒼俗婦女好輕生或  
姑婦勃谿或室家反目或鄰里角爭往往投繯而所親復  
藉以居奇婪索無厭盈谿壑而後已君爲嚴禁且作勿輕  
生論徧諭民間其風稍息故受替之日父老爲之零涕其

任冕甯也甫下車廉知奸胥猾吏與鄉豪比黨肉視里閭  
莫敢訟理君按驗得實寘數人於法一縣肅然邑故多雹  
損民禾稼民以崇訴君哂其妄乃禁畝獵時樵採患遂已  
大府察君能調西昌爲甯郡附郭首邑接壤冕甯民素聞  
君嚴明莫敢以身試法雖夜不閉戶晏如也先是郡城東  
河常爲患每遇山水驟漲阡陌廬舍悉成巨浸城東南隅  
圯君至卽繕城浚河又築隄捍禦民免漂溺再蒞巴州也  
故刺史魏君以憂去是時值州境大旱饑民萬餘胥食富  
室莫能禁人情沟沟咸謂變且不測大府知君能檄往泣  
事多爲君危君至卽榜示曰若皆吾赤子迫於饑饉故假

貸富民今吾粒若其悉來毋擾鄉曲卽啟倉發粟饑民知  
君之果粒之也遂散而就賑君又自捐俸並勸諭紳民及  
富商巨賈輸粟相助存活甚眾闔境以安當碩農之發粟  
也咸謂當先請於方伯監司候可乃行碩農哂曰若俟牘  
請往返彌月則亂成矣否則求民於枯魚之肆矣聞者歎  
服越嶲爲西蜀邊徼古嶠蒙詔地萬山環繞延袤五百餘  
里皆與番夷連畛數十年來酋長花甲石鱉常出巢爲患  
殺掠人畜不可勝計邊民苦之雖屢經官軍勦捕而軍至  
則負隅自固軍退復擾故師屢出無功君捧檄撫茲土也  
親按視邊境體察地勢謂利濟梅子營等處左右崇山夾

時下臨深溪路處其陷如鼠行穴中道旁叢薄翳翳寇每潛伏其中以俟商旅前後邀截欲逃無所故爲其擄因繪圖上之建議改路於高阜寇旣失從高視下之利又無叢薄之障地高路曠一望數十里寇之眾寡瞭然在目商賈可禦則行否則退而避之又當於扼要處所增置營堡聲勢聯絡則寇必不能爲患大府然其議會君及瓜王司馬受事固能吏也如君言遷道建營三十里間斥候緝屬王司馬復誘石鰲至城而肩鑄之豐其飲饌與之約曰境內安則若生否則死石鰲唯唯暗諭其眾毋得擾邊寧遠王太守復購花甲之首以千金花甲知怨家多遂埋首巢穴

自是越境無邊患君與有力焉大府以卓異薦而碩農歸道山矣享年六十有四屈處百田未竟其用識者惜之有人倫鑑甲午分校蜀闡得士七人皆知名士族姪甘守素需次蜀中疾卒於錦里碩農遣僕視含斂助其喪葬恤其家室未幾守素母又卒又葬之嫁其女於吳氏鞠其鰥孤其好義又如此尤長於詩文著有古文二卷重脩冕甯邑誌若干卷建南風俗略一卷有益書房詩集四卷聽理得閒卽循書生結習與余及山左王雪嶠大梁李紅樵餘杭吳音木江左趙竹菴蜀人潘紫垣郵遞唱酬爲人虛佇不立崖岸人有佳句則稱道不置詩胎息魏晉瓣香子美得

風雅正宗余與碩農訂交十載碩農常嗟余不遇余亦悲  
碩農之未展其驥足也屢欲次其行誼政績以未得其顛  
末而止丙午夏君弟恪宗以縣丞需次江南不遠數千里  
致余書並君生平事略一帙曰先仲兄與君交深知已莫  
如君相得亦莫如君敢以家傳請余不敢以不文辭因兼  
採訪輿論次第其事而書之以備太史氏他日之采云爾  
贊曰昔武侯治蜀以嚴而蜀治碩農法之而所至亦治國  
氏有云惟有德者能以寬服人其次莫若猛故有水懦火  
烈之喻斯言旨哉碩農蓋奉斯言以周旋故厯著循聲至  
其再蒞巴州拯饑民於垂斃弭禍患於片言亦能矣哉

慶豐錫都督詩集敘

古來扛鼎拔山之雄有力如虎動蓋寰宇名垂汗青者不可勝紀然求其識一丁字已戛戛乎其難矣况拔戟騷壇自成一隊乎雖郤縠敦詩說禮祭遵雅歌投壺見稱於書傳後世仰其風流然無文字可傳至曹景宗以競病見稱於梁史而所傳不過二十字耳人已奇之惟岳忠武旣以功烈冠古今其篇章流傳者皆可被諸金石播諸管絃有絳灌之武兼隨陸之文於斯爲盛至於我

朝以文道化成崇儒尙學雖樸樸兔耳咸知絃誦祈父叔田亦解謳吟於是挽兩石弓者直欲手握龍梭與士林爭



衡彬彬儒雅幾欲突過前代其最著者則岳威信公馬跡  
所至每多題詠其著作卓卓可傳誠不愧忠武象賢也余  
曾祖行文登副都督逸泉公大父行浙江軍門靜軒公及  
同里之盧玉峯總戎均起家武甲科而軍府之餘手殘編  
弄柔翰吟詠自適哀然成帙余曾得其一鱗片甲載於退  
菴詩話中此外以武事進未登膺仕而放浪於山巖水涯  
間以詩自鳴者殆不可臚列嗚呼盛矣余筮仕西蜀始締  
交長小泉總戎時相唱和已心焉折之及庚戌秋余歸自  
西藏得晤慶夢錫遊戎於鑪城登其堂見書畫滿壁素琴  
橫案知非蹶張者流取琴視之工精製古拂之鏗鏘瀏亮

迴非凡響訊之始知夢錫善琴此乃夢錫物色良材而自製者也贊嘆久之及接談恂恂如書生尙論千古滔滔若決江河然後知夢錫不獨非蹶張者流乃博雅士也夢錫旋訪余於旅邸抵掌而談偶及詩文議論皆中窾竅予爲之傾倒然後知夢錫非獨博雅士乃詩人也彼此相得甚歡次日夢錫折簡相招樽酒傾懷忘形爾汝酒半酣爲余援琴彈落雁履霜數操予雖不甚解琴而雅好琴音聽指下泠泠如微風入松天籟于喁如石上流泉幽韻清越四載塞上緇塵卅年胸中磊塊已被琴聲盪滌於無何有之鄉矣復出其詩集一冊屬余訂定余受而讀之其生平蹤

跡遭際性情襟期一寓於詩寄託遙深詞旨溫厚深得雅  
頌之遺若徒賞其詞華猶其末焉者蓋夢錫本操舉子業  
綺歲卽列膠庠文名藉甚緣數困場屋家復不中貲不得  
已而就職武途欲得薄祿以代養茲雖以武功顯非其素  
志也故其詩多壹鬱感慨之作勒習得閒輒彈琴賦詩不  
以名利動其心玩好汨其志視敦詩說禮雅歌投壺者豈  
不綽綽然有餘裕哉

天左旋日月五星右旋辨

天居冥冥之上巍然者其高蒼然者其色穹然者其體燦然者其文人得而仰之日月星辰隨之而轉周流不息人亦得而見之似若可測者然而聖如周孔多識多聞如周孔所言惟修齊治平之道子臣弟友之職日用彝倫之理而已於天則未嘗一語及之卽爾雅一書亦祇道其常未嘗涉於怪誕而後世之談天者娓娓然若數掌上紋其亦不自量也已夫罔人以不可知不可見者易罔人以可知可見者難玉厯通政經曰天體東西南北徑三十五萬里距地八萬里春秋元命苞曰陽極於九故天九九八十一

萬里廣雅曰天南北相去二億三萬五千七百二十五步  
東西四步而殺天去地二億一萬六千七百八十一里有  
奇張衡靈憲曰自地至天一億一萬六千三百五十里洛  
書甄曜曰天去地十七萬八千五百里徐整三五歷紀曰  
天去地九萬里無稽之談人異而說不同此則罔人以所  
不知不見其爲辭也易至若天與日月五星之運行自東  
徂西此則人之所共知其見雖欲造爲巧譬奇論以欺世  
不亦難乎晉書天文志之言曰天左旋日月五星右旋謂  
天旁轉如推磨日月東行天西旋牽之而西如蟻在磨磨  
左旋蟻右行磨疾蟻遲不得不西明太祖嘗以問羣臣傅

藻以蔡氏左旋說對太祖曰朕嘗與善步者於天氣清爽之夜指一宿爲主太陰在是宿之西夜竟則太陰漸過而東由此觀之當是右旋蓋膠於晉書之說也夫天行疾而月遲月始西而後東者非月東也乃天逆行而西遺月於東而實非東也今有兩馬於此一駿一劣劣者先馳駿者後發轉瞬則駿者突前而劣者在後矣謂劣緩可也謂劣退行則不可也天與日月五星奚以異於是二十八宿附天體而不動者也余亦嘗於晴霽之夜植表庭中初則參宿與月俱在表之東少焉則皆過表而西漏將盡則參宿西沒月亦與之俱沒月但行稍緩耳此天與日月五星皆

左旋之明證也且按諸書日月五星各有其道未嘗附麗於天非如蟻之在磨者比天又奚從牽之而行耶論衡曰日月五行隨天而西移行遲於天斯言可信晉書之說蘇子瞻曰喻所謂聞鐘揣籥之說也其強辭奪理足以惑世豈公孫龍之苗裔耶

## 客答

客有謂今人不如古人者予曰古人不及今人遠甚客怪其言請畢其說予曰上古荒渺難稽姑勿具論自唐虞以來遙遙四千餘年人物備載典冊亦無俟縷陳試以一二言之周公大聖人也孔子曰如有周公之才之美又曰久矣吾不復夢見周公則孔子爲之心折者至矣而周公相成王三握三吐以待天下士是聖如周公才如周公猶有待於天下士也孔子大聖人也不以聖自居曰予學不厭教不倦云爾或云問禮於老聃學琴於師襄以生知如孔子才如孔子猶未嘗自足也呂牙輔武王一戎衣而有天



下所著六韜陰符後世兵家祖之而王翼篇謂爲將之道  
須股肱羽翼七十二人以成威神是才如尙父猶欲羅眾  
彥以自助也武侯相昭烈用兵如神典午氏歎爲天下奇  
才杜子美稱其伯仲伊呂朱晦庵謂爲三代下一人而每  
臨大敵雖胷具老謀必咨詢羣僚集思廣益擇其善者而  
用之以期精益求精慎之至也故平南之役用馬謖攻心  
之策南紀又安者二百餘年蓋愚者千慮必有一得詢及  
芻蕘則謀無遺策而後得出萬全奇勲可奏今也則不然  
居廟廊之上處軍府之中一身之外無餘才一已之外無  
餘謀是聖過於周公孔子韜略愈於尙父武侯也且處優

養尊穆然之色凜然之威拒人於萬里之外使百僚箝口  
羣下皆瘖豈不大過古人哉客爲搯腕久之曰子言是也  
吾無以難子也



禮先樂後論

先王制禮作樂者何夫禮者理也樂者樂也所以定民志  
樂民情也二者相須而並重然而禮爲先周子有言禮先  
而樂後深得聖人制作之意蓋禮樂者先王馭世之微權  
也何者垓埏之大廣輪之眾擾擾攘攘飽食而逸居非有  
禮以範之則人倫乖而亂作矣夫上無禮則暴下無禮則  
亂尊無禮則陵幼無禮則犯富無禮則肆貧無禮則濫聖  
人憂之乃制禮以教之使之父子有親君臣有義長幼有  
序夫婦有別朋友有信彝倫敘綱常明而天下平矣升降  
揖讓之文饋遺晏享之節特其小焉者耳民既知禮矣天

下既治矣聖人又憂之憂其苦於束縛而禮終於壞也俯  
察天地間之有音者得金石絲竹匏土革木八者焉於是  
製爲鐘磬琴瑟管絃笙鼓塤箎祝敔之屬以爲樂又察陰  
陽造化之妙寒暑節候之宜分爲六呂六律而以宮商角  
徵羽統之奏之聲和律諧入其耳感其心微妙通神百獸  
爲之率舞鳳凰爲之來儀風雨調而鬼神享故五帝三王  
之世莫不家絃而戶歌熙熙然皞皞然民氣和且樂也而  
鄭衛之音後世之樂不與焉昔夫子聞韶於齊有不圖爲  
樂至於斯之歎故禮樂並重教及門也則先禮而後樂趨  
庭之訓則諄諄於詩禮而未及於樂蓋樂可一日無而禮

則不可須臾廢也周子窺破此旨是以有禮先樂後之說  
也乎

不<sub>レ</sub>言<sub>レ</sub>テ<sub>レ</sub>集<sub>レ</sub>テ<sub>レ</sub>

一<sub>レ</sub>四

存誠齋文集卷九

香山何曰愈子持氏著

男璵璵同校

程雨琴集唐詩冊序

聯句始於漢武然柏梁一篇惟漢武自具帝王氣象餘子  
多餽飭成章意不聯屬如老衲衣百綴而成中亦多俚語  
蓋君臣一時唱和才有優劣故也後世效其體者殆笑過  
之惟質樸不及耳集句始自晉人太僕傅咸嘗集七經句  
爲詩此集句之濫觴也至北宋始有集律句者石延年爲  
最著而工則遜於王荊公孔毅父亦嘗集古句贈東坡然  
昔人不過一時興會偶爾操觚未有裒然成集者至



國朝而始盛戚鶴泉集唐宋句至數百篇然鶴泉善集不善作殊使文人短氣予友程雨琴以名進士宰西蜀所至循聲卓著人知其長於吏事未始知其爲詩豪也雨琴宰新繁時予權篆新都二邑畎壤相接雞狗相聞因常得樽酒論文其所著

詩集予嘗爲評騭歌行元氣淋漓

陶冶萬類峭崿奇詭直登昌黎之堂律詩憲章唐賢而別出機杼不落前人窠臼咸豐甲寅秋予以內艱交替馬湖篆因吳楚寇盜充斥道路梗塞讀禮錦城適雨琴亦自夔溪來僑寓省垣復示余妙香軒集唐一帙並屬予作序受而讀之喜其信手拈來盡屬天成如五銖仙裳迥非人工

莊叟所謂庖丁解牛技而進於神者矣或謂作難而集易  
予曰二者爲均蓋欲獨樹一幟與往昔角逐馳騁則作難  
運用隨心不縛於成語則作易因材於古無事開鑪鑄戟  
則集易求天然湊泊恰與題稱則集難茲妙香軒所集百  
餘篇化陳爲新杼柚如出一手且蘊藉含蓄味在言外是  
集也何異乎作固可以文人遊戲三昧目之耶當與延年  
荆公並驅爭衡可也



書明都督總兵秦良玉佚事

明都督總兵秦良玉者奇女子也。其征播征蜀征遼征奢崇明復重慶屢敗張獻忠羅汝才。于紅崖觀音寺青山微諸大巢蜀賊底定。征播之役一日連破金筑等七寨爲南川路功第一。累遷至都督總兵。及張獻忠犯重慶。玉獻策請保十三隘。撫臣邵捷春不聽。又請盡起溪洞兵。懇給廩餼。捷春與陳士奇皆不許。獻忠遂長驅大進。全蜀遂陷。明史已大書之矣。然玉之始末未得而詳。余宦蜀年久。嘗求其佚事而不得。道光庚戌。余權新都篆。廣文劉石溪言嘗見石碁志及馬氏家乘。於陳鶴亭處因述所聞得梗

概焉王生於忠州之鳴玉溪字貞素年方毀齒聰慧絕倫  
父葵歲貢生兄弟三人尤鍾愛之幼課以章句長通經史  
曉大義當萬厯時盜賊蜂起葵知天下必亂以兵法部勒  
子弟且與玉曰汝雖弱女子盍亦習兵無徒爲寇魚肉玉  
欣然與兄邦屏弟邦翰民屏同習騎射擊刺之術葵又授  
以韜略學成而玉尤精其法葵嘗語諸子曰惜不冠耳汝  
兄弟皆不及也玉曰錦繖錦車曷嘗冠哉使兒得掌兵柄  
夫人城娘子軍不足道也葵益奇之緣是問名者皆未肯  
輕許石砭馬千乘慕其名求委禽焉葵許之于歸後千乘  
敬之如賓一日語千乘曰今四海多故石砭界楚黔之交

不可無備且男兒當樹勲萬里奚用坐守爲千乘然其言  
遂與玉治兵斬白木爲捍號令以商之玉其下亦敬畏玉  
至不敢仰視萬厯二十八年正月一日賊夜襲官軍諸營  
皆潰玉與千乘先期令於軍中曰有解甲韜戈者斬夜半  
寇大至玉與千乘首尾夾擊大敗之督臣李化龍匿不以  
聞玉口不言功而白捍兵由是名聞天下千乘以論開礦  
事忤內監耶秉雲逮雲安獄狹死子祥麟未壯玉奉命襲  
職遂卸裙釵易冠帶家將文指揮妻白氏祥麟婦張鳳儀  
暨左右侍婢皆男裝雄服隨王征戰奢崇明之圍成都也  
畏白捍兵遣使樊定邦齎重金求助玉大怒曰賊奴敢污

我耶遂斬使焚書以其金帛犒賞三軍往援成都適四川  
布政使朱燮元破崇明呂公車會玉兵至斬獲無算崇明  
大敗遁去圍遂解玉旋復重慶蜀平玉之奉命援遼也杏  
山之戰洪承疇敗績劉綎全軍覆沒玉獨完師還初玉入  
都上召見賜一品服御製詩三章褒美之有世間不少奇  
男子誰肯沙場萬里行之句朝野榮之都人聞白桿兵至  
聚觀者如堵馬不能前玉馭軍嚴秋毫無犯至今京都虎  
坊橋西迤北都人呼爲四川營以玉得名也獻忠之未入  
蜀也蹂躪大江南北武昌魚幾不可食楊嗣昌欲誘使人  
蜀以困之知其畏玉遂解玉兵柄獻忠知玉不用遂犯蜀

提春士奇復不用其策而全蜀陷且屠矣于婦張鳳儀張忠烈銓女與夫祥麟守襄陽孤軍與賊戰於侯家莊援兵不至皆沒於陣祥麟亦有勇略屢立戰功仕至指揮使晉宣撫使祥麟之殉節襄陽也先與其母書言兒誓與城存亡願大人勿以兒爲念玉批其旁曰好好真吾兒其書今尙存玉旣罷職閒居甲申之變聞帝殉節煤山哀經望闕大慟氣絕者再時獻賊屠蜀獨不敢犯石砭避難於其境者皆藉保全每聞慘殺狀輒痛憤不勝歎當道失策以順治五年戊子疾卒於家年七十有五明永厯四年也葬城東之迴龍山將卒戒祥麟子萬年曰今蜀惟石砭完以我



在故也我死寇必至城東南萬壽山險阻可守吾已預庀  
糗糧軍備於此有警可率軍民守之勿以資寇踰二年賊  
將譚宏等果大至焚掠一空萬年遵遺命先率軍民保守  
萬壽山幸糧足賊屢攻不克順治十六年王師平蜀遂率  
眾納款賜勅印如前明故事萬年卒傳洪裔裔傳宗大大  
傳光裕裕無子妻陳氏青年守志撫姪光裁爲嗣乾隆初  
以不謹降職通判尋改土歸流馬氏自宋建炎以來撫有  
境土六百餘年珍藏頗充每春秋陳設照耀庭中廳丞某  
誕之與幕賓劣生數人緣事籍其家未盡者爲族子光緒  
乾沒而馬氏家藏罄矣亡何某丞晝見女將金甲腰弓矢

怒目視曰汝何破吾家抽矢貫其胷而仆幕賓劣生亦相繼暴卒光緒裂腹死馬氏家藏既盡唯存御賜鱗玉一品服今尙燦然如新云後爲盜竊至山右官詰知爲上賜玉物齎還其家玉用法嚴有犯雖親族不少貸料敵如神緣見沮於當道未竟其用使終老牖下盜賊喋血而游嗣昌捷春士奇不得辭其咎矣於戲玉生而忠勇歿猶靈異子若媳皆慷慨捐軀豈非有以教之哉真近代奇女子也陳鶴亭又言石碇志及馬氏家乘玉墓碑書明忠貞侯太子太傅字於都督總兵上鶴亭嘗親謁其墓洵然末書永厯四年某月日葬云攷明史無封侯及加宮銜事豈永厯追

贈之耶不然萬年豈不謬哉姑存之以俟博覽者考證焉  
兄邦屏亦歿於陣贈都督僉事賜世蔭弟民屏都司僉事  
晉副總兵葵嘗戒諸子曰汝曹皆能荷戈不忠於明者非  
吾子孫也皆唯唯晚年自號玉溪遺老當萬厯之時天下  
尙未大亂而教諸子皆成干城一家馳驅王路以紓國難  
女爲奇女子男爲烈丈夫忠義出於一門彪炳史策葵實  
教之何其賢也因並書之以補史傳之闕

## 王命續論

鱗族龍爲之王能上下天地興雲雷霖雨蒼生其形德才  
迴與凡鱗殊羽族鳳爲之王戴仁揭義身備五德非聖人  
在位不至其形德才迴與眾禽殊毛族麟爲之王歲星之  
精足不踐生物行中規矩其形德才迴與百獸殊夫三者  
物類耳一稱之曰王其異已若斯况帝皇乎一命之榮亦  
有數存况天位乎自五帝以降叛逆代興干戈侵尋班彪  
因作王命論爲覲覲神器者戒已足發聾震聵暮鼓晨鐘  
矣曷續爲竊念班論出而後世奸雄草昧自三代以迄於  
今不可勝舉欲得暢言真偽禍福庶幾覺悟愚頑以消窺

竊之心夫帝王者天之所生使作生民主父天母地兄日  
姊月柔懷萬國統馭四方得其人則天下樂安非其人則  
四海塗炭天之所以慎其選者當何如類皆上聖列宿誕  
降其生也必有異徵儀表亦迥與凡異亦猶龍鳳麟之殊  
乎鱗羽毛也自古及今可得而言夫軒轅孕二十五月而  
生生而能言高辛駢齒堯眉八彩鬚長七尺二寸足履翼  
宿舜目重瞳母感大虹而生禹虎準龍領耳有三漏首戴  
鈎鈴胸有玉斗此皆大聖人也無論矣湯生兆元鳥之祥  
臂有四肘身長九尺藉有國之資行仁布義者數十年網  
開三面澤及禽獸萬國傾心復因夏桀射天虐民始興師

伐暴東征西怨南征北怨民望之若大旱之盼霖雨賈者  
耕者不變其常所至簞食壺漿以迎之爲救民於水火之  
中耳周武之先太王王季文王積德累仁者數世三分有  
二文王猶北面稱臣至武王而紂惡益稔剝剔孕婦剖賢  
人心斲朝涉脛燔炙忠良黎民倒懸始伐暴救民孟津之  
會不期而至者八百國有白魚入舟之祥事定而朝野不  
改其列夫二王者天與人歸豈偶然哉向使桀紂不至毒  
痛天下納諫進賢遷善修德則湯武之終守臣節子孫永  
永稱藩也必矣豈後世篡弑者所可同年語哉故孔子無  
貶辭若嬴秦乃伯益之後累世功在王室穆公登進賢良

興滅繼絕救災恤鄰爲春秋賢君又兆碧雞金馬之祥故  
始皇能滅六國一海宇然亦戰爭數百年而後得其難如  
此而始皇不知逆取順守坑儒焚書罪浮桀紂旋得旋失  
子孫屠戮陵亦發掘究何益哉是皆身爲諸侯有所憑藉  
而然至於提三尺劍起草莽匹夫而膺九五益難如梯天  
矣自漢迄今千有餘年漢高祖而已高祖生而隆準龍  
顏左股黑子七十二微時嘗斬巨蛇有夜見老嫗哭於蛇  
旁者問之曰吾子白帝子也化蛇當道爲赤帝子所斬是  
以哭嘗匿芒碭山中吕后常求得之詢其故曰季所在上  
常有雲氣故知之又嘗爲羽所敗夜遁迷途忽見白光引

道遂得脫蜀漢昭烈帝雖起自民間實天潢之裔兩耳及肩手長至膝復得伏龍鳳雛爲之佐猛將爲之戰檀溪之脫神實相之然龍戰數十年僅得鼎足六朝時宋祖劉裕小名寄奴未遇時亦有斬蛇之異夜過其處聞草莽間有杵臼聲叱之見一媼搗藥問何爲曰吾子化蛇當道爲寄奴所傷搗藥敷之耳曰何不殺之曰寄奴王者不可殺唐太宗當隋煬之世英雄競起有虬髯者異人也亦欲舉事聞太宗英雄過人狀貌殊異疑爲真人是時有楊花落李花開之謠而太宗姓復應圖讖未敢妄動因邀善相者往訪之相者與劉文靜方對奕太宗褐裘而來顧盼偉如滿



坐風生相者一見慘然卽斂碁曰此局全負矣於此失卻局哉遂出語虬髯曰李郎龍行虎步天日之表他日太平天子也此世界非公有宜別圖虬髯見太宗心亦死遂以所收天下郡縣冊籍贈李衛公遁於海外而立業焉宋太祖之生於夾馬營也紅光照耀異香滿營彌曰不散三晡有紅羅浮至太后取以浴之周世宗嘗於書叢得簡帖書曰檢點作天子遂以太祖爲都檢點陳橋之役將士推戴以黃袍加其身奉爲天子固辭弗克明太祖生有異徵長具奇表余嘗見所賜鍾山王徐達御容曰角龍領豐顙隆準大耳方頤鬚髯如戟面上紅痣八十一眞創業英主也

少失怙恃家貧多疾遂舍身皇覺寺爲僧當是時豈有奢  
念乎然天命真主豈容蟲螫外紀所載頗多神怪辭雖不  
經而神實啟之異人張三丰左右之故屢瀕於危卒晏然  
無恙鄱陽之戰太祖乘巨艦劉伯溫忽請急易舟舟甫易  
艦已爲巨礮齧粉矣豈非天乎此數君者或兆異徵或生  
有奇表或人心推戴或百神効靈皆天也豈人力所能致  
哉然尙龍爭虎鬪或七八年或十餘年或百數十年出百  
死入一生始成大業豈尋常凡庸所可擬議哉閒嘗曠覽  
史策古來豪傑緣一念之妄而膺奇禍遺臭萬年豈不哀  
哉當秦失其鹿天下共逐之競起者八九國終爲漢滅而

高祖幾死者亦屢矣以曹孟德之才智晉爵魏王撫有北方之地尙終身不敢僭尊號袁術僭稱之不旋踵而國破家亡公孫述王莽不數年而滅陳友諒帶甲數十萬僭帝號卽滅張士誠僭王號亦滅明玉珍踞西蜀滅尤速至如南北朝五代諸僭竊不可勝計均等泡漚瞥眼皆滅苟覲覲非分曷異鯁鯁之欲爲龍鵠鵠之思變鳳犬兔之望作麒麟哉且有甚焉夫鯁鯁鵠鵠犬兔之妄思爲龍鳳麒麟雖不得爲龍鳳麒麟仍不失爲鯁鯁鵠鵠犬兔也若夫臣民一經輕舉卽干畔逆之條必致建置極典父母妻子爲戮且禍延宗親噬臍奚及雖欲求爲匹夫而不可得是皆

不知王者天之所命帝王自有真徒自貽伊戚悲夫此余  
續王命論所以作也



彭香谷雜紀跋

語曰十室之邑必有忠信蓋山川無地無之而靈秀之氣亦無山川無之其氣磅礴鬱積則發爲人文聖哲天民雖未易多得而名儒循吏忠臣孝子騷人名士義夫節婦固無地無之其間或顯或晦則如花飛茵溷各隨因緣有抱負非常寂寞空谷不見知於世徒興標梅隰沔之思者何可勝數屏邑爲西蜀僻壤地處邊隅輪廣數百里崇巒屹嶂怒濤洶涌山有錦屏之奇水有龍湖之異前明楊中丞楷白侍御圭皆正色立朝隱然爲一代名臣攷之邑乘仕宦科甲孝子悌弟亦代不乏人且向稱樂土自道光丁酉

馬邊雷波峩邊猺夷出擾焚殺剽掠老君山萬全營一帶多鞠爲茂草雖增設營汛歲糜國帑而患如故癸丑冬余權篆是邑下車後問疾苦察形勢知漢奸爲患捕獲數人嚴繩以法稍稍斂跡然非行李悝箭社法及團練精壯廣建碉堡使眾志成城戰守兼施其患未已邑紳彭香谷深以爲然正擬次第舉行而甫兩匝月事未竟予卽以艱去耆老深惜予行謂天不欲埽除腥穢登此方於衽席也予亦以政未成爲憾初予捧檄來屏山州刺史金薌谷謂余曰邑有彭茂才香谷者端人也通達世務夷人情僞道里險夷尤所深悉盍往訪之是以下車伊始卽造其廬抵掌

而談相得甚歡稍及夷情滔滔若決江河言多中肯蓋香  
谷曾饒典籍遊幕蜀中者數十年金薌谷沙鑑泉二君宰  
屏時嘗羅致幕中贊勦籌畫動合機宜地方稍治二君得  
其力居多予交替後因公小有句留香谷每夕必過予寓  
齋無炎涼態香谷長於兵事善屬文因出予所輯武備精  
要及存誠齋文集示之香谷亦衷其所撰紀事數卷示予  
其中山川風俗鬼神怪異水旱鳥獸時事靡不記載約數  
萬言於本邑事辨論尤精確可補邑乘之缺其他雜紀亦  
信而有徵非侈談怪異者同日語也異時積成卷帙梓以  
問世當拭目俟之茲行將別矣謹跋數言聊作飛鴻爪印



云爾

不計其功

三

### 增建恤嫠育嬰所序

記曰鰥寡孤獨廢疾者皆有養王制曰恤孤獨以逮不足無逸曰惠鮮鰥寡詩曰哀此惇獨又曰哀此鰥寡自古發政施仁未有不先斯五者蓋以五者迺天壤間之窮而無告者也非有仁人君子矜而恤之其不轉於溝壑者幾希我

朝以仁道治天下德洋恩溥遐邇罔遺是以天下郡縣皆設立養濟院育嬰堂鰥孤老獨廢疾莫不飽食暖衣老者安矣少者懷矣咸豐元年辛亥今

上御極親親仁民普天率土盡涵濡濺澤猶慮一夫失所

屢

詔直省養老恤疾舉報節孝雖唐虞夏商之隆曷以加諸  
愈忝膺民社躬逢其盛敢弗思盡厥職岳邑百廢具舉無  
事增飾性闕育嬰之典耳愈履任之明年於勤政課士除  
弊剔奸之餘慨然思補前宰之闕議建立育嬰堂且欲推  
廣

朝廷德意並添設恤嫠所庶鰥寡孤獨廢疾無或向隅商  
之紳耆僉曰此盛舉也某等敢不共勸厥事愈因捐俸爲  
之倡孝廉方正羅宗秩慨然捐白金二百愈猶慮一狐之  
腋未足成裘且下車甫數閱月信義未孚事尤難集適是

歲吳楚妖氛未靖奉檄勸捐助餉益當先籌軍需更未遑及此而各鄉紳民於踴躍捐輸之外賈其餘勇復醵金二千九百有奇曰請成公志余曰嘻是何風俗之淳且厚也其樂輸助餉急公奉上與國同仇也指囷不吝其勲善舉當仁好義也於是飭董事謝克志等購腴田百五十畝計歲入穀三百餘石買屋一區共三十餘間可住百人額曰恤嫠育嬰合院使寡婦貧而無屋者居之有拋棄嬰兒令住院嫠婦之無子者撫爲己子是孺子無母而有母嫠婦無子而有子也且嫠婦得子節操可期其益堅一舉而三善備焉嗚呼鰥寡孤獨自茲皆有養矣向隅之泣其庶幾

免乎所有應住應恤條規備書於左永垂勿朽

存誠齋文集卷十

香山何曰愈子持氏著

男璵  
璵同校

治河策上

良醫治疾兼治其本若徒治末而舍本則寡效而疾終難  
瘳今有患肝氣於此若徒用柴連尅伐之劑肝未始不暫  
瘳其復發也可計日而待至良醫則並滋水以養之涼血  
以解之則疾自己又有患脾虛於此若徒用苓朮以補之  
脾非不足以暫彊苟飲食稍失調其復弱也可計月而待  
至良醫既培養之必且補火以生之則脾自健治河之道  
亦然夫黃河之爲害自古已然春秋戰國時修隄防自固

以鄰國爲壑者無論矣後世天下一家四海皆吾赤子又以何國爲壑乎自漢迄今惟以築隄束水爲良策時或疏濬以納之開沱以殺之或增壩墩以禦之或引歸故道以復之或疏減水河以分之或修涵洞以疏之或浚濶渠以洩之或設牐以盈虛之歷代治河及所陳方略均不出此至漢賈讓三策上策謂勿與河爭地宜徙冀民以避之其說尤謬蓋是時黎陽東郡白馬間數受河患者黎陽卽今濬縣東郡白馬卽今滑縣冀州境也當水之衝濬滑爲最故有是論河遷徙靡常其經豫冀充徐凡數千里郡邑以數百使決他州亦將徙他州之民耶是徙之不可勝徙矣

且徙數千萬戶之民取之公則不能給責諸民則力絀此誠不達事理之論惟漢永平十三年王景治河功成厯晉唐數百年惟唐元宗時魏州一決耳然史祇言其修渠築隄鑿山阜截溝澗防遏衝要疏決壅滯十里一水門鑿德棣支河八以分下流之溜雖費以百億萬計而能致數百年之安治河之功禹後一人而已胡渭惜其未求禹故道余則惜其不更疏龍門以上之上流也至五代及宋始復爲忠明嘉靖間凡六決命潘季馴治之季馴亦治河之能臣其議不過謂通漕於河治漕卽所以治河導河於海治河卽所以治海考元明皆運漕於河亦當時故事非有奇



謀異論也其意亦曰當浚河堅堤而已矣仍事其末耳歷朝紛紜聚訟終鮮良策故患終不止治彼則此決治此則彼決自明及

國朝爲患益頻或十餘年而決或七八年而決或五六年而決或三兩年而決甚至前工甫竣而又決每決費水衡以億萬計致度支爲之告罄元氣爲之潛消當其決也數百里居民盡爲波臣廬舍膏腴盡爲斥鹵道光壬寅之役汴城不沒者三板居民果蛟龍之腹者不可勝紀蓋未能探河患之原兼治其本而徒從事於末亦猶醫者之治肝脾而徒用柴連芩朮也患烏能已余少讀歷代治河諸書

亦罔悉病之所由以爲大禹疏鑿而後厯虞夏安流順軌者四百九十餘年商五遷都以避水患始稍萌然爲禍未烈至周定王河徙礫砢始失故道自是泛濫南北四出於冀豫兗徐之區以迄於今爲患已成故事亦付之天災而已伏思我

朝康熙二十七年靳文襄曾設爬沙船以疏淤塞使沙隨流入海亦治末之良策也至康熙二十九年于勒恪廢之而河旋決蓋黃河水濁亦如涇河之水一石而泥數斗以千百年積淤之河用庸劣不職之員而疏之非爬沙船之寡效乃任非其人而賞罰不行也故當秋汛盛漲河不能

容所以橫流衍溢議者咎船而不咎人遽爾廢之殊可惜也又常閱邸鈔秋汛安瀾河員畢賀始以爲夏多暴雨秋多淫霖故治河使者以防秋爲急務意亦謂雨多則水漲河易決溢亦天時然耳迨道光丙午余于役西藏深入不毛者八千餘里沿途皆崇山峴嶻鳥道盤空無尺寸坦途天復嚴寒五月猶雪但不及地耳至八九月雪便積而不消深山大壑中有深至盈丈者人馬失足墜雪窖中須臾無迹其雪至次年六七月始融溝壑成河奔流潰下萬派悉滙於藏河或入黃河或注金沙江余始憬然悟中國河患及防秋之故夫以甘陝及西方諸國廣袤萬餘里山億

萬重一歲所積之雪當六七月融化盡入於千餘年積淤之黃河欲其容受其可得乎此河決之由也尙幸西藏金川打箭爐占對滇之麗江巴蜀五屯方萬里之地其雪融則入金沙江大渡河青衣江咸注於岷江匯而人大江東趨入海分河流之半不然雖有三黃河弗能容也堯時洪水滔天使鯀治之鯀盜帝息壤以塞橫流無功卽後世築隄京水之說也舜復舉禹而治之禹知其然故疏九河濬濟漯而注諸海決汝漢排淮泗而注之江以分下流之漲治其末也又窮本溯源逾鳥鼠越三危導河積石及於崑崙弱水分上流而殺其勢治其本也治其末則河無獨任

之艱治其本則無萬派下潰之虞禹跡徧九州四海百州無不疏淪功之所施名川三百支流三千勤勞况瘁者三十年然後狂瀾平而山川奠民始得安居粒食遂成萬古之奇功至於周患復作近代益加劇焉然則將如之何而可亦曰師禹而已矣師禹之跡徧九州疏百川旣乏禹之聖與神勢有所不能當師其治本治末之萬一可期百數十年之安如王景而已矣卽偶有橫溢其患亦輕宜於陝西厯城邵陽朝邑甘肅之蘭州河州鞏昌洮州臨洮甯夏等處擇黃河之所經審察地勢於平衍廣野及卑窪原隰開支河十餘又於支河開渠澗溝洫數百支河所以殺上

流之勢溝洫所以消支河之溢亦足灌溉田晦上流之勢  
既分則漲流入河者寡秋汎可保無虞而甘肅新疆數千  
萬頃之阡陌且盡成膏腴秋成足以供軍儲免挽運之勞  
且西鄙諸國多騎善馳突利平曠今平曠悉變稻田卽或  
萌窺伺之心其長技不能逞是一舉而三利備焉慮下流  
之不能消納也於孟津以東豫冀青兗之境疏支河以洩  
之凡黃河入海所經計地分汎汎愍五十里各置爬沙船  
二分左右道而行順溜由左則汴流由右船設文武各一  
員水手八名颿二櫓二舵後懸爬沙耙略如耕耙狀橫六  
尺排鐵鉤齒長五六寸者四十枚枚重三兩連爬共重不

得逾三百斤使勢輕而船易行責令上下往來梭織無停  
晷船行耙隨耙爬沙起隨流而下其已成洲灘者則施以  
鋤鋪隨而爬梳之行的一年則河自深通無壅塞之患此  
治末之說也上下流既鑿支河以殺其勢復爬沙以梳其  
淤則河患可已其舊日之隄則責成河督歲一小修勿使  
坍塌以防盛漲毋許浮冒有名無實濫糜國帑者罪之慮  
員弁之虛應故事也則設賞罰以鼓勵之其需次者終歲  
勤奮爬梳積滯河深通若干尺予以儘先委署優缺一次  
實缺則對調善地二年勤奮河又深通若干尺秋汛安瀾  
需次則予以儘先前補用實缺則予以陞銜三年勤奮不

懈又深通若干尺秋汎因之安瀾需次則予以陞銜實缺則儘先陞用先換頂戴若一年曠職需次者停委一次實缺者撤任二年曠職需次者摘頂實缺者鐫一階三年曠職需次實缺均落職文武皆同三載一更替至察勤惰辨深淺別功過則在大吏之留心體察務在破除情面無枉無濫而已如賞罰明黜陟公當無不奮勉自効仍如前之虛設無功者未之有也此治河本末兼治之上策也余於嘉慶年間趨庭東豫過河者屢矣是時河已壅遏而廣尙可二三里中無沙渚迨道光乙巳以獲盜入

覲復渡黃河寬僅及前之半中多洲隆起茂草芃芃然隔



二十餘年間淤積若斯無怪其決之頻也此爬沙船之所  
以不可少也有難余者曰爬沙船事簡而易行至開支河  
出自創始所費不貲誠恐財已竭於司農而功難成於邊  
鄙將若之何余應之曰昔岷江爲患巴蜀半成澤國禹於  
岷江之東鑿沱以分其流濬巴漢而納之江岷患遂息書  
曰岷山導江東別爲沱是也至漢時輒復爲患蜀郡太守  
李冰復鑿離堆而深之疏沱流之下爲三以避沫岷之水  
且引以灌田成都遂成沃野千里至今利賴之岷患遂息  
此支河之效也且往者河決數矣

國家開衡工土方豫東東河諸例天下踴躍急公費帑無

多而事已集如開支河盍亦倣此有挑河若干丈或數十  
百丈深濶如制者卽酌給官階翎枝其土著之民有挖若  
千丈或數十丈百丈者量給佃官地若干畝免租若干年  
皆酌其効工多寡以酬其勞如溝洫所在有利其阡陌者  
則責令田戶自濬若干丈毋使坐享成利曩者林則徐所  
墾新疆田畝亦可一律開支河溝洫卽酌調就近駐防兵  
丁以助工其助工者秋粒所入增其糧糈利能及已怨必  
不生且勇於趨事若是則所費有限卽有所費較之數歲  
一湮塞洪流所費以億萬計則已少矣以數十年間所塞  
不知凡幾所費不知億千萬計則尤少矣有不以余說爲

不言  
迂濶奏而行之則河患其少息乎豫冀充揚之民亦庶幾  
獲祖席之安矣

## 治河策下

余上策既本末兼治矣而河道亦當籌其盡善攷故道有二自河陰以西之故道終古不遷以東入海之故道自周定王時徙礫磬遂棄故道後更遷徙靡常冀豫兗青徐之間咸受其患勢不可臆測胡渭謂河本隨西山東下北去後世欲求故道而不得歐陽修亦謂大河已棄之故道自古難復漢賈讓請決黎陽遮害亭放河使北入海多謂合禹治舊道惜其策未行王橫亦請徙河沿西山足乘高而東北入海意皆欲復禹故道適際哀平之世國祚阨危皆寢未行宋之北流實行其導河入海之路孫禁則議決平

原金隄合入故篤馬河行五百餘里入海亦一道也許商

即明商決口之別派也

胡渭又

謂事當於理雖爲人所格天必從之故事機之善未有善  
於宋之東北二流者也此胡渭深是賈孫之議者也而余  
則善賈讓王橫之策雖未必即與禹道合而其理與勢固  
善矣孫禁之論則未盡然也攷宋太祖太宗眞宗仁宗朝  
澶濮滑館陶棗強原武溫縣滎澤頓邱曹濟屢決矣皆北  
道也孫禁說未足憑也惟王景治河築隄自滎陽東至千  
乘海口千餘里以入海蓋河分流遂從漯川導至東陽武  
與王莽故道合卒致數百年之安雖非禹河故道而後之

治河者皆當北面師事之夫水性趨下無分南北東西惟下是趨天下之勢亦利河北行吳玠王亞胡渭亦極言北流之利余亦甚以爲然蓋由北入海道近而隄防工用之費節且所經之郡邑不及南行之半縱偶有漫溢不過偏災南入海則道遠隄防工用奚啻倍蓰而所經之郡邑亦倍北道賈讓王橫之議若行更於下流挑沱河以分其漲堅隄以束其流更於上流甘肅新疆開支河溝洫以殺其萬派潰下之勢則數百年可保無虞次則循王景所治故道自滎陽東至于千乘以入海此則已收成效於前爲可憑也次則

國朝孫嘉淦疏請開減河引入大清河使北趨入海其言曰自宋熙寧十年河決澶州分而爲二一由南清河入淮一由北清河入海卽臣所言之大清河也北宋之末南北分流南渡以後河遂南徙史不言其故金人塞北流以病宋可想而知元初河屢北決輒復堵塞大德初決蒲口廉訪尙文言相度地勢南高北下宜順水性導之北行決口勿塞爲便有司卒塞之蒲口復決水全北流竟如文言元至正初決金隄等處丞相脫脫用賈魯充河防使大開黃河故道水遂安流賈魯稱善治河者亦導之北行未嘗使南也明洪武時河決陽武東過開封南入於淮而河之故

道遂淤正統決張秋景泰復決張秋東入於海宏治又決金龍漫長垣趨張秋衝會通河以入海按張秋並非河岸而史屢書張秋者以黃河北決必經張秋以潰運道史以運道爲要故書張秋也張秋之東不及百里卽東阿之山下卽大清河黃河決水不能踰山東走自必順河北行故凡言決張秋者皆由大清河以入海史有詳略有書有不書也白昂始治金龍決口塞決口三十六河遂入淮又以河徙入淮終非正道乃自東平至興濟鑿小河十二道引水入大清河及古黃河以入海是量開減河以入大清河古人已行之非臣創爲此言也我



朝運道河流皆沿舊制順治康熙年間河之決塞有案可稽大約決北岸者十之九決南岸者十之一北岸決後潰運道者半不潰者亦半凡其潰運道者皆由大清河以入海者也蓋以大清河之東南皆泰山之基腳故其道亙古不壞亦不遷移從前南北分流之時已受黃河之半嗣張秋潰決之日間受黃河之全然史但言其由此入海而已並未聞有衝城郭淹人民之事則此河之有利無害亦足徵矣孫嘉淦之建是議也亦據白昂之舊非臆說比亦河道之又其次者也又有難之者曰河道所宜子引古援今而斟酌之似有據而可信惟上策爬沙船之議余猶疑之

余曰君疑其始設而復廢乎夫始設者康熙二十七年靳文襄也考其制沙耙與混江龍二者約重千觔祇以四水手駕兩櫓其行故緩于勤恪以其鈍滯也奏請廢之船廢南河卽壞當時中外士大夫暨河壩吏民咸歸咎之後黨同伐異者又強爲之解謂巨艦乘風鐵錨一下卽止不行今爬沙耙重倍於鐵錨船安能動乎誠瞽言也夫米麥菽粟養人者也一日不食則飢旬日不食則死有飽食而致疾者遂謂米麥菽粟能致疾而廢之乎靳文襄之製吾未得而見之混江龍沙耙未必不可用其不善在過重船無帆篷四水手駕兩櫓耳且傳聞當時劣員黠夫攬載商貨

其重滯也固宜因其重滯而廢之亦猶飽食得疾而咎米  
麥菽粟而欲辟穀絕粒也豈不謬哉今製船形如海鯢首  
尾窄而身長則靈便爬沙耙重不得過三百觔船用兩帆  
水手八名駕二櫓乘風順溜行卽駛卽泝流而上有帆與  
櫓行亦必不稍滯豈可因其法未盡善而廢之乎又觀河  
防書海客謝某所陳方略云憶昔年航海常遇拋錨纜並  
無風浪船忽然移動舟人亦不解其何故今始悟海口潮  
溜潮小則面溜底平潮大則徹底奔流要知錨齒插入沙  
中則錨柄錨纜皆能激水下趨沖開海底泥沙則錨齒露  
出因而移動勢然也方今河底溜勢平緩不能挾沙入海

可否卽照激水冲沙之意用船千艘舵尾皆掛一披水板  
兩邊再加鑲板闊數尺長數丈以外洋堅木爲之加以石  
墜使一頭沉入水中其式如削瓜之鏤其板下製車輪一  
道離水底一二尺輪在河底轉動水從板下激出注冲河  
底再掛鐵篋箕於船腰且篋且汕自下而上逐節疏通船  
隻衆多乘風而上順溜而下使河底沙水刻不停緩冀可  
挾沙入海或亦節省人工之一法歟觀此說與爬沙船意  
同而所用披板鑲板鐵篋箕車輪石墜較沙耙且重數倍  
其法亦繁瑣難製又言呂宋英吉利疏浚海口淤淺用機  
紐轉盤鶯架播箕其法尤繁而難行費亦甚鉅外夷且不

憚而爲之彼老於江海者言如此則爬沙船之可用亦可  
知矣夫復奚疑

存誠齋文集卷十一

香山何曰愈子持氏著

男

璟

璠

同校

介子推論

介子推古之介者也從晉文出亡周旋患難間者十九年  
寒暑饑渴風雨雪霜十九年中辛勤備嘗矣公嘗飢不得  
食推且剮肉啖公矣在旁觀者必謂推功且不堪將來酬  
庸懋賞當如何矣迨公反國徧賞從亡而推不及推亦不  
言祿且無怨詞曰獻公之子九人惟君在耳天實寘之二  
三子以爲己功乎遂奉母隱於綿山盡盡勤而不居功若  
此可謂賢矣豈獨介哉而公忘患難相從之績爲不情食

人之肉以充腹而忘其忠爲不義焚山以求爲不仁晉文  
烏得辭其咎哉然當聞龍蛇之歌悟而求之悔心已萌欲  
自補過矣亦可出矣而推不出似近於懟及求而不得焚  
山以逼之更可出矣縱浮雲富貴出而辭祿仍不失爲介  
也卽不然負母而逃隨麋鹿而處其介尤足稱也乃抱樹  
就焚輕父母之遺體使母老失養可謂孝乎未審推有後  
否也使似續尙虛身死嗣絕致若祖若父荒壟餒鬼乏紙  
錢麥飯之獻可謂孝乎當焚山烈澤時未知其母已逃否  
也使逃而獲免則返哺者何人若母亦與其難而身求介  
名致母不考其終則不孝孰大焉死有重於泰山有輕於

鴻毫者取義成仁死忠死孝重於泰山也不合於仁義則鴻毫而已耳推之死於鴻毫不亦五雀六燕乎余曩常欲論之久矣以高其介而悲其遇未嘗不爲之搥腕太息而責晉文之憤憤不忍下筆然有傷子道如彼其介也得勿矯乎且與聖人教子之道刺謬甚爲推惜春秋責賢者備是以終論之爲好名忍親者晨鐘焉然視後世鄙夫求榮固寵患得患失無所不至者則又不啻霄壤矣



--	--	--	--	--	--	--	--	--	--

敕封文林郎晉贈奉政大夫畢君雪傭墓誌銘

咸豐六年十二月十九日前貴州畢節縣知縣

敕授文林郎晉封奉政大夫畢君卒享壽六十有四君諱楚珍字士珩雪傭其別字也畢公高之裔世居江蘇之太倉州春秋時畢萬者仕晉爲大夫有功封於魏戰國時畢戰者仕滕爲大夫晉畢卓官吏部郎南北朝畢元賓累功封須昌侯畢誠仕李唐爲禮部尙書同中書門下平章事畢再遇事趙宋爲武信軍節度使贈大尉諡忠毅爲當時名將畢仕安仕終參知畢享事明爲應天府尹代有聞人國朝弇山人宗伯諱沅乾隆庚辰大魁天下以兵部尙書

總督兩湖君之從祖也祖諱瀧兵部車駕司郎中皇考硯山公諱繼曾河南黃沁同知妣陸太宜人君兄弟五人長毓珍候選從九品次文玉弱冠入泮有名士之目屢試未第齎志以沒次卽君次文翰太學生次嘉珍邑庠生君少沉默於伯仲中尤篤學綺歲卽知名稍長硯山公陸太宜人相繼逝君扶櫬歸里喪葬盡禮旋以家徒四壁孑然一身復游大梁遇考城令吳楓亭詢悉家世憮然曰故人之子也招爲記室以君謹厚學有本源深重之以女歸焉卽淑配吳宜人也君自是益發憤力學遂登嘉慶戊寅恩科賢書旋考取景山學教習道光辛卯選贛榆教諭贛

邑文風久不振登鄉薦者寥寥君毅然曰作育人才吾輩事也余敢以閒曹視之於是課諸生甚嚴並選秀民子弟聚而教之訓課講解寒暑無間邑人士以君善誘不倦咸樂從之游而執經請業者履舄交錯於庭矣未幾汪元愷龍方幹等相繼登甲科鄰邑沭陽荐饑海州牧廉君才且任事不苟檄司賑事君徒步稽覈分別等差民咸沾實惠存活甚眾時方隆冬君衣弊裘更有以珍裘獻者君曰此百口待哺之資也却之緣是人不敢干以私次年沭陽蝗州牧復檄君往捕沐雨櫛風晝夜宣勞而蝗蝻盡歲賴有秋秩滿以卓異薦赴都之日祖餞者繯屬於道二十

里不絕有戀戀泣下者癸卯君出宰貴州權綏陽縣篆兼  
桐梓事綏陽故事里徭繁重民病之君下車卽爲裁革民  
立生祠祝之旋署湄潭畢節皆有聲任畢節之次年值歲  
不登君請發常平倉以賑格於吏議君遂獨力任之先捐  
俸爲之倡復勸諭富民巨賈平糶與賑粟並施民免於溝  
壑者君之力也次年復疫君固精岐黃術日坐廳事診視  
施餌自夏徂秋所活無算畢民德之繪像以頌遺愛是時  
粵西盜洪秀泉反荔波與粵畎澮相接大府思得幹吏以  
堵其衝飛檄調令荔波以資保障君不敢顧戀身家星夜  
馳往繕城捕奸召募勇士賞罰信明咸思敵愾孤城卒保

無恙而君以馳驅瘴煙毒霧間勞筋焦思緣是得疾謝病  
歸行李蕭然囊無長物就養於嗣君庭璜灌縣尉任所甫  
三載疾復作遽返道山矣以吳楚盜賊蠭起道途梗塞遂  
以某年月日卜葬於灌縣青城之麓佶嗣四人曰庭琥候  
選從九品曰庭璜卽灌縣尉也曰庭琮庭璋皆業儒女公  
子四人三均適宦族季幼待字孫三詒符詒穀詒穎俱幼  
孫女九長適呂氏餘未受聘銘曰

青城峙其西岷水環其東隆然中處者實爲君之宮



## 劉節婦傳

劉節婦者灌縣張國瑞之女同邑劉天林之妻也生長農家而貞靜成性曉大義年十九適劉氏翁早卒事姑以孝稱生子甫週齡而天林病歿婦年二十八矢志其姜而衰姑在堂家綦貧仰事俯畜無以爲生父母憫其零丁貧苦欲嫁之婦不可強之婦曰女子之義從一而終所以不卽死者以白髮之姑待養黃口之兒待哺耳苟渝初心白髮黃口何所賴乎遂截髮自誓父母以其志堅事遂寢而家徒四壁饔飧操作悉賴一身幸夫在時佃大姓地數晦婦於是躬自耕耘辛苦備嘗雖歲收數斛麥而一家數口衣



食所需甘旨之奉僅給半歲之供乃佐以女紅盛暑不操  
扇隆冬無絮衣常自忍飢寒而高堂衣食無缺姑卒喪葬  
如禮子稍長無資就傅念母勤劬遂學稼以代母勞賃傭  
得值輒市肥甘奉母長娶於某氏咸豐三年婦七十六而  
卒飲冰茹荼者四十餘年始終一節州里戚族莫不賢之  
當婦卒時其子先患疫將就痊矣及母歿一慟亦絕孫三  
人均凜遵祖訓勤儉力穡能自樹立家稱小康吁翦髮自  
矢志堅金石婦之節也奉養衰姑生盡力而死盡哀婦之  
孝也撫子成人使劉氏似續有賴婦賢也余是時以讀  
禮閒居緣遭時變僑居灌邑聞劉易齋茂才爲之請旌道

其事甚詳余曰有是哉若婦者可以風矣因走筆疾書爲之敘次其事以俟他日修邑乘者采焉



送李伯龍序

川嶽靈淑之氣蘊蓄既久必發爲瓌偉卓犖非常之士故詩詠申甫則曰維嶽降神生甫及申孫子荆亦言曰其山隸聿以嵯峨其水泝淥而揚波其人磊落而英多然則邁軼羣倫之士其爲山川孕育也奚疑是以恆嶽鍾靈而生堯塗山鍾靈而生禹華岐鍾靈而生文武周召泰岱鍾靈而生孔孟顏曾此其大焉者也次則班馬鍾於終南屈宋鍾於衡嶽二程司馬光鍾於嵩洛海剛峰邱瓊山鍾於五指張曲江鍾於庾嶺錢鏐鍾於天目所鍾之賢才大小雖各殊其爲山川所鍾則一也道光壬午余遊英德上登嶠

嶭下泝清流仰觀俯察見其高者則硤砢崛岉蔚然森秀  
窪者則浩淼汨潏泓然瑩潔晦明變幻朝暮異態氣象萬  
千不可名狀意其間必篤生偉人期得而旦暮遇次年得  
晤李子伯龍於羊城軀幹修偉異之因邀之旅邸沽酒對  
酌放論古今議論風發無所詘撓自是往還無間晨夕其  
文章宏深雄闊莫測涯際伯龍固英德人意者卽鄉所謂  
卓犖瓌偉非常者耶然懷璞未售徒抱卞和之嘆吁人生  
知己抑何其難哉茲伯龍有齊魯之行將泝沅湘登嵩岱  
曠覽天下山川以抒其抑塞骭髀之氣余謂川嶽旣育非  
常之士必有以位置之豈終牢落無偶徒友漁樵而伍麋

鹿肆情於山水間已哉茲因其行欲廣其志故重之以辭



與某執事書

某頓首謹啟某官執事閣下牧令乃親民之官上應列宿  
官雖不甚尊然膺民社之責握生殺之柄喜賞怒刑得其  
人則百里蒙其澤否則百里受其殃故漢宣帝曰與我共  
治者二千石與良有司耳閣下前蒞某邑頗有蜚語曹好  
曹惡亦近日宦場惡習殆說者過當未足爲閣下累今處  
繁劇嫉者益眾願謹之於始一洗浮言毋使聽者惑焉幸  
甚某讀循吏傳見古之良牧令所至礪廉隅問疾苦同好  
惡布教化興學校鋤奸宄掖良善卹鰥寡正躬恤物革害  
興利爲國家培元氣爲風俗憂頽靡勞心焦思不遺餘力



而上官之喜怒身之黜陟子孫之田宅不介於胸中未嘗  
不爲之掩卷三歎以爲官無尊卑澤及生民則流芳百世  
所謂廉吏不可爲而可爲者此也若夫逢迎奔競附勢趨  
炎某官權要將如何以悅之某人當道將如何以結之中  
心營營膏以繼晷地方之利弊不知民間之疾苦不恤此  
俗吏之所爲閣下當亦鄙之雖虎膏腴縻好爵未嘗不足  
以快一時而百年後自居何等視德業脩於身循績昭於  
時榮名垂於後者孰得而孰失知閣下必熟計而有以自  
處矣某何足爲閣下慮閣下清門德冑治譜家傳素以良  
吏自期願將夙昔所學措而施之坐而言者起而行之某

將傾耳以俟知交有素言無忌諱且愚性戇直心欲有言  
如袁簡齋所云若骨鯁在喉必吐之而後快尙冀亮之某  
作吏數十年想愆尤叢雜亦欲借助他山願勤攻其短勉  
其所不逮使得寡過焉幸甚不宣



存誠齋文集卷十二

香山何曰愈子持氏著

男

璟

同校

愛蘭說

人莫不有所愛林和靖愛梅以其鐵幹橫斜標格異也色香兼備冒雪而開如松柏後凋不以歲寒易節其實亦鼎鼐之所需賢臣高士倫也故宋廣平爲之賦愛之宜也周茂叔愛蓮作愛蓮說重其品也其花固可愛且出泥滓之中皜然自潔處塵垢之內纖埃不著君子之體也根葉蓬實復有濟世之功君子之用也茂叔愛之亦宜也余於二花固愛之重之嘗屢詠及之矣而性尤愛蘭貴其品高而

德充也夫百卉多以色勝而寡香或香矣終未若蘭之清  
芬鮮匹故孔子贊爲王者香自衛反魯見蘭蔽於蕭艾之  
藪自傷不逢時援琴而作猗蘭之操顏師古亦以國香稱  
之黃魯直則謂似君子蓋蘭之見重於聖人賢士大夫久  
矣以其雖託根於深山窮谷高士屐齒所不及遊人足音  
所不至而芳菲自若馨芬孔揚如君子之德行脩於身不  
知不愠遯世無悶也德之充也園圃中紛紅駭紫莫不爭  
妍取憐嫵媚自衒而蘭素蘅碧穎不與凡卉競豔冶而氤  
氲馥郁無風自遠亦猶逸士之身無媚骨恬澹自守不以  
色悅人特立獨行不務奔競也品之高也百卉花時則土

女遊賞紛紛紘紘下自成蹊非不足自豪也而一經風雨  
飄落泥塗或遇霜霰則葉隕枝空或莖摧條瘁無復佳觀  
矣蘭則不然既曄於春秋足供幽人之佩即使斂華弢芳  
而縹帶緗葉青翠四垂隨風搖曳其幽姿雅韻亦自可愛  
不同常卉之徒以花勝也質之美也具此德品質之三美  
余故重之愛之此斯說之所以作不使蓮梅之獨擅千古  
也

[illegible]

## 守遷說

自古修建城池者所以備非常衛民生也然亦必須藉民  
力以爲固何者蓋國家經費有常額兵無多以省會言之  
軍督提三標額兵不過五六千名郡城不過三四百名及  
二三百名守捍已形單弱至如州縣駐防者兵多不過十  
餘名少則數名而已城雖小而雉堞數千以數人站堞安  
在其能禦暴乎是以必借資民力民雖勞烏可已也況勞  
其力正所以保其身家子女玉帛也且守城之道未戰而  
決勝者有五寇遠涉而來足繭履穿筋力疲乏我養其全  
鋒以逸待勞勝之道一也仰攻者難俯擊者易寇雖有



不言卷之三 二、三  
炮火可恃我亦有炮火之利況我有城郭之衛寇無城郭之蔽我從高擊下以有蔽擊無蔽其損傷必多此勝之之道二也彼爲反叛之民以逆犯順我奉

天子威靈爲生民捍患堂堂之陣正正之旗代

天行誅以順擊逆勝之之道三也兵法云千里饋糧士有飢色彼跋涉山川負糧裹餽勢必無多其所恃者因糧於民我堅壁清野以俟之使擄掠無所安能枵腹而與我曠日相持此勝之之道四也我有高城深池之險我欲戰彼不知所守我欲守彼不得而戰操縱在我此勝之之道五也我有此勝道五何爲而不守乃播遷以避之乎或曰我

得此五勝可坐而勝敵耶抑更有策也曰善哉問乎雖有此五勝安可恃乎守城之法禦攻之具登壇必究武備全書汧汧百金方紀效新書鄉守輯要諸書言之已詳當先講求精熟始免臨時張皇而其大要尤在峙糧芻籌庫貯安輯貧窮揆詰奸宄召募壯士備器械修樓櫓嚴號令信賞罰激忠義一眾志搯險要多偵候謹防禦勤巡警禁誼譁與眾同甘苦隨機應變出奇制勝不爲詐誘不爲強怵毋輕出戰毋妄追襲非操必勝之算毋得輕舉妄動待其懈出奇兵以擊之斯乃守城之要策也糧足械備則民心固庫儲充則獎撫有資貧民安奸宄絕則無蕭牆之患號

令嚴賞罰信則眾用命忠義明眾志一則上下力并險要  
搃則寇有所顧忌偵候多則敵情預知防禦謹巡警勤則  
無倉卒之虞誼譁息則民志定甘苦共則士樂死應變出  
奇則足以破賊立功昔田單守卽墨趙襄子守晉陽劉鋹  
守順昌朱爕元守成都皆以寡勝眾以弱破強胥是道也  
若聞警張皇各謀遷徙真懦夫下愚也夫離百年之鄉土  
拋先人之壟墓客寄異鄉或舍城池之堅固而就鄉間之  
砦堡紛紛逃竄捆載囊橐繼屬道途姦民見之而生心土  
匪乘間而刼掠是寇未至而先已被禍矣不聞安慶九江  
揚州鎮江鳳陽滁州諸郡紳民移徙者多爲土匪殺戮攘

奪乎此前車不遠亦足爲鑑已惟廣西桂林湖南長沙官民一心相與守卒皆保全又明季張李之亂毒徧天下所至坵墟盧忠烈備兵大名時教民築堡自衛保全甚眾嗣撫鄖陽教民併村立寨築守如前鄖民知大名之效踴躍奉行鄖屹然遂成巨鎮賊不敢犯夫一砦尙能自守況城池乎蓋寇本窮民耳非有黃育之勇孫吳之智戰勝攻取之能也彼能殺人我亦能殺彼何所畏而流離播遷以避之任其橫行而垂手乞命乎且我能往彼亦能往而賊偵知遷移所聚富戶必多子女玉帛益廣其垂澁力攻又必然之理也是欲避患而反招患也是則守與遷之利害

判然矣可不猛省城居者安於城鄉居者安於砦力圖守  
固眾志成城雖有強寇安能肆其毒螫矧茲烏合之眾哉  
果能各振懦弱之氣既克保身家復得忠義豪傑之譽兼  
邀

朝廷爵賞之榮豈不美哉近聞成都士民間有河南歸德  
之警擣家播遷者紛紛予深悲其失策因作是說以破其  
惑如聽斯言修爾戈礪爾矛其敵愾同仇則西蜀地方幸  
甚西蜀生民幸甚

玉帳狐腋自序

兵者凶器戰者危事古聖王戒之於是漸民以仁摩民以義節之以禮和之以樂優而游之使自化之是以奸慝不生暴邪不作民無兵革之災野無戰爭之患故鳳凰鳴於庭麒麟遊於囿景星現慶雲出天下垂拱而治迄軒轅之世蚩尤作五兵兵始興於是風后作握奇經陣圖始濫觴矣及周呂牙作陰符著六韜用兵之法始講矣自兵法出而兵遂不可廢故孔子曰有文事者必有武備至春秋戰國時黃石鬼谷孫武吳起穰苴之徒作而用兵之道精益求精卽武侯忠武志及諸家言兵者皆以諸子爲宗而武

侯增演陣圖十五究極蘊奧精微莫測未可淺窺君用失其將是以國與敵也將用失其道是以卒與敵也故用兵之法不得不究也余少習章句壯好韜略嘗讀留侯班定遠武侯傳竊慕其爲人以爲男兒生逢盛世不能建奇勲偉績書之竹帛傳之無窮徒爾沒世而名不稱當亦丈夫所憾也於是撻羅諸家書伏讀有年揣摩小成然論兵凡數十家其最著者莫如登壇必究武備全書太白統宗兵鑑幾於充棟汗牛學者難究其微旨至虎鈴經海澣百金方荆川武編紀效新書百戰篇鄉守緝要諸書卷帙雖不甚繁但不失於冗卽失於略因於暇時參訂諸書爰爲提

綱挈要嚼華咀精雜者刪之簡者詳之晦者顯之缺者補之  
之釁括成章著爲二十一篇又採古陣圖及攻守水陸器  
械占候節略共作 卷名曰玉帳狐腋言簡而賅法備而  
約行笈旣便於攜帶玉帳復易於翻閱未必非登壇之一  
助也歲次道光丁亥荷月上浣嶺南子持子自序





永康胡氏七烈合傳

永康胡氏浙之望族也

誥贈中議大夫崇祀鄉賢仁楷者與弟

誥贈武功將軍仁柳皆克敦孝友好善樂施見稱於鄉里而教子尤有義方中議贈君以子兵部員外郎候選道鳳丹貴武功贈君以子副將鳳鳴貴鳳鳴爲人英姿雄偉少讀書明大義通武略登咸豐壬子武進士

欽點侍衛咸豐三年逆賊洪秀全反陷踞金陵黨羽四出蹂躪遍天下浙密邇金陵鳳鳴念親年老頻警風鶴乞假歸省遂團練鄉壯爲捍衛桑梓計間謁浙帥慷慨陳守禦

方略浙帥遽之疏留在籍辦理團防是時賊陷皖鄂犯充豫所至無堅城海內震動諸道戒嚴而甯國與浙毘連浙門戶也賊欲窺浙圍甯急浙帥遂檄鳳鳴隨鄧提軍紹良往防勦鳳鳴弟武生鳳雛膽勇過人亦欲殺賊立功遂與兄偕往未幾卽克復甯國縣城兄弟論功居最鳳鳴擢遊擊

賞戴花翎兼協勇巴圖魯名號鳳雛授藍翎千總嗣以固守南陵相持數年與賊屢戰皆捷鳳鳴遷參將加副將銜鳳雛累陞遊擊

賞換花翎賊久涎浙以鳴雛兄弟搯其衝不得逞遂迂道

豫章欲由廣饒以入浙，雝奉調赴援江西，抵景德鎮，破賊壘十餘，每戰輒居前，敵賊憤甚，與僞王某等合蟻聚，麇至鳳雝中，飛礮歿於陣，事上聞。

吉照參將例議恤，自是賊勢益張，浙中郡縣次第淪陷。浙撫飛檄調鳳鳴回援杭城，而金衢嚴俱已先失守。道途梗塞，鳳鳴乃取道壺鎮轉戰至台州，賊圍之數重。鳳鳴以孤軍血戰，亦中礮陣歿。其季弟鳳恩，書生也，奉母避匿山中，聞兩兄耗，拔刀斫地誓殺賊，復仇。因招集兄舊部得千人，激以忠義，禦賊於東陽。鳳恩大呼陷陣，憤不顧身，部下亦殊死戰，賊爲之屢卻，相持數日。賊訶知鳳恩無外援，復大

至卒以眾寡不敵力竭亦歿於陣而武功贈君三子俱與賊戰死矣咸豐八九年間金華郡縣相繼失守十一年永康城再陷中議贈君之六子鳳岡者由附生議敘選授鄞縣訓導以身際時艱遂不之任與從兄某團練分堵要隘眾倚爲長城鄉村賴以保全未盡焚掠同治元年杭嘉湖均失守妖燄益熾勢成燎原力不能支旋被擄賊以其團練日久紀律嚴整愛其才欲降之不屈強授以僞職不受猶未忍殺之而監守頗嚴度不能自脫於是水漿不入口者旬日強之食不食至昌化卒賊義而藁瘞之並書其姓字里居表於墓後二年其兄鳳丹銜恤歸里始求遺骸具

棺葬之其弟邑庠生鳳韶中議贈君七子鳳丹觀察弟也當永康城再陷村落盡成丘墟鳳韶所居距城三十里自知不免乃令男婦老幼各自爲謀吾軀羸不任奔走惟一死以完吾節不墜先人家聲耳旣而賊至被執抗聲罵賊賊乃之罵益厲遂被殺其子宗壽侍見賊戕父亦涕泣罵賊賊並殺之胡盧氏者中議贈君第五子鳳標妻也當賊卒至自念逃將焉往不逃則被污遂投水死賊退得其屍面色如生其夫鳳標禮葬之中議贈君二子一媳一孫死賊者凡四與從兄鳳鳴等死賊者共七人鳳丹觀察旣上其事於大吏請旌恤於

朝余就養皖藩署得晤胡觀察爲余道前事甚詳且請爲之傳余以馬兩農學士李恕皆廉訪已先爲作傳再辭不獲因自忘其不文次其事而書之且備太史氏他日之採云

贊曰洪逆之亂也蔓延十七省肆毒十三年死於賊者詎可勝數然有傳有不傳卽幸獲旌恤傳矣而乏秉筆爲之紀載事蹟不彰是傳仍與無傳同也若上邀

朝廷旌恤之典又得文人爲之紀載其事使榮名垂於後忠烈顯於時不可不謂幸之又幸者也胡氏一門七烈或死忠或死義或死節見危授命所謂取義成仁者非耶然

鳳鳴鳳雛鳳岡受

國恩而死國事忠矣烈矣至鳳恩鳳韶未嘗委贄原可無死而一則爲兄復仇一則守節詈賊視死如歸宗壽隨父不離盧氏可避不避慨然子死父婦死節其義烈均有不可泯者雖皆天性使然而仁楷仁柳兩贈君平日義方之訓亦可見矣事定後又得其兄鳳丹爲之訪遺事求遺骸請旌恤又浼秉筆者爲之表揚嗚呼七烈者雖死猶生可以無憾矣





存誠齋後集卷十三

香山何曰愈子持氏著

男璟

瑄同校

欽差幫辦兩江軍務振威將軍江南提督巴圖魯勇號張

忠武公

國樑

家傳

公名國樑字殿臣廣東高要縣人祖以上皆力農父某早  
世家貧公負販養母性勇敢孔武有力道光甲辰映吉利  
犯順廣州及附近郡縣皆戒嚴募勇防守公投營充健兒  
屢立戰功事定善後者處置乖方盡撤諸勇無所獎勵軍  
饟亦多蒂欠諸勇以戮力數年人生出死功既不錄賞亦  
不及頗有怨言而公獨退歸農庚戌廣西盜洪秀泉楊秀

清馮雪山等反煽惑諸勇以爲羽翼附之者衆公爲衆所脅不得已而往旋聞有招撫之令是時向軍門榮駐師桂林遂拔身來歸偕者五人或疑其譌已斬者四矣及公桂林朱伯韓侍御謂其誠篤力主赦之向帥亦偉其狀貌使留營効力給經制外委銜每出師輒請居前敵大呼陷陣所向克捷每勝輒進一階稍稍遷至都守而洪秀泉等裹衆至十餘萬進攻長沙不克遂進陷武昌破安慶蹂揚州踞金陵所至無堅城而諸路奸民復起而附之衆至二十餘萬遂北犯豫晉兗冀勢張甚天下震動京師各直省皆戒嚴徐帥廣縉拏問

詔向帥充

欽差大臣督師進討是時賊氛正盛向帥重公膽勇倚爲  
左右手每出師未嘗不在行間大小百戰斬馘無算

顯廟亦耳熟公名不數年由偏裨擢至提督

優詔褒嘉

賞戴花翎賊畏公如虎見公旗幟卽萬眾辟易向帥卒遂  
有幫辦大江南北軍務之

命

賞穿黃馬褂

賜雙眼花翎益異數也公感

上恩遇遂以滅賊爲已任大帥和公春亦自以爲不及軍務皆由公指揮公益自淬厲奮不顧身天下咸仰聲威朝廷亦倚爲長城於是統大軍及親軍三千兩次克復鎮江及丹陽金壇揚州溧水句容六合高淳等數十城又奪馬嶺雨花臺大勝關銅陵開九洲諸要隘賊險阻盡失公遂進圍金陵而金陵乃明太祖建都之所堅峻甲於天下鍾山龍蟠石城虎踞大江環其三面東阻上新河賊復築天保城於鍾山濬內外濠城中死黨十餘萬據險固守糧糧山積公以二萬孤軍攻其一隅且無一旅之助故前後圍攻屢次未下聞某月日夜公左挽藤牌右握短刀四

鼓駕雲梯冒矢石登城隨者二百餘人惜無繼至之師城上賊知官軍登城風馳雲驟而來公寡不敵衆率親軍下身亦重創於是築距堙斷賊糧道賊窘甚數出撲我壘輒擊走之是時黠賊僞忠王李秀成亦在城中謀解城圍因約外賊爲援欲腹背襲我軍公謀知之分兵設伏復兩敗之斬給數千賊屍枕藉內賊終不能出外賊亦不能入城中尙十餘萬至以草藥爲糧羅掘殆盡衆心驚惶李秀成與僞干王等謀曰蘇杭爲天下財賦之區若約外黨攻之張某必親援則金陵之圍解矣衆然其言遂令其悍黨攻杭州破外城杭州求援急公乃分兵遣總兵張玉良往玉

良假公旗幟賊以爲公來遂棄杭走及偵知援兵非公也  
遂徑趨鎮江益以守鎮江者和帥公之主將也主將困料  
公必親援則事濟矣旣而公聞和帥被圍果撤金陵之師  
間關數百里親援鎮江金陵賊見公兵退遂率眾尾其後  
公前後受敵幸賊畏公未敢逼而公因勞得疾及抵鎮城  
賊大至公欲扶病出戰左右力諫願出退賊允之及左右  
與賊戰我師少却公憤然曰固知非我不能也遂領親軍  
開壁而出我軍復奮勇力戰賊見公出正欲奔北忽大帥  
某隊中有逆奴持洋鎗從後擊公鉛子透內公傷重墜馬  
萬眾屬目公親軍皆不戰而譁少頃公卽斃於是我軍皆

潰賊返旆逐我師賊恨公深喜其死羣攢刺之身被數十  
槍體無完膚某帥見公爲已左右所斃恐獲重譴諱言公  
死故初奏謂公無下落旋思公之死三軍目覩慮難終秘  
獲罪且不測遂自戕或云退至許關投繯自盡鎮郡復失  
蘇杭相繼淪陷不數月浙江郡縣亦皆失守歸然獨存者  
惟温州一郡耳江蘇郡邑亦半沒於賊或謂賊擾三江兩  
湖者十餘年蘇杭爲天下名區而公未死蘇杭安如覆盂  
無狗吠之警及公陣沒未數月而蘇杭卽沒於賊則公之  
生死實關蘇杭之安危卽金陵之克復緣公築長圍斷其  
糧道賊勢始蹙克復之功公亦與有力焉初公之被害也



無不湑歎搯擊及歲餘

朝廷亦稍知公盡節事始

賜謚忠武世襲一等輕車都尉

今上卽位嘉公功

賜祭一壇

恩命有加余是時在蜀公事蹟皆出自傳聞嗣就養皖江  
詢之皖人能稍道其功績及死節事然不甚詳後覽王子  
壽比部漆室吟有輓張軍門及咄嗟復咄嗟行二詩讀小  
敘言公被害事謂賊憚公不得逞故重賄某帥奴圖之云  
余在蜀時遇公帳下材官某於歸州旅邸言公脩幹挺挺

曰若曙星紀律雖嚴而接下謙和平時未見其有怒容臨陣能於馬上接飛矢每戰手提大刀立馬陣上先揮左右軍出勝則麾親軍分兩翼衝入輒大勝如左右軍少却或將潰下卽率親軍身先陷陣縱橫盪決則萬眾披靡常以此取勝蓋深得李衛公遺法善於用奇故賊憚之見黑旗輒避其所練親軍初不過三千嗣四圍金陵數且倍之所向克敵又云賞罰公明微功必錄至其弟及親屬之在軍者卽有功保亦不及或以爲言不應大帥知之始得列名薦章然左右以功保至提鎮者十餘人副叅遊者百十人而其弟位不過都司性尤廉潔每破賊所得金帛盡散給

軍士鎗銖無所取尤有難者營中無虛糧軍籍皆按名責  
實軍糗無虛糜且戒翼長隊長毋得扣剝故統兵十餘年  
身後無餘財斯則近世所未有者也被害時年未四十天  
下惜之嗚呼天不永公年使賊未盡滅中興之功未得身  
及其成悲夫

致王子壽比部書

子壽執事閣下 某白道光乙巳入都於友人處得覩閣下  
歌行爲之擊節贊歎以爲嘉光詩人如閣下者能有幾哉  
當亟錄於退菴詩話中以識傾倒而是時閣下已乞假歸  
方謂班荆無緣然心交者已十餘稔矣至同治紀元 某亦  
引疾歸本擬息影蓬廬匿蹟西樵白雲間伍魚樵而友泉  
石肅傲烟霞以適餘年適兒璟有觀察廬鳳之

命乞假繞道來省迎養情切未忍却其請復作出山之泉  
且補游江浙諸名勝計亦良得遂泛漢湘游皖鄂竊喜密  
邇珂鄉藉茲把臂不意文旆訪舊漢江竟惠然左顧得翦

燭西窗傾懷竟夕不可謂非天假之緣三生石上一段夙  
因也本擬攀留行鶴作十日之歡而閣下堅意解纜匆匆  
返棹未得暢聆霏屑爲歉某於詩一道性雖好之而不常  
援筆自以春蛙秋蟬徒事聒耳隨手散軼者十之三少年  
之作亦十不存五前呈四冊本無足觀乃承賜以大序過  
蒙獎借何敢當然文之樸老古茂敘事是寫生手其氣味  
深醇則似六一波瀾動蕩又逼近玉局可謂極此中之能  
事未段有弩矢機弦之喻發人所未發誠千古篤論使有  
器無機縱挾莫敖之矢綦衛之箭而不遇烏號濬盧與骨  
髀鉛簇何以異試觀一部廿二史懷利器而老於山巔水

涯者豈少哉讀閣下漆室吟歎閣下抱經濟才而未竟其  
用今亦將老於螺洲鶴澤間亦器之不遇機弦者也閣下  
爲某搯擊某於閣下亦然幾欲搔首問蒼天矣四月廿四  
日某謹白



## 百駿圖跋

古來以畫名家者代不乏人而山水花卉尤盛蓋山水花卉隨手點染由我心造且易於應酬至以人物擅名自唐以來屈指可數蓋繪物須肖其物態狀固屬百變而阿堵傳神尤須妙悟唐吳道子明仇十洲皆以畫仙佛稱而道子畫龍尤稱絕技余嘗於彰德天甯寺見所畫龍絹寬五六尺長丈餘中畫白龍蟠屈攫拏鱗爪閃爍飛舞似欲破壁飛去遇歲旱寺僧輒懸掛禱雨頗有靈驗至有明一瓢道人出亦以畫龍擅名與道子方駕頡頏道子以工筆勝一瓢以水墨勝各極其妙余家藏一瓢六龍卷子騰拏上



下雲氣滂渤筆墨盡化爲烟雲化工筆也顧光寶以畫獅  
稱宋徽宗以畫鷹稱唐江都王緒曹霸宋趙子昂以畫鞍  
馬稱明宋旭張龍章亦善畫鞍馬兼工人物萬態千狀無  
不畢肖皆神品也此外以翎毛蟲魚得名者畫雖工未足  
與前諸大家抗顏行同治四年余遊皖王峰臣軍門出所  
藏百駿圖相示余展玩數日不忍釋手嘗極目力數之得  
百零三焉細視其三乃二騾一驢馬仍百也或獨馳或並  
馳或三五爲羣或六七爲羣或十餘爲羣有延頸嘶鳴者  
有垂頭齧草者有馳者有驟者有卧者有飲溪澗者有仰  
蹄而滾者有交頸相摩者有立而戲者有昂首顧視者有

以身相偃者有齟齬相齟者有回首嚙背者有見首而不見尻者有見尻而不見首者有祇見尾者有祇見雙耳者有祇露四蹄者態狀百變各臻神妙其毛則五色相間連錢五花燦若霞錦其狀爲龍文爲鳳臆爲鶯頸魚目爲龜尻虎脊耳如批竹蹄若踣鐵雄姿猛氣神駿磊落使觀者忘倦浹旬而後歸之并跋數行爲他日卧讀具也



剿撫西昌猺夷紀畧

西蜀猺夷凡百數十支支有酋長散處深山山長亘千餘里白雷波峩邊馬邊越窩冕甯西昌直達滇南二十四寨皆猺夷巢穴眾約十餘萬嘉慶十六七年始出擾雷波峩邊馬邊三廳然猶間歲一出或歲一出出則擄掠牲畜焚殺人民有所得則歸巢守土者多畏憚不前俟其退而後出則寇蹤已遠未聞有能擊之者更未聞有敢入其巢者至道光年間歲暮輒出或一歲數出甚至月亦數出至咸豐改元始出無虛月或數日輒一出且擾及屏山越窩冕甯西昌宜賓犍爲各郡縣雖屢命將出師徒糜國帑兵

退則復出邊民肝腦塗地不堪殫述益太平日久將不知  
兵兵不習戰掌兵者以賞賚爲撻伐每出兵購譯者誘以  
重貨使具木刻便奏凱班師濫邀薦贖夷人以具木刻爲  
投誠其木刻非畏兵威而具故春歛而冬叛冬歸而春出  
皆緣未受懲創且復得重賞故出益頻越冕雷戕馬屏一  
帶受旤尤烈咸豐丙辰出赫甯遠府屬之冕甯越窩西昌  
等處數百里皆成瓦礫之場道途梗塞商旅不通建昌道  
鄂觀察惠占鎮軍泰督師會剿具木刻未數月秋復出巢  
大府復檄占鎮軍進剿并 奏委余叅謀戎幄余於歲除  
前五日抵營適西昌郡縣以民變告請師甚急鎮軍以方

剿冕夷勢難分兵未允其請而甯郡求援羽書絡繹鎮軍  
卽浼余往余曰此不過昌民受夷患欲得兵驅除耳非民  
變也且鎮軍自謂能分兵與某否抑令某徒手往也鎮軍  
語塞余曰余料昌民際茲歲除必回度歲郡城且安已而  
謀報果如予言丁巳春正月旬日昌民復數千赴城大譁  
郡守親來請兵鎮軍曰事急矣當屈君一行兵可緩則緩  
如果須兵力書來卽當調發余諾之遂於十四日馳抵甯  
郡而民已散訪察情形方與西昌大令王君在鎮標中營  
德遊戎處訊致亂之由忽縣役馳報某場民千餘戈矛相  
摩舁傷者至在署閤堂大令失色余曰必民求驗傷耳君

宜往驗賞以藥資可無事王君猶默坐無言余速之回王君乃邀余同往余知其怯遂先行而王君命鹵簿導余前余止之數而執役等謂奉宰命不敢違余知王君意欲民之誤認余爲宰而譟余已後行以便抽身也遂卽前行及署民果以爲宰太譁及余至民知爲非宰也譁乃止余從容下輿謂眾曰若等何譁曰夷匪昨出寇昇傷者請驗並乞發兵爲民除害耳余曰是父母官之任也但爾府縣曾屢向鎮軍請兵奈鎮軍方剿梟甯未能分兵何因招王君爲之驗視訖且給養傷資民不復譁余先入而刁劣生監十人隨王君入與王君言氣甚張無官民體余曉之曰宰

汝父母官若子民也子與父母言有若是猖狂者乎豈叛民乎一人憤然曰天下已大變叛卽叛矣何畏乎余哂曰若果能叛余能平若因詰其姓名眾皆不言且爲之請罪余曰鎮軍之發兵與否惟余剿辦夷匪亦惟余明日若等悉至余寓受訓令毋擾爾守宰次日至者九人惟稱叛者不至余訊諸眾言某悔已宵遁矣余因訊其請兵亟亟之故皆曰公久任會理循聲載道非獨會民猶懷去思卽某等鄰邑士民亦皆仰戴昨某生不知爲公是以出言無狀祈公恕之某等之所以亟於請兵者緣甯郡四屬皆以蟲樹爲命此公所知也茲蠟蟲將熟若夷匪不退民失十餘



萬緡貧富皆病且麥熟不能收秋禾不能植民且荐饑轉溝壑是以頻來請命非敢叛也余曰若等所云誠是冕甯受毒尤深且大府所發兵爲剿冕夷而來自應先冕甯而後西昌且汝等西昌夷禍多由白召平日欺凌夷民如豕鹿然植其地沒其租使夷人顆粒無所得復據其地爲己有又因夷有所需重利以盤剝之夷人訴諸官汝等交通吏役多不直其詞使夷民窮迫無告受害不已故出巢強獲甚至焚掠以洩其憤汝等復與之相讐互相殘殺患實自取何能先汝西昌而後冕甯乎諸紳民籲懇益切繼以哀泣余因致書鎮軍謂民情如此發兵之舉似難再緩鎮

軍於是發兵三百名浼余燭當一面余少之復調鎮標守兵二百名又募勇三百名共兵勇八百鎮軍檄中營遊擊德茂與余會剿余以遊擊位三品余五品耳且文武不相轄事權不一難期成功鎮軍然之遂檄遊戎以下悉受余指揮余與德遊戎於正月杪進兵遊戎初紮營山腰余曰山腰受敵當據龍頭居高視下有劈竹之勢又分兵三百於山下紮兩營以爲犄角且護汲道又於山後多張旗幟倍帳幕紮營甫定日猶未晡余曰山上卽夷巢也向來出兵無有人其巢者且吾兵卒至寇未之知若由山脇捷徑突然而上出其不意兵法所謂迅雷不及掩耳迅雷不及

閉目也必獲全勝且使寇膽落遊戎深以爲然余復令背孤向虛而出夷人不意官兵之敢至且突然而至也弓不及弦手不及刃盡獸駭鳥散遂焚其窟穴取數十級全師而還夷旣受創亦以數百人下山潛伏亦欲俟我師下出不意卒起以取勝余因帶守營勇百名拔旗下山以擊之且爲迎我師之計及將至伏無所見窮搜亦無跡蓋見余兵下已潛遁矣余因紮山下以待少頃我兵由大路回寇從後尾之德遊戎反施以大砲轟之寇始遁是役也以五百人入夷巢破夷數千於是十七支皆懼剋期投誠而甯遠遊匪千餘以報復爲名勾結邑民夜入夷巢掠牛羊數

百下夷人疑附近鎮市修怨復下圍附近場鎮余遣兵數  
敗之且驅散遊匪並怵以兵威始盡行解散夷人知遊匪  
已散十七支俱具木刻匍匐詣營投誠許之與之條約十  
二章且諭以

朝廷威德毋自外生成又曉以物產所出漢夷互市兩不  
可廢而漢地所產夷民尤不能一日無漢夷憬悟頓首受  
教咸願恪遵條約夷人且請漢人復業漢人曰居無屋夷  
曰我山富林木惟汝伐漢人曰耕無粟夷民曰我汝貸余  
因諭漢民曰夷人具有天良曉仁義汝等當以負德爲恥  
用其木酬其值貸其粟加息相償毋負德毋生釁衆皆唯

唯漢夷遂歃血以盟自茲永無相犯漢夷既安余復籌辦  
善後體察地勢移汎防築砦堡至今十餘載西昌四境帖  
然無狗吠之警而冕甯次年復擾如故矣葢未能使漢夷  
心服善後事宜亦未盡善守土者復有所扣剝賞罰亦不  
行防勇不用命故也

存誠齋後集卷十四

香山何曰愈子持氏著

男璟

瑄同校

崇明老人傳跋

崇明老人一碌碌庸人耳曷傳爲傳其子若媳也其子媳曷傳爲傳其孝也老人生三子家貧不能自活盡鬻三子於大戶爲奴而三子皆忠誠幹能主人愛之歲酬其勞賞資甚厚厯十餘年蓄積頗豐各自娶婦常念二親年迫桑榆不得依膝下食寢不安諸婦復賢欲得舅姑而養之三子不約而同各哀求其主謂二親年老奉養乏人乞贖身歸養其主賢之且以其服勞有年遂還其身券而卻其貲

三子感謝同歸侍養各置一肆凡老人衣服飲饌及意有  
所需皆取諸肆中而老人好葉子戲三子欲得老人歡因  
邀素所習者數人日與老人手譚且許負毋羸每日所負  
亦取諸肆中老人日得羸餘歡甚而客常得飲噉藉茲以  
消永晝亦甚相得也初三子之歸養也人奉養一月週而  
復始諸媳私議曰一月始得奉顏色爲曰太疏於是共議  
半月一輪旣而亦以爲疏旬日而一輪諸媳復以爲疏遂  
定議五日一迎養以爲常規子若媳承顏順色必得老人  
歡而後已嗚呼其子不怨父母之鬻身惟報罔極之是圖  
在其子有生身之恩能贖身養志已難能矣孝矣其諸媳

無生身鞠育之勞亦能盡孝若是誠賢婦也世間能有幾  
哉嗚呼若子若媳者誠可風矣余故曰老人曷傳傳其子  
若媳也





## 平會理州滇匪紀畧

咸豐七年丁巳余奉檄剿撫西昌徠夷旣肅清西境復辦善後事宜甫臧事滇匪韓登鸞張正明曾一品等三大股又張藍鼻等五小股合八千餘人與甯遠府屬之會理州淌淌徊匪互相讐殺州境與滇南接壤之羅左洪門口一帶數十里被席捲一空且盡封民倉廩以爲賊糧又剋期攻城徊匪疑羅洪之民接濟寇糧復盡焚民居居民遭二寇之虐如同倒懸署刺史王君與守將花叅戎羽書求援建昌占鎮軍與甯遠太守祥君甚恐而二公聞消息頗惡互相諉卸鎮軍鑑滇徊之禍謂辦理不善則蹈滇南覆轍籌

可以往援者因謂太守曰非何雲咳刺史不可君盍往浼之太守三至余適有豚魚之疾却之太守乃喉鎮軍來鎮軍兩至余亦未見其中軍德遊戎曰何君平夷患辦善後功已不細保尙未及茲復以艱鉅浼之此所以疾辭也公若不負其勞何君爲人慷慨而任事必不辭鎮君因復至從者仍以疾辭鎮軍曰余此來正爲視疾遂直入余乃起坐鎮軍問疾已曰觀君容無病態何自憊也因言會理滇匪倡獷狀余與太守祥君皆有地方之責固當往但才不如君此行非君不可余不應許以躡保余亦不應鎮軍固善言徐曰以夷務故勞君已將及歲豈宜再勞但會理固

君舊治也州民皆君之赤子數年來凡會邑紳民來郡者必頌君德政余聞之熟矣紳民既不忘君君能不念紳民乎盍往拯君之赤子於水火也余聞是言不覺振衣而起曰余豈畏艱鉅惜一勞乎聞寇壘已深非輕兵所能翦除公能畀我兵若何鎮軍曰鎮標兵無多現更籌剿焦脚分兵二百名與君可乎余曰焦脚夷務固須兵力而滇匪之勢更甚於焦脚稍不臧則寧遠五屬俱危五屬危則全蜀震動滇事可鑑也鎮軍曰余固知之但君素得會民心民見君至願效前驅者必眾無已州屬會川營尙存兵一百君其調用再募勇二百名成一旅矣余知不可以口舌爭

許之卽傳令募勇次日下較場得勇二百名徒手無軍器  
又向鎮軍索取撈軍庫得刀矛八十餘事多不堪用又湊  
擡礮六以足百人械而餘百名猶掉臂遊行欲勿往則貽  
食言之譏遂毅然往揚言兵二千及抵會城四鄉黔黎聞  
余至聚觀者十餘里或曰何公猶未老也或曰較前稍老  
矣耆民有至余前盼望者有訴寇披猖者有起居者儼然  
如家庭父子焉余慰勞之且諭令安業無恐此來正爲汝  
等除害耳及接見紳耆咸云城內外皆伏奸細數百曰晡  
卽閉城夜皆登陴防守余曰余已至城門毋早閉夜毋登  
陴我自有策遂傳令三日內逐戶撈詰城內外如有容留

奸細者從軍法而夜密諭兵勇嚴裝以備迨至第三日晨起紳耆來謁謂城內外賊黨已盡逃矣余曰固知之所以閉城毋早者蓋與之間使自潛逃門若早閉則彼欲逃無由必且行險前下令三日內搜捕者僞也耆老曰善余偵知肘腋已清於是遣五品軍功洪某父子賁榜文徑往賊營開示

朝廷威德曉禍福諭利害喝以虛聲懾以兵威予以自新許其解散同爲盛朝良民毋致玉石俱焚噬臍無及諭到眾匪首隊伍迎洪洪固咽嚙之雄素以護烟幫爲生別號花豹子者也饒膽勇善詞令往來滇南保幫者十餘年

滇匪多知之余故賞以五品功牌子二皆賞六品功牌使  
易轍自效洪復面陳裋福且言余在西昌以八百人深入  
夷巢破夷萬眾餘皆詣轅投誠爲之殫述而余之將至會  
理也府屬綠林投賊營者千人聞余至散且盡匪首等已  
自疑恠今見告諭及洪軍功言因曰某等非叛民緣與徊  
匪馬某有宿讐故率眾報復讐復卽散矣茲奉憲諭當具  
稟下情希爲轉呈余於遣洪軍功之次日復令梅都闕坤  
率兵二百距賊二十里而營多張旗幟戎帳嚴守備勿出  
余率兵練三百隨發而會川營花叅戎力請代行余曰此  
來正爲辦賊耳不出恐事難濟叅戎力請不已其意蓋以

彼爲守土官不出恐爲士民羞故求往甚切余曰君旣欲往亦率兵二百距梅都閭半里而營以便策應晝多旌旗夜嚴號火有警則謹守禦禁喧譁慎勿出戰叅戎曰諾而余使人潛尾之乃在距城三十里之姜州而駐距梅營猶五十里也乃遣飛騎速之進否仍回城居守毋僨事叅戎不得已始前進與梅營聯絡余以百人守城從中調度分派甫定韓登鸞稟亦至稱與廻匪讐不共戴天報復卽歸不敢擾州境余復發示諭之爲之解釋冤怨且暗授洪軍功方畧旋復具稟剋期而退及期猶未動余於是雷厲風行發嚴示以怵之張藍鼻等五小股遂退至金沙江對岸



卽滇地也而韓登鸞等三大股尙五千餘人仍未動余又發諭前往辭益嚴聲益厲又揚言調土兵擊其左檄團練攻其右自以大軍搗其中命徇民襲其後復命花梅兩軍進前十里而陣於是韓登鸞大懼請三日內盡數回滇并懇貸其死榜示通衢并諭沿途關津渡口毋許阻截以便退散余允之且諭令三日內盡數回滇毋許刻留且不許持械結隊而行七月十四日早示到是日天微雨韓登鸞等接讀喜曰何公生我七千餘人果冒雨而行於十六日盡散回滇十六晚王刺史謂余曰君虛聲恐喝事恐無濟聞有數百人尙紮江壩似不如出兵之爲得也余曰孫子

云百戰百勝善者也不戰而屈人之師善之又善者也當  
賊之麇聚羅左也衆七八千氣燄甚盛闔州震恐鎮軍太  
守均畏難而不敢往君與花叅戎亦不敢出城一步豈非  
以寇勢大乎而余以五百人至一百且徒手空拳賊十餘  
倍於我衆寡之勢不言而明且兵勇皆非平日恩撫訓練  
之士烏能望其以一擊十以寡勝衆哉如戰而不勝則州  
城危而一郡皆震動矣故用虛聲恐喝之法不費隻箭不  
損一卒使強寇怵威自退此用兵之上策也且寇氛正盛  
時吾以數紙而退之茲江壩數百人詎敢逞乎江濶船寡  
彼七八千人加以輜重器械須百往復始可盡渡今三日

之間未渡者僅數百可謂畏威奉法矣茲日甫夕夜尚有六時君試偵之如五鼓不盡濟吾不信也迨次日巳刻探役回云賊於天未明盡過江矣余曰何如刺史無言少頃曰是必淪形山澤間耳余曰君旣疑之盍往瞻之王君果自往及回默無一言余曰無寇乎有寇乎亦不言余哂曰昨日未晡余已馳書花梅兩公俟賊盡渡卽火其巢推墻填濠已悉爲平地矣又密遣卒分投嚴索五十里內已無足跡矣君奚慮耶刺史默然而退余復囑花梅二君更駐紮旬日俟雞犬無聲然後撤師又徇匪二千餘眾猶麇聚洶洶余慮滇匪雖退而徇匪肆虐因募能赴徇巢開示禍

福者有軍功白受采應募往余曰徇匪狡險克悍甚於漢  
匪如有叵測無怨白曰小人與徇首馬某有故彼前開廠  
時小人曾與之掌會計司出入者三年故能往也予因使  
賁示往徇首曰何公是否卽從前仕我州二十年之何青  
天耶白曰然徇曰是吾等恩主也道光十六年夏吾等羣  
居大橋同被水災田廬盡没何公騎馬渡水賑吾等災又  
爲吾等疏通河道水不復爲患今猶戴德未忘來諭當令  
各鈔一紙謹遵訓令違者共誅之於是自滇來者回滇上  
著者各歸原處不敢擾害州境且具稟謝余接稟歎曰禮  
失而求諸野洵然前賑大橋災時余已忘之而馬某猶記

之爲政可不慎所施歟是役也以五百人退七八千之強  
寇纔二十餘日耳事臧旋郡鎮軍迎勞而謝曰君退賊何  
神速乃爾且辦理甚善與制軍意合因出制軍檄示余葢  
制軍傲滇徊覆轍慮武弁邀功啟釁故五百里飛檄諭鎮  
軍善辦毋妄戰余曰制軍誠老成持重若果戰則兵連禍  
結徵調頻仍不知費度支數百萬克復未知何年耳鄙見  
不意與大府合幸未辱命也鎮軍曰當寇匪披猖未聞有  
舞雞擊楫者今君功成攘功者紛起矣君在會營時一舉  
動一措置某皆知之運籌折衝檄文告諭皆君自爲之無  
有能爲君借箸者君宜通稟各憲勿徒爲他人作嫁葢花

叅戎稟稱殺賊數名賊始退王刺史則嗾劣衿以退賊功  
歸己更有袖手郡城距賊五百餘里之史太守者逸其名  
見余回郡知賊盡散卽欲秣駟前往余不知其爲攘功計  
也因曰州境旣肅清道路崎嶇徒勞從者無益而太守銳  
然竟往探悉諸寇姓名返郡亦密稟攘功制府不能辨適  
有移節雲貴之命悒悒不快功遂不敘惟剿辦西昌夷務  
余始保直隸州而營中肉食數公旣浮冒糧餉以飽私橐  
均花翎璀璨雁銜榮晉矣多有爲余不平者有咎余者曰  
君若張大其事如毛君之防堵西陽數請益兵延其歲月  
使大府惶懼然後奏功則必邀優保今君奏功太速大府

疑爲癩癰疾故不敘功乃君不知巧宦耳余曰非不知張  
大其事可以邀功但用兵有機機至而失則爲禍必大余  
所以臧事之速者以賊未知余虛實徒聽間者之虛喝亦  
必自謂與其行險孰若善刀而藏故退若余存私玩寇數  
月彼偵知余兵五百則必進攻州城州城兵單民寡守備  
一無可恃必不能守而燎原之勢成矣余斯時也上爲國  
謀下爲民謀未爲身謀也且顯晦命也咎余者曰善爲國  
不求賞立功而忘名余等所遜謝不敏也

答朱耐菴少宗伯詢張刺史邦佐宦蹟書

耐菴少宗伯執事閣下書來以某與張惺門刺史同舟十餘年承詢其宦蹟有甚欲得其詳者某雖與惺門仕同邦交最善而宦輒分馳未盡悉其詳就所見聞爲執事陳之惺門固賢能吏也出宰西蜀初權會理州篆潔已愛民下車卽問疾苦有不便於民者悉除之其聽訟也虛心研鞫無枉無縱先是邑紳某好結交長吏賄賂公行惺門履任謝絕私謁非公不見有富室某孝廉者前刺史皆與之交厚惺門獨拒絕之其兄茂才某以言語威逼釀命欲以重賄求免勢力者多爲之緩頰惺門勿聽辨如律人服其公



有戶胥典缺出其曹互競有以五千金求充者惺門拒之  
乃當堂論文考取不受錙銖人服其廉四鄉製匾頌德却  
之又服其不好名州城西北隅圯惺門謂城池所以衛民  
未可以昇平置之遂捐俸爲士民倡於是輸者恐後遂鳩  
工興築萬杵雷動逾月而工竣或謂時際太平無狗吠之  
聲徒勞民傷財爲無益迨咸豐七年有滇匪韓登鸞之警  
賊以城池完固未敢猝攻保全者不少然後知前日之工  
築非勞民也嗣權合江西昌彰明蘆山等縣事雖爲日未  
久皆有聲其補樂山令也地固西蜀膏腴多鹽井凡邑宰  
蒞任竈戶例饋二千金時節復有陋規惺門無所受或言

數百年成規一旦裁革既招後任之怨且邑東西孔道軒蓋絡繹供帳夫馬生童膏火捕盜招解恤養孤老歲費不貲胡不儲爲辦公之用惺門亦以爲然遂悉儲外庫鎔錢無所私咸豐三年廣西盜起楚蜀滇黔伏莽亦多蠢動惺門遂將此項修城池備樓櫓造器械築炮臺守備完固後二年滇匪李藍二逆屢次圍城卒賴以保全者惺門未雨綢繆之力也而祥方伯以其無暮夜之饋故任樂山八九年中撤省閔住及另署瘠地者過半焉及甫飭回任又檄令赴都引見惺門知不見容遂引疾不復出然宦橐蕭然不能歸里有子九人食指數百遂僑寓峩眉而李藍二

逆是時勢益張被焚掠蹂躪者七十餘州縣九年藍逆以  
二萬衆圍攻峨眉城僅彈丸兵食一無所恃邑令秦君象  
曾書生也聞警驚惶一籌莫展惺門乃教以守禦方略幸  
秦君虛衷向之再拜一切號令調度皆聽主之已亦聽令  
焉惺門令富者出財貧者出力咸使登埤守禦貧者計口  
授糧婦女供炊爨賞罰嚴明紳民亦皆用命寇圍攻數晝  
夜肉薄未下氣稍怠惺門乃募死士餌以重賞得六十人  
漏四下令各飽食懷火彈火礮縋城而出抵賊營各以火  
磚火彈擲之賊方在寤寐中出不意焦頭爛額者不計其  
數又值黑暗未卜官兵衆寡自相踐踏死者相枕藉餘盡

奔北圍遂解人慶更生是役也惺門以六十人破賊二萬  
眾而功不聞於上祇以捐助軍餉加知州銜殊堪檻腕耳  
惺門旋於咸豐十年卒於戡眉縣寓所子九人長子某四  
川候補未入以防西陽功加六品銜餘俱業儒某所知者  
僅此執事如能撥冗爲之作家傳誠大惠也惺門死且不  
朽矣某謹白



跋

自來著作必兼三長曰才曰學曰識晚近世專工詞調眩  
一夫之目其於匡時經世名程概擲弗究非不欲究也才  
弱學膚涉獵卑狹雖欣然搦管不過取膾炙人口者一二  
鴻篇襲其貌而未得其神摹其詞而未諳其法由來漸矣  
雲垓先生質性聰穎無書不讀讀亦能尋其間少蹟科  
第壯恣遊覽抱鬱鬱未伸之奇創鑿鑿不刊之論每接塵  
談心傾久之口者袖退庵存誠齋文稿三冊出以相質披  
賞數過茅塞頓開益其論古也發先儒所未發而持衡甚  
允其評今也窺時賢所未窺而操觚有據典核詳贍記事

之審也情深文明紀勝之韻也爽和端慤酬贈之嚴也一  
種銳思偉見渾灝流轉之氣沈密包含之局間仿龍門意  
匠萃唐宋而集其成匪獨鞅掌中不數數覲持此而與鳳  
苑名流麟閣鉅公絜長較短巫之小大當必有分矧留心  
時務經畫有條措諸實用大堪庇社稷而利人民頗牧之  
畧寓於哦松賢集之英誰知寄閩謫也何如然

國家尊賢養士二百載矣劒氣珠光精不可遏藏器而沽  
當來善價吾固知天之不欲喪斯文也吾尤知天之必欲  
平治天下也謹書數言跋於編末爲 先生祝且爲讀斯  
冊者幸

澤山陳瑩咸

香山 何雲咳丈示大著存誠齋文集十二卷

友芝受讀

畢謹選錄若干篇其邊事書深籌遠見握治安之要其綏邊策目擊手驗洞弭患之根其議治河必極本末之善其講武備必盡水陸之精皆言必可行行必有濟熟之在平日一旦艱鉅猝投直舉而措之耳其楊忠武誌書碩農甘風子傳等篇序事潔有史法其他書說記序靡不藹然截然自仁義流出此非博通古今一一得其實際決不能道隻字尤愛諸史論紬繹再四未有不持事理人情之平而蹈文人逞筆墨爲軒輊者乃益以窺吾丈之深也時方



不言卷之三  
多故抱濟世才如吾 丈良不數覲乃使浮沈薄宦雲暎  
之雲宜不崇朝雨天下者僅僅垂蔭西南一鄉邑未必非  
世道之不幸然嗣君小宋駸駸以庭訓起甲科爲名詞臣  
爲良監司開濟之事行見一一恢而拓之以竟吾 丈未  
竟之志後之論者其必指斯集爲治譜無疑也

子偲莫友芝

昔人謂作詩必有關係方不徒作至於古文託體更尊尤  
不宜漫然操觚唐宋諸大家後以古文名世者林立大要  
不出議論才華二端 本朝間有以考据擅長者則古文  
之歧途矣惟桐城方望溪先生以謹嚴淡雅爲宗實爲古

文正軌嗣後若姚姬傳惲子居皆宗之然非空疎者所能  
竊似丙寅三月客游皖江獲晤 雲眈先生並得讀所著  
存誠齋文集十二卷始歎文章淵源有自桐城典型猶未  
墜也 先生官蜀中垂四十年有循吏名善政不可枚舉  
詩文亦日富凡民生國計利弊所關與一切脩已接物之  
理皆於詩文寓之茲十二卷其一斑也持論不必動闕名  
教能使人讀之油然而藹然其心漸入於善而不能已不自  
知豈徒作者耶又根柢經史不爲浮游無根之言可謂謹  
嚴淡雅者已年逾七旬神明純固詰訥小宋方伯迎養來  
皖猶日以著述爲樂愛才若渴有一藝之長者皆蒙採錄

雖以章之謏陋亦承孜孜獎誘若將不及古稱衛武公耄而好學近代若沈確士袁子才以文章德業負海內人望膺祺福享大年先生殆其人耶章得侍坐末親聞緒論何其幸也而究以未讀先生詩集爲憾異日當請業焉

稚楓胡志章

凡讀文莫不喜讀瑋文世之所謂瑋文者不過老師宿儒  
自矜鴻篇鉅作及讀數行輒目倦神昏掩帙還之矣必世  
有偉人然後能爲瑋文謂天下多偉人何以行年六十而  
未之見謂天下無偉人何以儼然在目而躬親遇之如

雲眙邑侯者是矣 侯抱經世之學而久屈百里癸丑嘉  
平來權邑篆邑民受夷患者二十餘年遭焚殺剽掠不可  
勝計避而遷徙者十之四五百餘里多鞠爲茂草 侯下  
車知漢奸爲患設方略擒數人重法治之又諭民修建碉  
堡齊團以禦教民暗伏於寇往來之徑俟其至卒起而擊  
之戮一級資萬錢又諭民得造火器呈官編號俾資捍禦

寇夜至數被創又失漢奸爲鄉導遂歛跡先是宰斯邑者  
城外數里馬蹟卽不敢到寇至惟閉門自固 侯初至夜  
聞有警卽馳數騎出自登礮樓以俟之禁守卒炮毋妄燃  
俟寇近始擊之而寇探知 侯出卽退去自是亦不敢復  
至紆道而擾宜賓犍爲民稍得安枕 侯復偵知老君山  
寇出入必取道於此帶十餘騎親至其地山高數百仞滿  
山皆叢竹茂草深林密箐上通馬邊峩邊雷波皆夷巢穴  
人所不敢至 侯謂移新設萬全營於山趾築堡以處之  
則斷夷人咽喉之道夷患可已正擬稟行闔邑士民見  
侯胸富韜畧方擬遵 侯教多建礮齊圍而未兩月 侯

卽以艱去邑人知不可留相與泣送謂天不欲除茲醜類  
使 侯功未竟而去也 侯尤好獎借士類初下車卽物  
色賢才而接禮之芳以草茅寒畯加造廬殊禮趨承之際  
先得讀所著玉帳狐腋再得存誠齋文集而讀之雖全豹  
未窺殆望而欲駭駭而汗茫乎不知其涯岸其沉博似韓  
閔逸似柳醕粹似歐議論似蘇機調似左公書法似龍門  
其他九流百氏盡笙簧而殺核之論兵尤爲卓絕合周秦  
漢唐宋明諸家言兵者皆咀其精而吮其華際斯時艱而  
不得大用於世老猶屈百里人皆惜之 侯身如松幹聲  
若洪鐘目光射人老而矍鑠轍蹟遍天下名譽滿川中居

官行政處已接人迴出風塵系本嶺南世族代有偉人尤  
盛於明東莞伯真仙洲太僕象岡相國皆一代名臣太  
封君以名儒爲循吏宦蹟有傳遺愛有頌明德之後其實  
能繼嗣君復掇巍科入翰苑轉給諫侃侃立朝都中稱四  
直諫皆 侯教而成之簪纓金紫爲家常故物且 太恭  
人年近百齡婺星始暗祿位名壽皆得備而有之求之興  
朝世族其能有幾芳不幸見 侯也晚親承未久其初如  
對華嶽天外嵯峨可望而不可卽繼如聽鈞天餘音遺響  
徒想像而溯洄蒼生有幸乎他日風雲際會盪寇則方召  
之資雷雨經綸長民則豹儔之惠卽不然先生洋洋大文

必流傳不朽爲韓柳者公之後勁孫吳百代之薪傳而又  
何憾乎步隨所備至足知和誠然慨歎流連聊可備  
我邑輿人之誦惡得以不文唾哉

香谷彭應芳



051 2540025  
1



21101000187841

不計入  
5

慎思居存稿

同治壬申  
秋七月

皇清誥授資政大夫太常寺卿顯考敏齋府君行述  
府君姓湯氏諱修字敏齋晚自號泔翁先世自  
青田遷蕭山河斗里二十一傳至 雲玉公始  
析居邑治西門爲西門湯氏 曾祖諱成德  
妣王夫人 華夫人 戴夫人 祖諱元裕國  
學生 妣來夫人贈封如 大父官隱行穆德  
鄉里稱慕 考諱金釗歷官至協辦大學士  
予諡文端以理學名臣爲海內所宗仰 妣來夫人  
誥封一品夫人 府君 文端公次子也少魯  
直至性過人確敬不妄言笑每侍 大父植立

不移咫尺 大父嘗喜言此子雖太訥然他日  
忠孝一流人也事 大母來夫人先意承志怡  
順之色傳於士類南歸中道聞 大母訃痛不  
及躬養侍疾日食糜粥寢於柩側者三月後每  
遇忌日輒端坐隱泣若深自懲艾者長游於吳  
江張先生履之門先生介持君子也於是究心  
古名臣言行書及宋明儒治心之言毅然身事  
之於外物無所動道光十九年己亥舉順天鄉  
試旋官內閣中書慨然以中外宿習小民積瘼  
爲已任時林文忠收繳英夷盤船鴉片朝野額

手稱慶皆謂醜夷不日可平 府君獨深憂文  
忠事近急功恐爲忌者齟齬事終不濟反貽賢  
者口實後果如 府君言咸豐元年辛亥遷典  
籍轉侍讀時大學士祁公以耆臣碩望參贊機  
務 府君時斷斷於廣坐諍之文端言

國家當以寬大爲政 府君言承平日久朝野習  
爲寬大大臣闕茸以保富貴小臣鉗結而惜功  
名宜大伸賞罰以肅綱紀嘗以議軍儲上書文  
端文端歎爲國士以觴觸時忌未果行 府君  
喟然歎曰天下事皆如是耶吾位卑能言之而

己時廣東南海馮某有叛奴被酒倡言於市言其主不軌與道員某通逆狀爲番役所訶察文致成獄逮馮某下刑部大學士委府君往鞫實卒無左驗主是獄者堅欲置之死地府君爭之力雖觸所忌不顧然終以是得直後馮某遣其子來謁謝府君謝之出曰公事公行但期天下事是非明耳何謝爲三年記名以御史用四年授福建道監察御史轉掌雲南道幫辦東城風概懍懍不可干以私感時事至涕泣飲食爲之不怡每有陳奏必自貴者始劾安徽

撫臣福濟以效力革員蒙混奏請署缺得

旨切責尋遷順天府府丞轉通政司使副使丁大  
父憂服闋授大理寺少卿擢太常寺卿奉

詔疏陳各直省團練利弊又疏請軍務省分開科以  
厲士心而靜民氣均格議未行 府君深念承  
世訓荷

國恩不十年由中書歷臺垣淳卿貳慨念時艱居常  
累嘯思得一當以報

國咸豐九年夏六月夷船以求款約爲辭舫至津沽  
有所求請廷議紛紜張皇無措 府君疏陳戰



守之策以時方議撫不報至十年秋七月夷復  
內犯畿輔告警都人惶惶廷臣不知所措而左  
右遂有以巡幸之說進者 府君夜扁室禁家  
人窺牖戶竟夜聞筆硯聲手疏力爭言辭激烈  
疏入

上不以為忤而與當軸意旨不合於是

聖駕北巡和議成而 府君亦自是陳乞退矣先是  
尙書肅順方貴盛用事 府君以議事與之忤  
肅順反屈意致殷勤意欲羅致 府君 府君  
嶽嶽不稍阿由是肅順益嫌 府君至是先後

建言卒賴

天子仁明與以優容 府君每感

文宗皇帝深知歎盛世易爲直臣未嘗不嗚咽流涕也 府君陳乞後驅車走宛洛達荆襄時以東南羣寇未平沿江壁壘相望瞻眺家園欲歸不得驕迹長沙者六載凡遇國家施一政用一人喜戚時形於色當

文宗皇帝升遐 府君大哭及見

新天子御極朝政一新又大喜曰

今上聖明若此天下不日太平矣或有以彈冠之說

請者 府君慨然曰小臣受

兩朝厚恩若奉

明詔雖裨以艱鉅赴湯蹈火亦當奮身圖報不則鼓  
腹以歌詠昇平而已蓋府君惓惓愛國之忱雖  
陳乞後未嘗一日少愒而卒不復出者則古大  
臣難進易退之本懷所以自信特立者也晚居  
吳下猶日讀古名臣奏議聞四方利弊輒色動  
若身當者當道以治理諮詢言必盡其短長不  
妄交際與陽湖惲次山撫部稱石交暇則課不  
孝等以讀書制行之大嘗訓 不孝紀尙 曰艱苦

危難時立得定始見真實學力要在靜得浮氣  
住耳急人難如已在水火丁卯冬扶疾爲人竟  
一事家人憂致劇以節勞請 府君曰代人作  
事分際在一代字代之而心與力有未盡直自  
負耳人無論出處事事務求自盡天下事烏有  
代人作者耶然以積勞時有小疾至辛未春正  
月感冬溫呻吟不可支有問疾者必令扶掖起  
言論溫溫謹畏如常時延至四月十八日暴下  
利不止二十二日晨疾革 府君以遺疏授不  
孝紀尙 捫心以未報

國爲憾不孝以遺命請府君大聲曰孝弟忠信做

人根本語不及家事時加已憚撫部來視疾

府君與一握手而逝憚撫部哭之慟歎曰朋儕中未見如斯君子人也府君生於嘉慶十七

年辛未五月初十丑時卒年六十有一元配

葉夫人海州直隸州知州定海葉公機女先

府君卒繼配周夫人戶部給事中南昌

周公春祺女子男子二長紀尙縣學優廩生知

府用江蘇同知周夫人出次學喬庶母羅氏

出後府君數月卒女子子三長適毓慶宮行

走頭品頂戴戶部右侍郎翁同龢 葉夫人出  
次適進士太湖趙曾重幼字同邑陳皆庶母羅  
氏出孫女子二 府君著有奏疏一卷襍文一  
卷詩二卷隨筆四卷嗚呼痛哉 不孝紀尙生也  
晚當 府君服官政 不孝穉蒙未有知稍長讀  
府君奏議始粗窺 府君立朝本末與進退  
大節其一言一行則稔記於過庭者上天降割  
罹此閔凶心若有創未遑記述然傳有之有善  
而不知不明也知而不傳不仁也謹質次大畧  
要不敢緣飾爲美以誣 先人冀

知言君子亮其志焉

不孝孤子紀尙

泣述

子壻

趙翁同龢  
趙曾重

謹填諱

誥授資政大夫太常寺卿蕭山湯公墓志銘

惟蕭山湯氏遠有代序二十餘傳潛德不耀先  
師文端公始以理學文章經濟累踐大官洊躋  
揆席肇開厥家而祇通紹衣克繼其美者有若  
太常公公諱修字敏齋晚自號泔翁曾祖成德  
妣王華戴祖元裕妣來贈封並如文端公官考  
文端公金釧厯官吏部尙書協辦大學士 誥  
授光祿大夫妣來 誥封一品夫人文端公二  
子長陝西鳳翔府知府寬公其次也以道光十  
九年舉京兆二十有三年例得內閣中書越三



年補闕成豐二年轉典籍其明年升侍讀記名  
御史補福建道監察御史轉掌雲南道巡視東  
城尋遷順天府丞五年升通政司副使六年丁  
文端公憂變除補大理寺少卿擢太常寺卿無  
何以疾去職訪醫南行自長沙至蘇州遂僑居  
焉同治十年四月辛巳卒年六十有一 誥授  
資政大夫公少端重不輕言笑善事父母侍立  
逾時不遷地文端公賢而愛之來夫人之卒也  
聞訃於南歸道中馳至慟絕寢饋柩側者三月  
急人之難爲人如爲己嘗曰旣爲之則善惡皆

在已天下事豈有代人做者耶時以爲名言林  
文忠收繳躉船雅片一時稱誦謂煙患從此可  
絕公獨以不先講武備爲憂人服其遠見自政  
歸軍機內閣之屬涉筆占署而已公獨實事求  
是多所舉正見賞於祁文端公遂以議軍儲上  
書祁公不能用顧益重之廣東馮某叛奴過市  
揚言其主與道員某通賊爲邏卒所誚逮馮某  
等下獄且置諸死公以大學士檄與鞫無左驗  
竟白其冤馮某來謝公卻之去曰吾爲公事耳  
非有私於若奚謝爲在諫垣遇事敢言棘棘不

阿劾皖撫某以失守革員署闕奉

旨切責洎登卿寺疏陳各省團練事宜軍務各省變  
通開科津沽戰守之策多格於部議最後庚申  
之警有以北巡之說進者公聞之密疏力爭言  
詞激烈時尙書某與親王某相比貴盛用事公  
嘗忤尙書又屢建言遂積嫌公而

上終不以爲忤公語及

先帝知遇未嘗不歎

盛世易爲直臣嗚咽流涕也公自以大臣子由中  
書不數年躋三品世受

國恩奮身圖報以疾不久於位養病中聞四方安  
危治忽輒憂喜見辭色中道殂謝不盡其用朝  
野惜之疾革以遺疏授紀尙訖訓之曰孝弟忠  
信做人根本語不及他文端公之學訓詁宗漢  
儒窮理主敬以靜爲本則宗宋儒而歸宿在明  
體達用公實承之賞謂惟靜則艱難危苦時腳  
跟立得定熟於古名臣言行書通知時務胚胎  
前光孺染典訓一變世俗貴介之習宋史稱司  
馬康云途之人見其容止雖不識皆知爲司馬  
相公子也都門之於公亦然此必有粹然根於

心生於色者豈惟是車馬服御之粗迹已哉箸  
述多散佚存者奏疏一卷古文一卷詩二卷隨  
筆四卷配定海葉氏 誥封夫人海州直隸州  
知州機女繼南昌周氏 誥封夫人戶科給事  
中春祺女適室羅氏子二紀尙縣學僂廩生知  
府用江蘇同知學喬後公數月卒女三長適頭  
品頂戴 弘德殿行走內閣學士翁同龢次適  
舉人趙曾重次未字孫女二紀尙以某年月日  
葬公於某原以葉夫人祔禮也憶己未歲余在  
都公以先師碑銘見屬匆匆南轅諾而未副迨

今十餘年而以紀尙請泚筆銘公墓悲夫銘曰  
公之系儒門相第一經引無替純仁得忠公其  
繼公之學探本閩洛不黜毛伏惟古訓是淑惟  
庭誥是服公之德靈根茂植玉瑩不飭石堅不  
泐不矜於艸不變於寂斯道惟則公之文漢賈  
董之倫衡諸宋人匪葉伊陳卓乎經綸吉光彌  
珍中年從政外柔內勁溫溫其敬嶽嶽其諍  
主知以正伎窮檢佞九遷臺省聲方盛待濟民艱  
報稱長衢踳踳十年謝病憂時心獨恹謂公不  
遇官六命謂公已遇施未竟纔周甲子歸雲鄉

潔齊萬善公之藏令聞孔臧奕世不忘我銘其彰之

賜進士及第 誥授榮祿大夫三品銜詹事府右春坊右中允隨帶加三級吳縣馮桂芬譔文

余以魯質承世訓荷

國恩惴惴以不克盡職爲懼所建言未必可行卽行  
未必有當獨此心不敢欺耳諸稿已棄失殆盡兒輩  
搜錄排次二卷姑存以示子孫蕭山湯修自題



--	--	--	--	--	--	--	--	--	--

慎思居存彙卷二

蕭山湯修

奏疏

特參效力革員遽請署缺請

旨

查辦疏

咸豐四年

奏爲效力革員遽請署缺迹涉蒙混請

旨查辦事竊據安徽巡撫福濟片奏請將已革知縣黃元吉委署定遠縣知縣閏七月初七日奉

硃批知道了欽此

臣

伏查已革知縣黃元吉前在署

鳳陽縣知縣任內因賊匪竄擾失守城池奉

旨革職責令効力贖罪後復因防堵巢縣與賊接仗

失利奉

旨交部議處各在案查革職人員例應離省況該革員係因失守罷斥律以城亡與亡之義本非革職所能蔽辜

皇上特因其與賊相持旬餘尙無退避情事加恩僅予革職所降

諭旨惟令其留營效力並無留省委用字樣該革員卽能愧奮立功亦僅可以贖罪況派防巢縣又以失機被議其才具於防堵已可見其無益該撫乃以防堵吃緊人地相宜違例請將該革員委署定遠縣知

縣並不將從前革職原案詳細聲敘實屬語多蒙混  
恭查本年閏七月二十一日奉

上諭昨據雷以誠奏已革揚州府知府張廷瑞已革  
江都縣知縣陸武曾均能勦賊出力請分別免罪減  
等並留營效力業經降旨允准惟該革員等失守城  
池罪名綦重僅予發遣已屬從寬若皆藉端保舉必  
致紛紛瀆請濫開僥倖之門昨閱怡良奏報揚州失  
守之時候補微員尙有全家殉難而該革員等責任  
守土轉得偷息行間冀邀寬典何以慰死節而勵人  
心陸武曾罪名經刑部議准減等改發新疆外張廷

瑞罪名亦著減等改發軍臺效力贖罪著楊以增卽行派員將該二員迅速押解起程毋再延玩等因欽此欽遵在案煌煌

聖訓共仰見我

皇上嚴明法紀董正官方之至意該革員黃元吉其失守城池之罪與已革江都令陸武曾無殊陸武曾於勦匪出力之後僅能減等改發新疆而該革員以未曾立功之人卽可委署忝膺司牧賞罰之道似失其平且恐各省效尤援以爲例革員均可委署印務更屬不成政體臣既有所聞理合參奏相應請

旨將黃元吉委署定遠縣知縣之處卽行撤銷並將  
蒙混奏請之巡撫交部議處愚昧之見是否有當伏  
乞

皇上聖鑒謹

奏



請軍務省分開科疏 咸豐九年正月

奏爲請

旨飭議軍務省分鄉試事宜以期教澤覃敷事本年正月初二日奉

上諭所有大學士彭蘊章奏請察舉孝廉一摺並開列章程十條著大學士九卿會議具奏再降諭旨欽此當經大學士 臣 瑞麟等齊集公所議得察舉孝廉易滋流弊旣開恩科所請應毋庸議 臣 意見無異已隨同具奏惟尙有管見欲陳者謹具摺爲我

皇上言之伏思



國家戡亂必先固結民心所以固結民心首在振興  
士氣艱虞之際奮武衛以治標尤當揆文教以正本  
也查自廣西軍興以來暫停鄉試已閱數科之久延  
及八省之多誠能尅期平賊秋間舉行

恩科自可普霑

聖澤而修理貢院尙不能應時集事如蕩平稍緩則  
皇上雖格外敷恩而士子仍不能及時蒙澤恐安分  
讀書者將心灰於力學而小才思逞者且計出於爲  
非鄉試一端似無與於戡亂而維繫士心實所以消  
患於無形而不可緩者也

臣

竊謂軍務省分鄉試與

其拘守常例屢次愆期不若稍事權宜可以勸士蓋  
合通省士子試之於省城則人數衆多場屋必須寬  
廣奸細或虞混雜惟有各府分試而後備辦稽查易  
臻妥協但辦理章程不能懸揣擬議如號舍可否借  
用府州縣考棚主考官可否分棚按試中額可否按  
各府縣學額多少酌量分派場規可否仿照歲科試  
辦理流寓士人可否隨在寄考府城雖未收復而所  
屬尙多完善者可否設法考校以及事務何以理弊  
端何以除之類必由該省督撫各據地方情形酌議  
方無窒閼誠以今日事勢非常例所能該各處情形

非成法所可概也

皇上嘉惠士林有加無已特開慶榜以廣旁求該督撫等自當仰承

壽考作人之意悉心籌畫無稍畏難苟安以上副

聖天子恩施罔外之盛舉將士氣奮興而民心益形固結於戡定亦大有裨益矣所有

微臣

愚昧之見是

否有當伏乞

皇上聖鑒飭下該部及各省督撫體察地方情形速酌議具奏謹

奏

敬陳制夷事宜疏

咸豐九年六月

奏爲敬陳管見仰祈

聖鑒事竊惟戰守和三者事若相反而功實相成欲和而必戰乃能約束之維堅旣戰而仍和乃有餘威之可畏臣聞諸道路知暎夷來換和約竟欲搶毀海口木筏經僧格林沁督兵拒戰擊壞夷船多隻是夷人犬羊之性愈撫愈驕已可概見後來情形何似臣未確有所聞若果連勝多陣夷艇遠颺則

皇威震疊足以懾夷情之桀驁而撫馭應稍易矣惟夷人心甚叵測奸細到處皆有當此敗退之餘自必

力圖報復廣行貨賄勾串匪人探聽機謀布置內應  
或伺於統兵將帥之左右而乘間行凶或散於天津  
府城之內外而設謀惑衆甚至輦轂之下亦難保其  
必無且將邀結俄羅斯等夷助其譟張增其聲勢但  
使官軍稍挫則其氣燄愈張臣所爲聞勝仗而愈切  
憂危者也伏乞

皇上飭下該王及直隸督臣等益加小心務籌大畧  
速頒重賞以勵弁兵忠勇之氣選用良吏以結士民  
敵愾之心添集糧餉兵勇以行出奇制勝之策一面  
出示曉諭各處官紳兵民有能擒殺夷人一名者立

賞銀若干有能奪獲船隻者除礮械船隻交官應用外所有船中珍貨財物一並給與其人尤爲出力者特加奏獎卽盜賊之徒亦准一律辦理一面諭令各省海口暫停夷人貿易俟其兵船徹退和約已定再行照舊通商一面諭令廣東官紳激勸兵民奮勇剿殺收復省城奪回香港所有奪獲貨財卽行充賞擒獲男婦妥爲監禁以傾夷人巢穴而使回兵自救一面諭選辯士有膽畧識夷情者前往與夷人講解曉以利害折以義理令回上海聽候辦理並令相機設法離間其用事諸漢奸示以

皇上恩信仍可內享其受官職并祈

飭令自津來京水陸各處及盛京沿海地方文武一律準備以防鼠竄並

申諭在京旗營統領大臣認真訓練各修武備精選勁兵熟習抬鎗技藝以備不時調遣兵法云先爲其不可勝以待敵之可勝此誠用兵之要尤今日之急務也

微臣

愚昧之見是否有當伏乞

皇上聖鑒謹

奏

敬陳團練事宜疏

咸豐十年四月

奏爲遵

旨敬陳管見事咸豐十年四月十六日內閣奉

上諭軍興以來迭經諭令各直省督撫勸諭紳民舉行團練京外官紳果有諳悉戎機者亦屢經降旨令其在籍辦團藉資表率迨著有勞績經各督撫及各路統兵大臣奏聞亦無不立予恩施以示優異凡以官民聯爲一體卽盜賊無自生心正本清源莫要於是著在京籍隸江蘇安徽浙江河南等省之大小官員將如何團練隨同官兵助剿及防守等一切事宜



務須統籌全局尤不可自顧鄉閭須與官兵聯爲一  
氣庶於防剿方能得力其如何辦理之處著各據所  
見各舉所知迅速奏聞毋得虛言唐塞等因欽此

伏讀之下仰見我

皇上宵旰憂勤焦思廣益之至意竊惟民爲邦本本  
固邦安

聖諭所云官民聯爲一體盜賊無自而生正本清源  
莫要於此者誠得乎千古戡亂之要矣然官兵之能  
聯爲一體者必非無道以致之也

臣

再三思繹考古

驗今蓋必藉守令之賢有以得人心而後上下能合

亦賴將帥之方畧有以副衆望而後遠近不攜謹據  
管見所及爲我

皇上條陳之

一民團不可招募外勇也承平日久營伍廢弛於是  
募勇以承兵丁之乏然皆烏合之衆無家室以繫其  
情狠子之心好淫掠以逞其欲今各處失事多係募  
勇所爲况鄉里之間安可容留此輩故辦團之始必  
應由各該地方官令各該處士民公舉才德勝任者  
作爲團練董事卽令董事各就其本城本鄉選派丁  
壯乘便訓練平日各務行業有警其集巡防則人皆

相識無慮藏奸家自爲謀無虞坐視且各事其事各食其食平時不需參養之資以親及親以友及友臨事自有相維之勢矣

一民團不可令供調遣也鄉曲蚩氓未經戎事勸令團練不過因其身家之念用其心力之齊若將隨兵調遣則技藝本不嫻熟人地又復生疎棄田廬而赴敵必非所甘裹餽糧而從軍更爲所畏非但無補於戎行且將有傷於政體在拘謹者必懼而思散賊來無可恃之防在刁悍者必抗而不遵官令有不行之處示民以弱易啟亂心強人所難更生他變故辦團

之始必剴切曉諭使民知團練之設祇期自保田園  
永不遠供征討則人有固志寇氛肆擾可堅守以待  
官軍將士飛追可截擊以襄兵力將見賊無所掠而  
易衰兵有所助而易勝矣

一民團爲賊所擾宜令官軍迅速救援也團丁未習  
武備村堡更異堅城賊匪零星尙可擒斬若遇大隊  
逼攻經旬抵禦則力不能繼勢自易危一處爲賊所  
殲他處卽爲之奪氣一人爲賊所脅他處必因之貳  
心甚且以官不策應而生怨望官無恩信而致乖離  
矣自宜諄諭各鄉團練互相保護以成首尾相應之

勢且懇

特降諭旨嚴飭各該就近官軍盡力救援俾無失陷  
其有救援不力者定將該將士軍法從事庶民心不  
懾而民氣益奮矣

一民團殺賊有功毋令官兵攘奪勞績也

國家遣將出師本所以安民衛境編氓既有賦稅殷  
戶復效捐輸皆所以供軍需也官兵不能刻期滅賊  
使百姓得享太平尙須勞苦百姓自爲守禦已無以  
仰副

聖天子懷保小民之意乃於團練殺賊之功復攘竊

以私其將弁冀免失事之咎而邀獎賞之恩何怪民  
團之弱者灰心強者懷忿乎此種情弊各省恐不能  
免應請

旨嚴行禁止務隨時核實指名請獎官紳晉其品秩  
庶民免其錢糧則食毛踐土之倫旣感生成而圖報  
更慕

恩寵而爭先矣

一選擇守令以固衆心也草野至賤廟堂至尊所賴  
以宣上德而達下情者非守令而何今日吏道雜而  
多端求其聽斷勤慎催科平允稍知留意民事者亦

已罕覲以武健爲強能以窺伺爲明察以聚斂爲忠勤以鑽營爲幹濟而昏庸闕尤者流更無論矣官之於民痛癢初不相關民之於官休戚誰能與其乎應請

旨飭令疆臣嚴行甄別毋稍姑容則吏治清而民心睦矣然非督撫藩臬公正廉明整躬率屬則良吏不獲見知而劣員轉可邀幸此尤仰賴

聖主之慎簡大僚循名責實以端聯合官民之本也一申明軍律以督成功也自粵西軍興以來迄今十有餘年若言力單則徵調之兵與召募之勇已不止

數十萬矣若言餉絀則部撥之銀與民捐之欸亦不下數千萬矣乃賊之遠者日近賊之少者日繁兵勇本以剿賊而通賊者兵勇居多兵勇本以衛民而擾民者兵勇更甚不知所統兵勇果係何人所費軍餉果作何用各該統兵大臣等如誠能甘苦與同賞罰必當機宜悉中畛域不分何以日久而功不能立弊且叢生也豈非以

聖恩寬大故敢於玩愒乎我朝行軍紀律至密且嚴  
應請

飭令該部查明雍正乾隆年間所定各條軍令抄錄



進呈頒發各營遵照并乞飭查債事大臣按軍律治罪以昭炯戒恩先疎賤則人知勸罰先親貴則人知懼乾綱一振迅奏膚功而民力可不久勞矣否則小民雖懷忠義何能經年累月而不萌倦意不生異心乎

以上六條皆統籌全局聯官民爲一體之道也誠以各省情形地之夷險不一人之強弱不同團練章程難於概論而非守令得人將帥得人則無以結民心而副人望必不能強之使聯也欽惟我

皇上位在德元敬以作所獎直遠佞澄敘官方約已

裕民厚培邦本上繼

祖宗創業之心以消中外生民之禍自不難刻期蕩  
寇普惠無疆矣臣尤伏願

皇上聖不自聖治益求治以光大業而迓

天庥也是否有當伏乞

皇上聖鑒謹

奏

[illegible]

再欽奉

上諭令在京大小官員各舉所知甚感事也臣見聞固陋於浙中官紳孰堪保舉無所知悉惟前年丁憂回籍起服來京經過清江數次因爲兵阻居住十餘日聞淮徐士民無不稱頌前任任清河令現任署淮徐道吳棠之循績而樂爲之用是其人才必有大過人者現在清江破殘之地善後非易且賊擾江南淮安徐州一帶尤須控制得人今當奉

旨議裁河督另設大員若吳棠者臣雖未識其面而地方士民旣深愛戴似可以備

採擇謹附片奏

聞伏候

聖裁

夷務緊急

巡幸木蘭疏

咸豐十年七月

奏爲急陳管見仰祈

乾斷事竊

臣

頃聞人傳說夷務甚爲緊急

臣下

有倡

爲巡幸之說者不勝杞憂謹條陳管見爲我

皇上直言之

一

聖心益宜鎮定也事之成敗皆由天命

況夷人深入不過數千京外官兵何止數萬

但能守禦有方京城自可無害若

聖駕偶有移動則城中必亂而道路且有衝突儀仗

之事惟求卽日進宮以鎮人心而作士氣此第一要務也

一戰守機當審也夷人之必欲進京一則因中國和約屢有變更以爲

欽差大臣全不足憑故欲進京請

旨一則妄自尊大欲藉此以誇耀海外諸邦若必有并吞之意則數千人深入亦何能爲乎浪戰不可不慎宜先堅守以待援兵諭詢夷人來意若止欲更換和約可令其將人馬兵仗留在通州准其頭目帶領十人進京奏訴一切若必須統帶兵馬進京卽令僧

格淋沁瑞麟與城守官兵前後夾攻殺夷人一名賞  
實銀五十兩

一請遣近支親郡王馳赴津郡號召士民也夷人深  
入不過數千其大隊尙在天津若令士民奮勇剿殺  
焚船夷人自必返顧然非有重賞不能激勸親郡王  
位尊望重准其便宜行事號令更易得力除夷人所  
有貨物卽行充賞外准該王酌量賞給官職事平日  
再行奏聞另派一王前往山東一王前往山海關一  
體辦理

一請頒罪已詔書以固人心也夷人滋擾以來剿撫



或有乖方以及各省病民之事固皆由臣工奉行不

善然禹湯罪已其興勃然我

皇上必不斥臣言爲妄也并祈飭令將捐輸抽釐等

事卽行停止則人心悅而

天心可知矣

以上四條皆今日急務臣於燈下手繕眼花手顫不

能工楷謹密封呈進伏乞

皇上聖鑒

乾斷施行謹

奏

急陳時事疏

咸豐十年八月

奏爲敬陳管見仰祈

聖鑒事咸豐十年八月初六日內閣奉

上諭近畿各州縣地方士民或率領鄉兵齊心助戰或整飭團練阻截路途無論員弁兵民人等如有能斬黑夷首一級者賞銀五十兩有能斬白夷首一級者賞銀一百兩有能擒著名夷首一人者賞銀五百兩有能焚搶夷船一隻者賞銀五千兩所得資財全行充賞等因欽此

臣

恭讀之餘不勝踴躍卽道路傳

聞亦莫不喜形眉宇以此見

大聖人過化存神之道而

祖宗德澤之浹洽於人心者深也惟思

朝廷詔令非信不行

主上恩施惟速乃勸況久經議撫兵民之氣已頽決  
欲用兵犒賞之資宜裕倘兵民報驗首級而賞項不  
能應時發給則人心易生疑阻卽軍務大可憂危未  
知戶部諸臣已寬爲籌備請

旨施行否伏乞飭下該部迅速由庫儲銀兩內提數  
十萬兩卽行解交僧格淋沁瑞麟勝保軍營以及各  
該管衙門收存以備隨時發給務令官弁毋攘兵之

賞兵丁毋奪民之功則人知

朝廷恩信自必同仇敵愾奮勇爭先矣至天津府以  
及沿海各省亦請飭下該督撫一面廣貼謄黃一面  
設法籌欸立時賞給毋得逾時所有微臣愚昧之見  
謹繕摺具奏伏乞

皇上聖鑒謹

奏

再行軍之道首在賞罰嚴明現蒙

皇上特頒賞格曉諭軍民自其思立功以邀賞矣惟  
紀律不明則官軍或不免仍蹈故習畏死不前應請

飭下各統兵大臣嚴申軍令遇有臨陣退縮棄營逃避者毋論官弁兵丁立斬以徇則營中畏法甚於畏敵人皆有進而無退矣至於各處士民如有私通夷人接濟一切者亦應責成地方官嚴拏究辦以清內奸謹附片請

旨

力疾辭職疏

咸豐十年九月

奏爲病軀難以供職仰祈

天恩開缺調理事竊

臣

賦質庸愚受恩深重涓埃未

報衾影滋漸自咸豐六年

臣

父病故後哀毀餘生日

形憔悴扶柩歸葬途阻且長正當丹陽被兵齊河發

水跋涉艱險迥異情常昕夕憂勞致成怔忡之症時

發時愈近因外夷屢擾內盜肆行睹時事之艱難更

焦思而莫釋雖間有規畫初無當於宸謨而時切圖

維轉足增於病勢復值逆夷內犯懣恨方深忽傳

聖駕北巡驚憂益甚遂致舊症加劇食不甘味寢不

成眠肢體酸疲精神恍惚心跳欲出頭暈難支遇事  
驚疑聞聲震恐延醫調治服藥鮮功據醫者云病由  
思慮過度所致非靜養一半年不能全愈早思乞假  
以便醫調祇以軍務緊急正臣子所當效命之時是  
以不敢冒昧

奏請而日復一日實有不能支持之勢現在仰賴  
皇上鴻福夷人悔悟撫議可成若徒株守京中委頓  
待斃何若訪醫境外而補救是圖惟有據實上陳仰  
懇

天恩准臣開缺俾得出外就醫安心調理一俟病痊

卽當馳赴行在泥首

宮門求賞差使兩世承

恩於

帝闕正愧疎庸一朝被挫於夷人不勝悲憤所有

微

臣患病不能供職下忱理合繕摺具奏伏乞

皇上聖鑒謹

奏





泣陳哀悃疏

咸豐十一年八月

奏爲泣陳哀悃仰慰

聖懷事

臣

於去年因病

奏請開缺行至湖南就醫咸豐十一年八月初十日

湖南撫

臣

傳知欽奉

上諭一道

臣

伏讀之下驚悉

大行皇帝龍馭上賓伏地哀號五中迸裂欽惟

大行皇帝臨御以來敬

天法

祖

勤政

愛民

道叶乾行

澤符坤厚

聖德昭垂於萬世深仁浹洽於兆民忽聞舜狩陟方  
莫不創深痛鉅伏思

皇上大孝性成遠超千古亮陰恭默哀慟更深惟念  
皇上寅承大統撫馭寰區所關於

宗

社蒼生者至重且鉅伏祈

聖躬善加保衛勉節哀思溯

世祖沖齡創造之宏謨繼

聖祖久道治平之大業上以慰

大行皇帝在天之靈而下以遂中外

臣民之望臣父

湯金釧仰荷四朝知遇既備寵榮

臣以菲材復蒙

大行皇帝恩施優渥於十年中由中書擢用至三品

卿受

恩至重圖報末由哀戀何窮追攀無自祇以病未痊

愈不克進京隨班哭臨并泥首宮門恭請

聖安以稍伸犬馬之忱悚惶何極理合恭摺泣陳哀

惘仰慰

聖懷伏乞

皇上聖鑒謹

奏

慎思居存稿卷二

蕭山湯修

雜文

上祁相國論軍儲事書

時官內閣中書

修材畧鄙戇豈有尺寸足資帷幄然芻蕘之愚懷蓄已久今承令參議雖知無當於事情不可不爲中堂畧陳之惟

中堂採擇焉竊惟聚人之道本於理財經國之猷先宜制用况當櫓槍未掃帑藏先空可不未雨綢繆多方籌備乎然生財祇有此數取用每無窮期非必淫侈無度始足傷財但不豐儉因時已非節用其弊必

至損下而益上其害必至聚財而散民始以除盜賊而籌餽饟之方終以籌餽餉而增盜賊之勢掌國計者不可不深長思也聖賢論政足食足兵民信三者至必不得已時止有去法別無加法豈其智不若後人哉良以非義取利勢必至失民心也易曰節以制度不傷財不害民傳曰百姓足君孰與不足百姓不足君孰與足古訓昭垂良可察也我

聖朝

聖相承痼瘕在抱

皇上寬仁恭儉宮中府中服用俱有定式一游一豫制度皆由舊章從無汰侈驕奢之事顧當經費支絀而猶襲豐亨豫大之規則時絀舉贏必苦於不繼當饋餽紛繁而不省泛常浮雜之費則出多入少必至於不支蓋因循之久期於振興而振興之難同於創造非法創造之顯謨無以建振興之大業苟以爲所圖迂緩則七年之病求三年之艾猶勝於不蓄也苟以爲所得纖微則日計不足月計有餘猶勝於不爲也與其爲苟且一時之計以傷

國家元氣何如法



神聖萬年之道不失治世常經平條欸之詳未敢妄  
擬綱領之大畧可指陳一軍國之要需不可啻宜核  
虛冒而動項必期於有功一中外之冗費不可留宜  
裁緣飾而用財惟主於所急一徵解宜年清年欸勿  
致影射舊虧轉增新欠一蠹弊宜漸消漸革勿任因  
循中飽暗損正供此則清理財用之出入而收效於  
數年之後者也至於目前應急之方則亦有說或責  
成糧臺核軍營浮消浪費或飭令將帥汰軍營疲卒  
冗員或轉運隨地制宜米麥布帛皆可利用不必拘  
泥用銀以免輾轉兌折之數至若發

內庫之積儲出

宮庭之金幣減

內廷之費用停

禁籞之工修則又

聖主憂勤天下克已宏物之

盛德足以動臣民愧奮之心消盜賊怨憤之氣者也  
若夫生財之大原在小民之樂業非察吏明則貪庸  
得以便其私非恤吏周則循良無以展其用故令長  
之賢視乎郡守郡守之賢視乎督撫督撫施措視乎  
朝廷大臣而必本於主德之清心寡欲苟吏非其人

則章程雖密第以文具相欺法令稍乖必至侵漁無藝而又何財之可得至於選將才嚴軍令懲退怯恤饑勞寬結會之徒鋤爲逆之首守土者保完善之區使賊無所掠則自散統師者勉襲擊之策使賊無所據則自衰此其事若無與於籌餉而轉輸不至坐耗實爲籌餉之先務也自來論治者必責難於君而委重於大臣故宰治者苟懷百姓有過在予一人之心而震動恪恭以迓天眷輔治者苟切飢由已飢溺由已溺之意而循名責實以勵羣才則庶祥自集功業自成此固振弊起衰之大本而理財亦不能外焉者

豈當此

明良起之時不還至而立有效也哉不此之務而多爲名目別啟徑途巧言以動聖聽託說以剝民財竊恐其患有不至於財匱者

祖宗謨訓具在

靈爽式憑自宜無有忍出於此者也忘分僭越謹陳管見伏冀

鈞裁無任感激惶恐之至



致曾滌生制軍書

前啟佚

一皖省宜先肅清以固根本也江浙爲財賦之區賊蹤不淨則民生不安而漕米無從取給固宜汲汲從事也然從前金陵可克而不克蘇常可保而不保甯徽金衢可扼而不扼以致東南半壁盡付淪胥今惟恃

麾下渡江轉戰千里奔命無論勝負爲兵家之常未可豫必卽令戰無不勝攻無不克而賊以走而不守之勢與官軍迭爲出入互相後先刻期掃蕩果可決諸期月間乎

安慶爲駐節之地齊豫當

圻輔之衝而四境以內髮逆散據捻匪縱橫苗李心事可見倘或變生不測則大帥無金湯可恃而烽烟且直達甘泉矣兵無常形相時而動昔日之所急者在南服今日之所急者在中原似宜厚集兵力密運機緘將在北之髮逆捻匪及苗李等各營寨先行戡定可剿則剿可撫則撫受撫者必責令滅賊自效被剿者必豫防散匪北投則

麾下尉腋旣清得以專力東下且皖地荒蕪可屯田以足軍食皖民强悍可選良以壯戎行而復令齊豫

夾攻以除多壘秦晉靜鎮以消伏戎

輦之下自益清平矣

聖天子一旦眷懷民瘼順時西巡講武敷文固足以振軍威而定民志而且殽函之險旣遠海氛水陸之饒足供

上用扈從簡而充食裁儀文省而浮費節肅清齊豫控制襄樊撫綏秦隴本根旣固而後乘百勝之兵威數道並進以削平東南寇盜此誠今日撥亂之大畧也否則譬諸醫者治瘍瘍在頭治頭在足治足輾轉日久瘍毒將入臟而攻心手足雖愈庸有益乎而況



其未必愈也

一江浙宜嚴防扼以杜回竄也

修

浙人也墳墓在蕭

宗族在蕭詎不願指日掃除可以早圖歸計而爲大局計實有不可不慎者今日髮逆已成流賊擇肥而噬食盡而遷現在甯紹淪亡富室厚資俱爲所掠鄉間惡少並爲其徒恐已有回竄豫章之意若遽令偏師直搗賊未必不望風而逃而竄入安徽則大營勢分竄入江右則糧臺被擾甚或流至淮揚武漢等處則震驚更遠是不可不豫慮者也竊謂

麾下宜部署各文武將賊竄他省之途嚴加控扼使

賊盜旋轉於已經失陷之地而不得出賊如留戀江浙半年之久俟皖省一律肅清而後以全力搏之竊意賊之幸者亦惟入海爲盜耳浙中米糧不敷民食向藉川湖臺灣等處商販接濟今川湖路阻米不到浙若將臺運禁絕賊食無資久必自亂惟恐甯郡夷人接濟若能設法斷之賊在浙中必難久據所慮者肆竄之逐控扼不易耳詎可進攻以速其出哉一吏治急宜講求以清亂源也各省叛夫紛紛四起其果有豪傑之才圖謀非分者乎抑惟獷悍者疾貧困窮者走險皆由官吏之不善撫馭乎何民之化爲

賊者日出不窮而賊之散爲民者移時復變也方今  
吏治蓋難言矣卽所稱明幹者亦惟強禦撻克之才  
所號循良者大抵小廉曲謹之守間有徇國忘身愛  
民如子者否乎似宜精選守令重其事權文武統歸  
調度生殺悉准便宜久任以責其成嚴法以懲其玩  
使完固之區可以保守破殘之地可以輯綏良善之  
民可以安撫凶頑之類可以剪除解散之徒可以安  
插流離之子可以勞來則小民亦何樂乎爲賊哉若  
粵 梧山東沂兗及皖之潁鳳等處皆賊所自出  
之地文武畏難苟安會無莅任視事者則亂源何以

得清開國伊始草萊徧地虎兕入城數年而復成市井無賢吏焦心勞力於其間而自致豐綏也不  
是之務而惟恃師武臣力以俘馘爲功則良民無以  
安其生業莠民得以逞其奸謀無論誅之不可勝誅  
而兵日疲餉日絀且有不戢自焚之患卽今殄戮無  
遺而已傷天地之和而失司牧之職矣嗚呼弄兵赤  
子孰非

祖宗二百年來所休養生息而成者乃不思杜其惡  
機而開其生路乎

一軍律必宜明信以昭功罪也

國家惇大成裕自不屑以綜覈爲先然師出以律否臧則凶賞不當功非獨無以示勸且隳人立功之心罪有遺罰非獨無以明恩且啟人玩法之意近來守土者棄城率師者避寇往往得邀寬典甚至以受恩至重之大臣逮赴詔獄尙可藉故遷延設端解脫其將何以服人心而作士氣似宜申明軍律執法從事有功必賞微賤不遺而不可以假借也有罪必誅親貴不貸而不可以幸逃也書曰威克厥愛允濟愛克克九罔功古人豈好爲刻核哉誠以兵凶戰危非使人畏法甚於畏敵無以制勝也

石聽圖記

叔子客於長沙課子自適倦隱几而卧見老比丘  
披帷入叱曰何睡之濃迄今猶不覺耶子瞿然醒拍  
案曰子何人子何人乃入吾室攬我夢耶老比丘曰  
噫汝果不識老僧耶何一入塵寰性靈遂汨沒至斯  
耶以夢爲不夢而以不夢爲夢耶余熟視之跪以請  
曰上人豈卽文殊師耶老比丘曰然子欲識子因緣  
乎我明告子子自入夢以來幾何年矣生明族登賢  
書保直徽垣揚華柏府出入禁闥躋躋容台朝必偕  
宴必與非所謂大丈夫得意時平而問子之志所償

者安在哉世人吾知之矣衣服之麗宮室之美妻妾  
之奉便僻側媚之逢迎於前得一於此欣然忘死子  
之所志果若是耶果若是今亦足矣尙何仰而歎俯  
而噓昏然而寐耶余拂然曰汝速去汝非知我者乎  
溷我老比邱笑曰子無怒子能從我遊乎授以錫杖  
其騎上騰亂青雲跨大海飄然陡落四顧崇山幽谷  
間以琳宮琅宇鸞吟鳳舞龍擾虎馴突見頑石屹立  
當前老比邱跌坐作講經狀示予曰汝識此五台石  
兄恍然悟泣然泣長跪捧老比邱足而言曰弟  
子冥眈更生五濁實昧前因惟我師明教我挽我於

末路老北邱喟然曰世之成敗運實爲之人之顯晦  
時之隆之惟聖知時惟聖承運或躍或潛豈有容心  
汝在山中沐日月華餐霜露潤頑然蠢質妙契法華  
氣積神生遽懷世業若臯若契若呂若周蕭曹扶興  
管樂救敗謂惟有志何憚無功心動神隨五旬墮落  
今茲拂逆正汝津梁速返爾觀淨祛爾障黃花翠竹  
所在如如毋昧前根永乖真諦語未畢醒起視晷影  
纔過八磚靜坐思之若深有美倩畫者繪小影題曰  
石聽圖并記之如此





朱石樵都轉團練事宜序

庚申<sup>修</sup>承乏奉常

詔廷臣各以團練利弊奏謹就管闕列六日上之其大指在選守令以結民心督將帥以副民望而已迂慙之論每自愧書生竊祿於

朝狹聞見淺閱歷言之無當於事情也其秋引疾去京師來長沙晤先生於黃南坡先生所閱數日承枉顧不棄愚陋以所著團練事宜見示自是晨夕過從余每出酒餚與之共飲一日先生被酒大醉意氣勃然因徧刺當世事無所避忌究切利病指刺賢能得

失判決于前高下臚列於臆瀾而有本覈而不誣余  
益信先生爲天下才也先是粵寇未及楚先生先幾  
炳燭創爲團練後人踵而行之湘楚之夫遂雄視乎  
天下江羅諸偉人皆其所識拔而成就者先生所謂  
加人一等者耶退而細繹其所著始審當日修所奏  
雖未能曲暢事情要未甚悖乎理豈非修之大幸而  
稍足自信者歟

歐陽氏家廟碑跋

修歲昔趨庭聞先君子稱坦齋年丈品詣心嚮往之庚申引疾出京擬歸里守墓抵鄂垣道阻勿獲辛酉漂泊長沙四易歲矣欣晤喆孫信甫於年丈砥學勵行承前啟後諸大端益詳悉今年春喆孫出其家廟記囑題盟誦數四其大義炳然足以型家範俗者已詳先君子及諸名公題跋無可復贅而修竊由是是有感焉

國家令典品官得立家廟先君子當日考古今酌規制欲創建爲妥侑所以遊宦無定因循中止今修

勾留湘衡聞各路持節剿寇者尙未籌全局以殄滅  
爲志則浙水澄清正未可恃一漑松楸猶難卜日而  
況欲建祠以繼先志哉年丈際承平之世得從容以  
快所欲爲是固年丈之篤於孝敬而亦遭遇之盛使  
然耳景仰無已益深愴然矣

中議大夫候選道怡堂孫君墓志銘

君諡坦原名傑壘字睦庭別字怡堂姓孫氏浙江山陰人曾祖俊源例授登仕郎妣韓氏祖賢梓國學生妣沈氏父良燧妣沈氏本生父良炯妣李氏 封贈如君官 君生而穎異少孤家貧不獲卒舉子業依其戚來楚習申韓遨遊所至無不相知恨晚然公素負大志居幕中鬱鬱非所樂道光二十三年由國學生以資授府經歷分發湖南二十九年署瀏陽縣丞甫下車新甯賊起隨楊觀察往剿有功咸豐二年擢知縣三年粵逆犯長沙省垣戒嚴邏者獲奸謀日不

絕委公鞠實屢出其疑似者雖觸上官怒不顧然亦以是見知次年權知辰谿事清留獄建義倉軍需旁午民不爲困雲南叅將某統悍卒道出辰谿恣甚公効之督趣逐捕不少憚自是兵行咸屏息黎庶乂安如堵題補保靖旋移署善化並辦鈔錢事解紛疏滯大府器之擢同知委司湘潭減漕事官民並利遂畀公以篆務當是時賊擾寶慶相距僅二百里吏民震動咸謂不可守公屹如山立銳意籌防董率團練修浚城隍儲待什器募闕虢之士廣偵探之途賊聞遂無敢窺伺上官以課績稱最擢知府旋輸資以道員

歸部銓注卸縣事復以厯辦捐輸濟鄰省兵食敘功  
賜花翎加鹽運使司銜二年春今浙閩總督前撫  
浙左公督師下浙江苦饑饉不繼思整浙西鹺政以  
濟師屈指善理財者無出公右因檄調公典厥事公  
當桑梓兵燹初復尋墜興廢芟蕪剔蠹不撓於親故  
不倚於威削月獲課金數萬軍以不饑民用不擾甫  
五閱月遽攫時疾未觀厥成言哉公篤於內行後大  
宗歲時祭享必誠於父母生養死葬家乏擔石儲積  
館穀寄奉無或後時撫降服弟教以學業授以家室  
爲弟之子輸資得官昆仲志趣不同終曲衷盡其友



愛交友不分畦畛爲人謀必以實遇故舊之有惠者報之久彌篤儉於自奉其平生行誼類如此鄉人士其稱之辛酉余羈滯長沙始見君喜其肝膽有識畧晨夕過從客歲祖餞公余微尼之公慨然曰宦游湘中四十年先塋猶未葺祀田猶未置季弟恆產猶未立今幸浙水復清不及時歸里此願將終虛矣豈欲藉制軍一紙書以博進取耶歸里未幾所事俱無條緒竟於同治二年九月十有五日戌時卒於鹽茶公廨是公之所爲遺恨無窮者固不在功未立名未顯妻孥未在側也公天性明達果敢雖未致力於文學

而行誼實有隱合於道者宜其宣爲政蹟寬而有制  
猛而不殘奸黠憚其威良善感其德也使天假之年  
其所樹立豈止是哉公生於嘉慶十有二年十月二  
十八日享年五十有七原配李淑人繼章淑人俱先  
公卒無出繼馬淑人子二循丙循澧女三側室某氏  
先是公孤以故鄉兵火初息營葬維艱權奉櫬來長  
沙將卜吉於善化縣燕子嶺之晏家坡奉行狀乞納  
壙之文於余余與君生同郡雖不文曷敢辭銘曰  
家道之隆曰自君始惟其厚德施及孫子生返鏡湖  
歿瘞湘水時實爲之夫豈公旨閼閼幽宮旣安且歸

肇遷發祥於千萬禩

卷二

三

8

王安生君配陳孺人析田碑記

湘洲王先生 先大父之姪而享子敘元公之女兄  
歸先伯考黎青公爲元配則修於湘洲先生又外孫  
行也今敘元舅氏長子安正君之配陳孺人以其析  
田節畧浼夫從弟修翎笛人寓書於修請爲之記其  
言曰余不天夫子早世享子不祿未亡人與妾吳煢  
煢霜雪中者有年今年已衰老繼享未立恐一旦溘  
逝因啟事端以違先世肅雍之教爰集房族公議將  
安生君所受分產內辰餘等字號田拾肆畝叁分壹  
釐貳毫作爲安生君祭產入安公祭戶輸糧將未亡

人自買成列等字號田貳拾玖畝肆釐貳毫盡數捐  
入王氏宗祠作爲合族公產以供祀事入義祠戶輪  
糧將所餘分產內張往秋餘等字號田貳拾捌畝零  
陸釐叁毫留作膳田俟繼嗣存人卽與繼子守業以  
供生養死葬之需嗚呼孺人青年矢志白首完貞天  
不憖遺螟蛉早隕曾是數區田壤尙不欲坐擁自娛  
必及早爲之區處蓋立祭田懼夫子血食之中缺也  
助祠產欲同宗孝享之益豐也以所餘作膳田慮暮  
年養贍之累人而嗣子之無依賴也其宅心也厚其  
處事也周其弭釁也豫孺人之用心不良苦歎昔先

君子撰王氏義田碑記豔稱其敦本收族之媿孺人  
一嫠婦耳今觀所爲乃濶達精詳若此此豈得以巾  
幘而少之於以歎王氏世澤之長而安生君爲不死  
矣修誼託葭莩且重修翎笛人之請故直書其事

